

**NATIONAL ASSEMBLY OF
SEYCHELLES**

Thursday 16th November 2023

The Assembly met at 9am

National Anthem

Moment of Reflection

Mr Speaker in the Chair

**ANTI-CORRUPTION
COMMISSION**

MR SPEAKER

Bonzour tou Manm Onorab. Bonzour tou bann zofisyé Lasanble, nou piblik ki pe zwenn nou an deor. Mersi pou zot prezans zot tou. Nou pou kontinyen dan konsiderasyon Bidze dan Komite. Serzan a pas nou dan Komite. Madanm raporter i ava apel delegasyon ki pe atann.

Bonzour delegasyon *Anti-Corruption Commission* Ms May De Silva *Commissioner*, Mr Denis Joubert *Deputy Commissioner*, Mrs Claudia Mathiot *Finance Officer*. E lo kote Minister Finans Ms Astride Tamatave e Mrs Ruth Pool. Mersi pou zot partisipasyon, e byenveni.

Onorab Aglae in lev lanmen. Onorab mon bezwen fer ou rapel ki nou pa pran okenn biznes avan biznes Lasanble i komanse, amwen ki ou'n eklersi avek mwan. So, mon pa konnen aköz ou'n lev lanmen, si zis pou... en kestyon? Prosedir, pou Komite. Wi, ale.

HON EGBERT AGLAE

Mersi Mr Speaker. Mon oule demann en kestyon lo prosedir Komite ki nou pe fer la. Aköz mon santi poudir nou ti komans avek 2 kestyon.

MR SPEAKER

Wi?

HON EGBERT AGLAE

Ou'n redwir pou vin en kestyon. E nou napa drwa demann en siplemanter. E mwan i premye legzersis Bidze ki mwan mon pe fer, ki nou annan drwa zis demann en kestyon lo *supplementary*. Mon santi poudir aköz larepons parfwa ki nou pa pe gannyen avek *panel*, nou devret pe kapab pe demann *at least* en siplemanter.

Mon konpran kontrent letan, me si ou bezwen limit kantite Manm ki demann kestyon fer li. Mon krwar i annan en refleksyon ki bezwen ganny fer atraver ABC, pou

kapab fer travay byen ek en standar. Akoz ou pe abes standar la.

MR SPEAKER

Mersi. Menm sa, menm sa Onorab, ou ti'n devret lev avek mwan avan nou komanse. Bon nou pe pran Bidze *Anti-Corruption Commission* ki lo paz 135 ziska 140, pou en total R75 milyon 719 mil. Nou komans konsiderasyon sa Bidze.

Mon a demann *Commissioner* May De Silva pou fer son prezantasyon. *Commissioner*?

ANTI-CORRUPTION COMMISSIONER MAY DE SILVA

Bonzour Mr Speaker. *Leader* Lopozisyon bonzour. *Leader* Zafer Gouvernman, tou bann Onorab ek tou bann dimoun a lekout. Sa i mon 6nm Bidze devan sa Lasanble. E mon la pou reprezant nou Lenstitisyon Anti-Koripsyon ki en antite endepandan.

Nou manda i pou detekte koripsyon, fer lenvestigasyon, delivre program prevansyon e prosekut bann ka ki annan koripsyon. Nou osi annan 2 lezot fonksyon. Deklarasyon byen bann travayer sinyor dan sekter piblik. Deklarasyon byen o zofisye Gouvernman, setadir

Prezidan, *Cabinet*, Manm Lasanble Nasyonal e Mer Laval.

I enportan pou dimoun konpran definisyon koripsyon, akoz sa mo koripsyon i ganny servi bokou. Koripsyon i ganny defini par en labi pouwar par zofisye dan lofis sekter piblik pou zot prop benefis. Sa definisyon i enternasyonal, i ganny rekonnet par Labank Mondyal e osi par *Transparency International*.

ACCS i kontinyen son lalit kont koripsyon dan tou son divers fonksyon. Bann zofisye profesyonnel dan nou lenstitisyon i devoue e zot travay i pa fasil. ACCS i travay bokou avek lezot lazans e lenstitisyon tel ki *FIU*, *FSA*, *SIS*, Labank Santral, Prokirer Zeneral, lapolis, Minis Finans e *SRC* akoz nou bezwen travay ansanm.

Dan lalit kont koripsyon ACCS i osi en partner, i osi annan partner enternasyonal. Sa lannen bann zofisye spesyalize sorti dan bann pei Afriken ki dan *Commonwealth*, Lostrali, Langleter, Lanmerik, Singapore e *Nouvel Zealand* pe travay avek nou. Nou travay osi avek *Interpol* e avek Komite kont koripsyon dan *SADC*.

Kouraman ACCS i annan 58 konplent kot lenvestigasyon i dan staz preliminar. E 14 ka

priyoriter kot lenvestigasyon i dan staz avanse. ACCS in osi kre en *task force* ansanm avek bann lazans lokal, tel ki *FIU*, *SRC*, *Commercial Crime Unit* lapolis e *SIS*. Bi sa *task force* se pou fer lenvestigasyon dan en sel ka ki imans e i tre konpleks.

Nou *unit* prevansyon i konplet sesyon sansibilizasyon e ledikasyon pou travayer sektè piblik depi Zanvye 2023. Aprezan nou, nou ti a kontan fer en sesyon pou Lasanble Nasyonal. Mersi pou zot latansyon.

MR SPEAKER

Mersi *Commissioner*. Bon nou pou komans avek entervansyon bann Manm. Mon krwar bann Manm i a rapel ki nou bezwen evit bann kestasyon lo ka spesifik ki kapab anba envestigasyon oubyen Ankour. E mon sipoze *panel* osi i pou konsyan ki sa i nesese. Lo kestasyon Onorab Aglae nou pou kontinyen avek en kestasyon par Manm. Mon pou regarde si i nesese annan en klarifikasyon.

I mon lentansyon pou permet tou kestasyon ganny reponn. Me selman mon pa kapab lese ki klarifikasyon i vin zis en prosedir pou prolonz en lesanz ant sa zofisye ki la, avek Manm. Akoz nou annan lezot Manm ki pe espere pou demann

kestyon. Mersi. Mersi pou zot konprenezon. Nou a komans avek Onorab Labrosse.

HON RICHARD LABROSSE

Mersi Mr Speaker. Bonzour Mr Speaker. Bonzour tou Manm koleg prezan. Tou travayer Lasanble e byensir Mrs May avek ou lekip, e osi reprezantan Minister Finans.

Mrs May, ou'n fer resorti dan ou lentrodiksyon ki sa i vin nou 6em Bidze ki ou pe devan Lasanble Nasyonal. E Mr Speaker, avan mon konsidere pou vot pou sa Bidze, mon ti a kontan konnen ki konbyen ka ki Anti-Koripsyon ziska ozordi, depi sa 6 Bidze ki nou'n vote ki zot in gannyen - konmsi parey nou dir - zot in gannyen Ankour? Mersi Mr Speaker.

MR SPEAKER

Byensir. Onorab i a remarke ki Komisyoner in fer, donn serten lenformasyon deza. Me Onorab mon krwar kestasyon se depi ler ou'n komanse kote nou ete?

COMMISSIONER ANTI-CORRUPTION MAY DE SILVA

Bonzour Onorab. Mersi pou ou kestasyon. An se moman nou annan 8 ka Ankour. Eskize klarifikasyon *sorry*. Nou annan 4 ka Ankour e 4 i ankor kot AG. Mersi.

MR SPEAKER

Mersi. Sa ki Ankour depi ler ou'n komanse? Mersi. Onorab Romain?

HON GEORGES ROMAIN

Mersi Mr Speaker. Bonzour Mrs Komisyoner avek ou delegasyon. Mon osi letan mon pe regarde dan Bidze Mr Speaker, mon war lo kote *legal fees* i R17 milyon en pti pe plis ki R2 milyon logmantasyon konpare avek 2023.

Mon kestyon i dan menm laliny avek Onorab Labrosse. Selman mon pou spesifye lannen 2024 Komisyoner. Konbyen *case* ki nou ekspekte vwar. La mon pa pe demann non sa *case* Komisyoner. Mon pe demann *in terms figures*. Konbyen *case* ki nou ekspekte vwar ankor 2024?

Baze dan ou lentervansyon ou'n mansyonnen ki i annan 14 *case*, si mon'n byen tande ki dan staz avanse. Mersi Mr Speaker.

MR SPEAKER

Mersi Onorab. *Commissioner*?

COMMISSIONER ANTI-CORRUPTION MAY DE SILVA

Parey mon pe dir nou pe travay lo 14 ka avanse. Nou pa kapab

vreman donn en sif konbyen ki pou al Lakour. Nou espere ki nou kapab prezant sa bann ka kot Prokirer Zeneral dan sa bann 14. Me selman i zis annan de ler i annan bann lenformasyon ki nou espere ki annan retar lo la.

Epi bann kompleksite sa bann ka, mon pa pou kapab donn ou en limero. Me selman ler i ariv dan lanmen Prokirer Zeneral ek Lakour, nou, nou napa okenn drwa, manda lo sa bann ka ki kot Prokirer Zeneral avek kot Lakour.

MR SPEAKER

Mersi *Commissioner*. Onorab Lemiel.

HON SYLVANNE LEMIEL

Mersi Mr Chair. Bonzour Mrs *Commissioner* avek ou lekip. E tou dimoun a lekout. Letan nou pou get lo, nou pou al lo latab anba latab 3 anba *new initiatives funded* nou pou war ki ACCS in dir ki ou pe rod *foreign investigators*.

E sa i pou en valer R21.8 milyon. E dan ou komanter ou'n fer resorti ki sa tim lokal zot pa ankor pare pou zot pran bann *case*. Konbyen *investigators* nou pe koze la pou sa sonm larzan? E konbyen seselwa ki ou ti'n met atase petet akoz ou dir zot pa ankor

pare. Konbyen zot ki annan ki ti *understudy* ki zot ti sipoze petet kapab pran sa bann *case*, me ou, ou vwar pa ankor pare.

Konbyen zot i annan? E petet ki zot diferans saler avek sa bann lezot *investigators*? Mersi.

MR SPEAKER

Mersi Onorab. *Commissioner*?

COMMISSIONER ANTI-CORRUPTION MAY DE SILVA

Nou bann... bonzour Onorab. Nou bann investigater zot ankor lo *on the job training*. Lenvestigasyon krim finansyel i pa en keksoz ki ou pou kapab *train* ou bann dimoun *overnight*. Tou sa bann investigater ki mon pe dir zot pe travay lo zot 14 ka avanse, zot osi pe asiste avek bann lezot ka ki bann investigater enternasyonal pe travay lo la.

So, dan nou *investigations section* nou annan nou 8 investigater, 8 Seselwa wi. Dan nou pratik en *case* an partikilye, nou annan nou 5 investigater enternasyonal ki pe *focus* lo en *case*, *ok*.

MR SPEAKER

Mersi. Onorab Loze. Wi, si ou kapab *Commissioner*. Onorab Loze pasyans. Si ou kapab klarifye lo saler ant bann

Seselwa avek investigater etranze.

COMMISSIONER ANTI-CORRUPTION MAY DE SILVA

Nou pa pou kapab donn zot sa sif. Akoz sa bann investigater zot lo zot kontra endividyel. Nou, nou bann Seselwa i lo zot saler en kad ki ganny rekomannde par *SBS*. Apre nou osi nou donn zot en saler ki en pti pe plis ki pou lapolis. So, pou tou bann konsiltan enternasyonal zot saler i baze lo sa ki sa *growing rate* enternasyonal. E mon ti dir dernyen fwa sete bann *rate* ki nou'n baze lo *EU*, lo *EU rates*. E nou ganny *value for money*.

Akoz sa bann konsiltan ki nou, nou gannyen ki bann lezot pei i *fund* zot pey 2 fwa plis. Par egzanp *FCDO*, i pey 2 konsiltan zot, zot ganny 2 fwa plis ki bann investigater enternasyonal i gannyen. Mersi.

MR SPEAKER

Mersi. Onorab Loze.

HON JOHAN LOZE

Mersi Mr Speaker. Mr Speaker, boner sa lannen *ACCS* in *advertise* pou ganny 2 manm lo son *advisory board* akoz aparaman zot in annan *vacancies* lo zot *advisory board*. Zot annan en problemm avek zot

Lalwa, kot zot annan zot en problemn *governance*.

E Mr Speaker, ou ava rapel *throughout questioning* mon'n koz for lo *governance*. Zot Lalwa pa permet zot *Advisory board* fer *governance oversight*, sirtou lo bann depans sa ta milyon ki zot ale vini demann Lasanble.

Sa ki mon oule konnen, a ki pwen eski ACCS i pou amann son Lalwa pou fer an sort ki zot *Advisory Board* zot *board* esansyelman i kapab annan *governance oversight* lo zot depans.

La mon pa pe koz lo loperasyon ACCS me lo depans ACCS lo sa ta milyon ki zot vin demann Lasanble pou donn zot. Sa ki mon oule konnen *at which point* zot pou amann zot Lalwa. E *Commissioner* mon kontan ou'n donn definisyon koripsyon, definisyon enternasyonal.

Akoz Vis-Prezidan Afif devan Lakour in deza dir pou dir koripsyon vedit *mismanagement*. Mersi Mr Speaker.

MR SPEAKER

Mersi Onorab nou'n konpran ou kestyon. *Commissioner*?

COMMISSIONER ANTI-CORRUPTION MAY DE SILVA

Mersi Onorab. Lo kestyon *gouvernans* Anti-Koripsyon, nou annan en *Advisory Council* ki dan Lalwa zot donn nou zot fonksyon i kler. Lapolis napa en *oversight*, parey nou, nou lapolis koripsyon. Nou annan *oversight* nou. Nou annan Oditer Zeneral ki vini i vin fer son *oversight* lo tou depans ki nou annan.

E nou zenn profesyonnel la, Manmzel Mathiot i enn bann *finance officers* ki pou mwan i alaoter bann *accountants*. Son kantite travay ki i fer lo tou sa bann larzan ki nou depanse. Nou pou toultan bezwen envestigater enternasyonal.

Nou pou toultan bezwen travayer enternasyonal pa zis pou ACCS. Tou bann sekter piblik nou annan en kantite defayans dan ganny bann profesyonnel pou vin travay ek nou. So, nou pou toultan bezwen sa led. E nou larzan, lafason ki nou zer sa larzan nou swiv tou bann *guidelines* Finans, sekter piblik e mon annan konfyans poudir ler Oditer Zeneral i vini i vin regard nou Bidze ki i ava vwar ki tou keksoz i annord. Mersi.

MR SPEAKER

Mersi. Eskiz mwan *Commissioner* mon pou met zis en pti swivi. E sa se aköz mon

anvi asir bann Manm ki mon pou ede ki zot kestyon i ganny reponn. Si ou annan en repons, i son kestyon spesifik si Lalwa pou ganny amande ou kapab dir li wi oubyen non e kan si ou kapab.

COMMISSIONER ANTI-CORRUPTION MAY DE SILVA

Wi. Lalwa Anti-Koripsyon i bezwen re ganny amande. I annan en kantite problemm avek. Mersi.

MR SPEAKER

E ou pa konnen kan?

COMMISSIONER ANTI-CORRUPTION MAY DE SILVA

Sa mon pa konnen.

MR SPEAKER

Mersi. *Ok*. Nou pou *move* lo lot kestyon. Onorab Mondon.

HON TERENCE MONDON

Mersi Mr Chair. Bonzour *Commissioner* avek ou lekip. Mr Chair, mon kestyon i tous bann defi ki Komisyon in fer resorti, in liste plizyer defi akomodasyon, *rent* ki met en presyon lo Bidze depandans lo bann spesyalis investigater ki dan dimansyon enternasyonal.

Shortage of staff, poaching bann *staff* kalifye, *internet cost* ki eleve. Mon anvii konnen avek

Bidze ki zot in pe resevwar pou 2024. Konbyen sa bann defi zot pou kapab rezourd an 2024. Mersi Mr Speaker.

MR SPEAKER

Mersi. *Commissioner*?

COMMISSIONER ANTI-CORRUPTION MAY DE SILVA

Nou pe seye. E nou toultan regarde kote nou kapab ganny bann led enternasyonal, kot nou napa larzan dan Bidze ki pou siporte. E nou vwar pou dir i annan bann lezot nou bann partner enternasyonal ki asiste nou kot nou war i annan bann defi kot i annan bann *gaps*.

So, pou nou, nou ti a kontan ganny en nouvo lofis, en nouvo *building* ki pou nou kapab fer nou travay efektivman. Nou napa ase transpor, e tou sa bann keksoz ki ou vwar la, i bann problemm ki tou bann travayer bann lenstitisyon sektor piblik i annan.

E nou, nou sey rod fason pou nou kapab adres sa bann *issues* parey mon pe eksplike, nou rod led enternasyonal. Mersi.

MR SPEAKER

Mersi *Commissioner*. Onorab Henrie.

HON GERVAIS HENRIE

Mersi Mr Chair. Bonzour tou dimoun partikilyerman, *panel*. Mr Chair, mon kestyon ouswa komantr i baze lo latab 4. *Performance measures for programme*, e ler mon pe get dan *contributing factors; number 1* ki koz lo “*number of public sector and Government entities in which prevention programmes have been delivered.*”

Ler mon pe get bann sif ki’n ganny targete, mon krwar i annan en mank lanbisyon la. Akoz nou sekter piblik i telman pti, pti mon krwar poudir en sesyon ouswa 2 sesyon par an i kapab anmenn bokou plis bann MDAs ansanm. E pou fer en konpany sansibilizasyon kont koripsyon avek nou *public service*, mon krwar zot sif ti bokou pli o.

E dan sa menm laliny Mr Speaker, mon krwar i annan en labsans pou target gran piblik. Akoz si nou pa ganny sipor sak endividi, nou pa pou kapab lager kont koripsyon dan nou pei.

Dabor nou bezwen sipor e konfidans piblik poudir ACCS i en lenstitisyon respektab non politize pe travay drwat. E si ou pa ganny sa sipor, ou pa pou kapab.

So, this should be one of your targets, ki annan en konpany long term lo lakseptans ACCS komantr en lenstitisyon enportan dan Sesel. Mersi.

MR SPEAKER

Mersi. En komantr. *Commissioner* si ou annan okenn remark ki ou anvi fer an retour?

COMMISSIONER ANTI-CORRUPTION MAY DE SILVA

Wi. Onorab, mersi pou sa kestyon. Mon a fer *Deputy Commissioner* reponn sa kestyon. Selman zis pou fer ou konnen, nou annan 3 zofisye dan *Prevention Unit*.

MR SPEAKER

Mersi. *Deputy Commissioner*?

DEPUTY COMMISSIONER DENIS JOUBERT

Bonzour tou Manm Lasanble. Mersi pou ou komantr. E mon konpran sa ki ou’n dir i vreman enportan. Akoz nou bezwen target en pe osi prevansyon.

Mon krwar sa i lapros ki Konvansyon Nasyon z-Ini Kont Koripsyon i met lanfaz lo la. E nou konpran poudir sa lannen nou parey ou pe dir vre nou pa’n fer bokou parey nou anvi fer.

Nou napa sa kantite *staff* ki kapab delivre sa kantite sesyon. Nou fer otan ki nou kapab. E pou sa lannen nou kapab dir ou poudir nou'n fer 7 pou sa lannen. Nou annan ankor 3. Me nou osi pe target sekter prive osi.

Nou'n annan bann *meeting* avek detrwa lezot seksyon. Nou pa zis fer sesyon, me selman nou fer bann rankont avek bann departman lo zot Komite Egzekitiv, pou adres bann sityasyon dan sa bann lenstitisyon.

E nou anvizaze ki lannen prosenn, nou kapab fer en pe bann *assessment*. Nou apel sa *risk assessment*, antre dan en pti sesyon regarde si zot bann Polisi, si zot annan ase mezir ki pou anpese ki koripsyon i pran plas.

Me par kont nou bezwen demann nou lekor en kestyon. Se ki nou koman en endividi, eski nou osi nou pe ede ki koripsyon i arive?

Akoz nou vwar ki depandans i bokou lo nou lenstitisyon. Me par kont letan nou al kot bann lenstitisyon, nou vwar ki sa i annan en pe rezistans par ler. E nou bezwen fer konpran sa bann dimoun poudir ki zot rol koman en *public servant*.

E ki zot devret fer pou ki nou bann lenstitisyon i vin bann lenstitisyon ki respektab, e ki dimoun i kapab *trust*. Mersi bokou.

MR SPEAKER

Mersi *Deputy Commissioner*. Onorab Vidot?

HON AUDREY VIDOT

Mersi Mr Chair, Mr Chairman. Bonzour *Commissioner* avek ou lekip. Avek reprezantan Finans e tou dimoun ki a lekout. Mr Chairman, mon kestyon pou *panel*; nou pe vwar poudir bokou resours i ganny mete lo kote etranze. Pli gro logmantasyon i dan *foreign consultancy*, *legal fees* mon mazine osi i annan en morso osi ki pou al ladan pou en *foreigner*.

Me ler i konsern pou lokal, nou vwar nou koz zis dan mil. Akoz ki - petet dir nou dan sa *training fee* ki nou vwar sonm in ogmante par R200 mil?

E konbyen Seselwa ki ACCS pe al anvoy *training*, pou ki i permet zot kapab ranplas en pe bann etranze ki pe depans bokou an term pou *foreign consultancy*. *Thank you*.

MR SPEAKER

Mersi Onorab. *Commissioner*, *panel*?

COMMISSIONER ANTI-CORRUPTION MAY DE SILVA

Mersi Onorab pou ou kestyon. Set akoz ki nou bezwen led bann konsiltan enternasyonal, ki nou bezwen met lanfaz lo *training* nou bann *staff*. Sa i enportan.

Pou mwan *staff training* i gran. *In fact* nou annan 2 nou *staff* ki'n ganny *Masters*. Enn lo *cybercrime, cybersecurity and international corporate finance*. Epi nou ankouraz nou bann *staff* pou fer zot bann *course* Degre e pou zot vin alaoter sa bann konsiltan.

E zot travay avek sa bann spesyalis *on the job training*. So, tou nou bann travayer i lo sa *training plan*. E an menm tan ki sa bann ki nou kontribye, nou demande dan Bidze i annan en kantite, kantite *training* ki nou gannye avek nou bann partner enternasyonal. Mersi.

MR SPEAKER

Mersi *Commissioner*. Onorab Aglae.

HON EBGERT AGLAE

Mersi Mr Speaker. Bonzour Komisyoner e *panel*. E zofisyè Finans. Komisyoner, mon oule met lanfaz lo sa R21 milyon 840, kot i konsern *investigation*. E boner dan ou larepons, e ki

mon pa tro satisfè avek sa larepons ki ou'n donnen boner.

An vi ki lanfaz mon santi e bann *staff investigators* osi Seselwa, ... santi ki zot pa pe ganny gete an term sa ki konsern en bon reminerasyon - konpare sa ki nou pe pey bann *investigators* etranze. Nou konnen natir sa travay i annan defi, i osi annan bann *high risk*.

So, baze lo la, eski nou'n donn ou *power*, i annan lamannman ki'n anmennen, pou ou *fight* pou nou *investigators* Seselwa, osi ganny en bon reminerasyon. Se sa ki ou pe ganny problem ki tim pa pare.

Eski zot in fer en analiz osi pou war akoz tim pa pare? Eski i annan volonte? Eski zot satisfè avek sa ki zot pe gannye, *compared* menm si ou pa pe donn sonm nou konnen poudir 3 kar sa larzan sa 21 milyon i al pou *foreigners*.

So, eski zot pe lager pou Seselwa osi kapab ganny en bon reminerasyon? Pou en pti pe balanse avek sa ki ou pe pey sa bann etranze. Annou valoriz nou Seselwa. Mersi.

MR SPEAKER

Mersi Onorab. *Commissioner*?

COMMISSIONER ANTI-CORRUPTION MAY DE SILVA

Onorab, mersi pou ou kestyon. Mon toutafe dakor ek ou. Ki nou bann travayer ki dan nou lenstitisyon i devret ganny en bon reminerasyon. Akoz nou perdi bon travayer, akoz sekter piblik apre bann *state-owned enterprise* zot pey pli byen ki nou.

Sa mon fer li tou letan, mon fotespere ki Minister Finans pou regard en kad pou bann spesyalis dan tou lenstitisyon, pa zis dan ACCS. Mon konnen poudir *SCIU* osi i en *issue*. E dan menm sa kalite travay ki *SCIU*.

So, e nou kantmenm mon pou dir mon le donn zot sa saler ki bann konsiltan enternasyonal i gannyen, sa bann konsiltan i vin avek lekspertiz 35 an, 40 an travay dan krim finansyel. Zot bann kontab.

Sa louvraz i spesifik en spesyalize. Ou pa pou kapab *train* sa bann dimoun *overnight*. So, i long term sa. E mon pe espere ki sa bann travayer ki pe *understudy*, zot ava aprann avek sa bann konsiltan.

Epi ki mwan ler mon'n fini kit ACCS, poudir ki nou annan en ACCS kot nou bann travayer i pe ganny son saler, lo sa nivo ki spesyalis i devret gannyen.

E pa bliye poudir nou, nou ganny 0.7poursan Bidze *overall*

dan nou *National Budget*. *SADC* i rekomann Gouvernman pou donn 4 a 5 poursan dan zot Bidze pou lager kont koripsyon. Mersi.

MR SPEAKER

Mersi *Commissioner*. Onorab Gabriel.

HON CONRAD GABRIEL

Mersi Mr Chair. *Welcome, Minis, panel*. Bonzour tou bann dimoun a lekout. ACCS les mon ava enform zot ki lo sa kote latab, nou kont koripsyon. Nou ti a kontan war...

(comments off-mic)

HON CONRAD GABRIEL

...nou pou lager pou koripsyon. *This is a fact*.

Mwan ki mon ti a kontan, i 6enm Bidze *reply*. So, pandan sa 3 an zis dir nou petet - kekwfa Finans i a kapab ed nou - kantite larzan *taxpayers money* ki nou'n met dan sa Bidze *for the past 3 years* ziske la kot nou ete?

Because nou'n tann bann Minister ki'n vini, napa lespas pou donn travayer keksoz. Me selman par kont, ACCS Gouvernman in pare pou donn li tou sa larzan *taxpayers*.

E nou aprann ki i annan Lalwa pou ganny amande. Eski

pou annan en lafen ek sa? Zis donn nou en bon apersi lo la silvouple. Mersi.

MR SPEAKER

Mersi. *Commissioner*?

COMMISSIONER ANTI-CORRUPTION MAY DE SILVA

(Pou sa *breakdown*, Claudia ou annan sa...?) Nou kapab fer ou ganny sa dokiman, i pa avek nou pou sa *last 3 years, total*.

MR SPEAKER

Wi, si zot bezwen letan, zot kapab tyeke nou kapab retourn lo la. Me selman lo sa keston, mon fer remarke bann Manm poudir zot in annan Bidze dan bann lannen ki'n pase. Zot in annan Bidze tou sa bann lannen. E i fasil pou swiv ki kantite.

So, si *panel* i kapab trouv sa lenformasyon nou a *update* li. Mersi bokou. Onorab Uranie.

HON ROCKY URANIE

Mersi Mr Speaker. Mr Speaker, ACCS in ganny donner en kantite larzan. E sa i *taxpayers money*, kot bokou Seselwa pa pe ganny bann logmantasyon ki zot ti sipoze *over the years*.

E ACCS depi ki nou'n amann son Lalwa, an Desanm 2020 Lalwa ti ganny amande.

2021 pou ganny pouvwar prosekiter.

Konbyen ka ki ACCS li menm pe pourswiv Ankour? Mersi.

MR SPEAKER

Silvouple-silvouple Onorab avek respe, mon krwar sa keston in ganny demande e in ganny reponn.

HON ROCKY URANIE

ACCS li menm koman prosekiter, konbyen ka li menm in pourswiv Ankour in fini ganny reponn Mr Speaker?

MR SPEAKER

Bon, *Commissioner*. Mon krwar ou keston in ganny reponn.

HON ROCKY URANIE

Non, pa par AG Mr Speaker!

MR SPEAKER

Commissioner ou le. *Commissioner* ou oule adres sa?

COMMISSIONER ANTI-CORRUPTION MAY DE SILVA

Nou annan nou case 50 milyon ki ACCS ki pe fer prosekisyon. Nou ankor pe espere pou nou ganny en *principal counsel*. Nou pe *advertise* partou, nou pa pe gannyen. Tou dimoun i travay dan defans, *ok*?

AG's Office zot konnen zot menm zot bezwen en *main* prosekiter etranze pou travay avek zot.

Sa i en louvraz ki ou bezwen sa *expert* dan *money laundering*, dan koripsyon, dan krim finansyel. Wi, nou gannyen tou sa ta larzan. E mon pe espere ki nou, nou kapab al rod sa bann byen malaki ki nou pe espere, ki nou ava gannyen kantmenm en bilyon *Dolar* pou met dan kof Gouvernman. Mersi.

MR SPEAKER

Mersi.

HON ROCKY URANIE

Mr Speaker, redir mwan ...

MR SPEAKER

Mersi Onorab.

HON ROCKY URANIE

200 ekek... 217 milyon zis pou en *case*?

MR SPEAKER

Mersi Onorab. Nou pa pou antre dan largiman avek...

HON WAVEN WOODCOCK

(*Off-Mic*)

MR SPEAKER

Silvouple, Onorab Woodcock, ou a ganny ou ler pou ou demann ou kestyon.

Bon, *panel* pa bliye si zot annan sif ki Onorab Gabriel in fer referans avek, ler zot pare lev lanmen e mon ava akord sa repons. Onorab Gill.

HON CHURCHILL GILL

Mersi Mr Chair. Bonzour *panel*. Tou dimoun lo *panel*. Mon kestyon se soutenabilite. Nou tou nou konnen, nou pa konnen kan en *case* pou ganny determinen. Me selman sa ki nou konnen, i pe kout en pe larzan. ACCS i bezwen larzan pou *pursue* sa bann *case*.

Mon kestyon se, ki fason ki ACCS i krwar i pou kapab soutenir son lekor finansyerman ek sa bann *case*, vi ki nou pa konnen. *At this stage* personn pa konnen konbyen letan i pou ale.

So, ki plan ki ACCS i annan fason ki i krwar i pou kapab soutenir son lekor si an ka sa *case* i prolonz plis letan? Mersi.

MR SPEAKER

Mersi. *Commissioner*?

COMMISSIONER ANTI-CORRUPTION MAY DE SILVA

Mersi Onorab pou ou kestyon. ACCS i napa okenn manda dan

Zidisyer. Sa i pa dan nou *purview* sa. Ler *case* i ariv laba, sa Zidisyer ki *deal* avek.

Sustainability i toultan en keksoz dan ler ou pe zer en lenstitisyon, i enportan pou ou fer sir poudir ou kapab *sustain* ou lenstitisyon.

E nou annan en obligasyon enternasyonal. Sa Gouvernman i annan en lobligasyon enternasyonal. In siny *UN Convention against corruption*.

E anba sa obligasyon i bezwen soutenir sa lenstitisyon. Me nou annan dan *Anti-Money Laundering Act, Assets Management Unit* ki pou zer *asset recovery fund*.

Sa i en bout nou *training* ki nou bann *staff* ler zot get ka, toultan zot bezwen get blansisaz larzan. E nou, nou ava fer sir poudir nou travay pou nou retourn sa bann byen malaki.

E akoz dan sa set *recovery fund* viktim i ganny sa larzan, *law enforcement* osi i kapab benefisye pou li donn *training* son *staff*, oubyen fer li pli efektif dan son travay. Mersi.

MR SPEAKER

Mersi *Commissioner*. Onorab Cosgrow.

HON WALLACE COSGROW

Mersi Mr Chairman. Bonzour tou dimoun. Mr Chairman, mon en pti pe soke bomaten, ler *Commissioner* i dir nou in fini *conclude* poudir i annan byen malaki kan i pa nobou kapab prosekut en *case* Ankour. Pou mwan i en pti pe drol.

Mon ti ava petet krwar poudir ti pou'n fini prosekut *case*, ti ava annan serten keksoz ki i ti kapab *conclude* koman byen malaki.

Akoz la pou le moman i ankor *perceive* byen malaki, ou konpran? So, mon ti a kontan ou fer en pti pe *carefully* dan sa ki mannyer ou reponn.

E mon en pe dezapwente ozordi anvi relasyon avek kestyon ki'n ganny demande boner, ki en lorganizasyon ki *deal* avek koripsyon, ou menm ou pa kapab donn nou bann *rate* ki ou pey bann konsiltan etranze, bann *lawyers* etranze, *investigators*.

Koman en lorganizasyon ki *deal* avek koripsyon, mon krwar ou devret *at least* kapab *open* dan sa laliny. Akoz i annan en kantite milyon ki ganny donner par *supplementary*, par Bidze li menm.

So, pou mwan mon krwar piblik Seselwa i bezwen ganny en konpran ki kantite larzan ou pe depanse ek sa bann etranze.

E dan lespri transparans Mr Speaker, mon kestyon i enn ki senp; eski *Commissioner* i kapab dir nou an sa ki konsern en pe letan pase, Gouvernman ti annan en Polisi Transpor pou bann *executives*.

E si ou kapab dir nou si ou ganny bann *Chief Executives* dan Gouvernman? E si ou kapab dir nou si ou gannyen *transportation allowance*?

Akoz mon konpran ki ou pe servi transpor ACCS pou koman ou transportasyon. So, zis klersi nou lo la. Mersi.

MR SPEAKER

Mersi Onorab. *Commissioner*?

COMMISSIONER ANTI-CORRUPTION MAY DE SILVA

Wi, mon gannyen transpor pou mon sekirite, pou mwan fer mon travay, parey tou bann lezot travayer piblik lo sa nivo. Epi lo kalite travay ki zot fer. Wi, mon gannyen. E mon saler i dan *S.I.*, i vin kot Lasanble i piblik. Sa i pa en *issue*.

Lo kote byen malaki, pa zis nou ki pe ale pe al rod sa bann larzan. Nou annan Gouvernman *Nouvel Zealand*, Gouvernman Ameriken, Gouvernman Angle ki pe anmenn sa bann byen malaki ki dan zot pei. Zot in fini vwar

poudir i annan en *lexus* kot krim finansyel.

So, sanmenm sa mon pe dir ou avek konfyans poudir wi, nou pou retourn bann byen malaki. Akoz sa bann pei ki pe regard sa, zot ava fer retournen akoz anba *UNCAC* sa konvansyon enternasyonal, zot fer retourn bann *assets* bann byen malaki.

So, nou bann konsiltan i ganny peye lo *rate* konsiltan, ki bann lenstitisyon parey *FCDO*, parey *EU* i peye. Nou legal i ganny peye en *reasonable rate*. Akoz nou, nou war Ladefans i ganny li £3.5 milyon pou li anmenn 4 dimoun Ladefans, pou nou i zis R20 milyon.

So, mwan mon krwar e sa bann travayer ki vini zot travay dan *weekend*, zot travay aswar pli tar 6er zot ankor dan biro, *public holidays* zot travay. Mwan mon krwar i *value for money*. Mersi.

MR SPEAKER

Mersi *Commissioner*. Mon pou zis fer en pti swivi kestyon lo *transportation allowance*, si ou gannyen ou kapab revele. Si ou pa gannyen, *whatever* ki ou oule dir nou pou aksepte li koman ou repons.

COMMISSIONER ANTI-CORRUPTION MAY DE SILVA

Non, mon pa gannyen *transportation allowance*. Mon servi loto as *part of* mon kontra. Mersi.

MR SPEAKER

Mersi *Commissioner*. Onorab Herminie.

HON WILBERT HERMINIE

Mersi Mr Speaker. Bonzour *Commissioner* avek ou *panel Commissioner*, ou'n konfirmen ki ou'n depans ziska prezan R217 milyon lo zis en *case*, sa case 50 milyon, en?

Ki garanti ou pe donn Lepep Seselwa ki pe soufer avek pri lavi ser, ki sa larzan ki ou'n dir ou pou rekouver ou pou rekouver li? E osi Prezidan osi ti dir dan interview avek *BBC* ki larzan pou ganny rekouver.

So, ki garanti ki ou pe donn Lepep Seselwa? E osi ou'n koz lo sekirite ki ou, ou pe gannyen. Be, eski bann *staff* osi pe ganny sekirite pou vi ki zot osi zot lavi i a risk? Mersi.

MR SPEAKER

Ou a remarke ki ou'n demann 2 kestyon. Me *Commissioner*?

COMMISSIONER ANTI-CORRUPTION MAY DE SILVA

Wi, mon annan konfyans poudir nou pou fer retourn tou sa larzan byen malaki, pou en

fason ki tou Seselwa i a benefisyé.

E tou bann byen ki lapolis oubyen *ACCS* i fer retourn dan nou pei, i pou benefis tou lenfrastruktir nou pei. So, sa i nou bi.

E nou, nou pa pe gete lekel ki'n vole. Tou sa ki vole nou pou get blansisaz larzan. Nou pou gete pou nou fer retourn zot bann *assets*. Mersi.

MR SPEAKER

Lo *staff* ganny *security allowance*, vi ki kestyon in ganny demande.

COMMISSIONER ANTI-CORRUPTION MAY DE SILVA

Wi. Tou *staff* i ganny en *location allowance*. E sa ti a byen si zot ganny en pe plis. I apel en *location allowance*, ki kouver sa bout sekirite. Zot travay dan en landrwa *high risk*, e sa i enn nou ava regarde. Akoz nou pe *renew* nou *scheme of service*. Mersi.

MR SPEAKER

Mersi *Commissioner*. Onorab Woodcock.

HON WAVEL WOODCOCK

Mersi Mr Speaker. Mon kestyon i en pti pe dan laliny ki Onorab Cosgrow in demande. In koz lo *perceived* malaki, zis parey son

Prezidan ti dir ki koripsyon i en persepsyon.

Mon kestyon i baze lo definisyon pou koripsyon. Ki ou'n dir ki koripsyon i labi pouwar bann zofisye dan Gouvernman pou zot gen personnel, bann gen malaki.

Mon kestyon i, en bon pe bann *case* ki aktyelman devan ACCS, i annan pou fer avek en serten parti politik. Serten parey bann ka later, bann ka vol plizyer milyon Roupi, Dolar.

Mon kestyon i dan bann ka kot en zofisye Gouvernman lepase i annan en lyen direk avek en parti politik. Eski zot pou kapab, zot annan sa lotorite pou *investigate* sa parti an partikilye sa parti konsernen? Mersi.

MR SPEAKER

Mersi. *Commissioner*?

COMMISSIONER ANTI-CORRUPTION MAY DE SILVA

Nou get tou ka. Nou annan ka ki pa get parti politik, i pa get lekel alezans en dimoun. Nou, nou pa fer okenn distenksyon dan okenn bann ka ki nou regarde. Me selman nou fer li dan sa kad legal ki nou annan. Mersi.

MR SPEAKER

Mersi. Onorab Pillay?

HON SEBASTIEN PILLAY

Mersi Mr Chairman. E bonzour zofisye ACCS ki la avek nou. E bonzour tou dimoun ki a lekout. Mr Chairman, mon pou retourn dan Bidze. E pou mwan kapab ganny serten prezizyon ki mon krwar Lasanble i devret pe gannyen.

Mon a note Mr Chairman ki parey nou dir ki verbatim Lasanble yer Clerk ti dir i ganny servi Ankour.

Ler nou, nou fini dekri en *case* koman in fini ganny - nou fini gannyen, me *case* i devan Lakour, nou bezwen *careful* avek sa bann *statement*.

E Onorab Cosgrow i annan parfetman rezon poudir sa ki i pe dir. Alors, mon kestyon Mr Chairman, i vin lo sa bann *foreign consultancy fees e legal fees*.

Mr Chairman, sa lannen nou pe met 25.3 milyon dan *foreign consultancy fees*. Nou pe met 17 milyon dan *legal fees*, en logmantasyon 3 milyon lo *revised budget* lannen pase. Ki fer avek bann etranze, nou pe al pratikman depans ankor R42 milyon.

Lannen pase ankor nou ti donn ankor R50 milyon. Alors kestyon ki nou pe demande, se premyerman nou ti a kontan konnen lo ki *rate* ACCS pe pey

sa bann investigater etranze, konparab avek bann *staff* ACCS ki pe konplent?

Nou bezwen dir laverite Mr Chairman, sa i premye kestyon. Dezyenm pwen ki mon ti a kontan...

MR SPEAKER

Hold on. Nou pou... lo premye kestyon la ou dernyen lo lalis. Zis letan nou fini reponn ou kestyon, nou pou retourn kot ou pou dezyenm kestyon.

HON SEBASTIEN PILLAY

Ok.

MR SPEAKER

Onorab mersi.

HON SEBASTIEN PILLAY

Ok. Mersi Mr Chairman. Mon ti a kontan ganny larepons lo la.

MR SPEAKER

Commissioner, ou repons.

COMMISSIONER ANTI-CORRUPTION MAY DE SILVA

Mersi Onorab pou ou kestyon. Mon'n eksplike poudir zot ganny *rate* ki *FCDO* i peye oubyen *EU* i pey zot, *ok?* Sa bann investigater pe travay lo en ka la konmela. Mon'n dir poudir mon ti zwenn zot dan *FPAC* le 23 Zen. Mon ti dir zot

ki mon kapab donn zot sa lenformasyon *in camera*.

So, mwan mon pa oule personn fer politik avek ACCS. Nou en Lenstitisyon Endepandan. Onorab ou'n demann mwan en kestyon, nou'n ganny - mon pe eksplike mon'n dir poudir i annan spesyalis ki vini ki vin travay avek zot *specialisms*.

Ou pa kapab konpar zot avek bann investigater ki napa sa bann kalifikasyon avek lekspertiz. Si en dimoun i annan limitasyon, ou pa kapab donn li en *case* pou li fer, si i pa pe kapab fer sa *case*. Akoz sa *case* ti la zot pa ti kapab fer. Zot in demann mwan pou mwan delivre. Pou mwan delivre mon'n bezwen lasistans enternasyonal pou mwan fer li.

Sa bann *rates* ki zot, zot gannyen mon'n dir ou *FCDO* i pey 2 konsiltan. 2 konsiltan zot double sa lapey *FCDO*. Mon annan 2 konsiltan ki *FCDO* i peye, *ok*, ki asiste nou. Nou legal, nou legal.

I travay tou le mwan, i vini i travay i reste, i baze Sesel, *ok?* Zot Bidze parey ou pe vwar la, mon'n mete i 17 milyon, *ok?* Ladefans ki annan son bann dimoun legal ki pe vini, zot e sa i lenformasyon piblik.

Zot, zot ganny R64 milyon, *ok?* Zot pa la tou le mwan zot

tou le zour zot, *ok*? Sa bann dimoun ki vini, annou dir zot mersi. Sa bann konsiltan ki vini ki travay ek nou, zot ankoler lo lapar Seselwa, pou vwar ki kantite, ki kantite koripsyon in pase dan sa *case*. So, zot ankoler lo nou *behalf*. Mwan osi mon ankoler.

Annou esper sa ka ariv Ankour. Akoz nou ti krwar i pou Ankour sa lannen. Nou annan en kantite lenformasyon ki pe vini sorti dan bann lezot ziridiksyon. E nou bezwen sa bann spesyalis pou asize pou fer analiz.

Sanmenm sa mon'n demann plis. Akoz nou ka pa pe pase Ankour ziska lannen prosenn. Mersi.

MR SPEAKER

Mersi. *Commissioner*, dir mwan *SPDO* mon krwar ou'n dir *SPDO*, i *stand* pou kwa? *SPDO whatever* sa *term*.

COMMISSIONER ANTI-CORRUPTION MAY DE SILVA

Foreign Commonwealth Development Office ti *FCO* lontan.

MR SPEAKER

Ok. Mersi. Nou a pran dezyenm kestyon, Onorab Pillay in endike i annan en dezyenm kestyon. Manm ki annan

dezyenm kestyon. Onorab Pillay.

HON SEBASTIEN PILLAY

Mersi Mr Chairman. Mr Chairman i pa akseptab, nou pa pe demann li konbyen i pe donn sa bann dimoun. Nou oule konn sa *rate*. Akoz i pe kasyet lenformasyon lo sa *rate*? Sa *rate* napa naryen pou fer ek donn *FPAC in camera*.

Nou pa pe demann ou pou dimoun spesifik konbyen pe gannyen. Ou kapab vin donn nou konbyen Ladefans pe donn pou li, ou pa kapab donn nou konbyen ou pe pey sa bann dimoun. Ou pe lwe lakaz pou sa bann dimoun *Eden Island*, ou pa oule dir nou lekel ki ou pe lwe lakaz avek.

Konmsi nou pe pran larzan, nou pe depanse nou pe anvoy dan en sel *case*, en sel *case* ki nou'n depans over R200 milyon. E nou ganny dir ki nou pou *recruit* R1 bilyon. E pandan sa 5 an ki nou pe travay, *still* nou bann investigater Seselwa pa ancor ganny abilite pou fer sa bann *case*.

Mr Chairman, mon oule repet mon kestyon ancor. E mon oule en larepons. I annan en *rate* ki pe ganny servi, mon ti a kontan ki nou ganny sa *rate*. Akoz piblik Seselwa i bezwen konnen - ki *rate* ki pe

ganny servi pou pey sa bann konsiltan etranze kot nou pe koz lakaz, nou pe koz plizyer benefis ki sa bann dimoun pe gannyen.

Ki sa *rate* ki pe ganny servi, pa vin nonm nou pou Ladefans. Nou pa la pou nou get Bidze Ladefans laba Ankour. Nou la pou get ou Bidze pou fer sir ki Bidze i ganny servi byen. Ki *rate* ki ep ganny servi?

E Mr Chairman i enportan sa. ACCS i dir i a travay anba lenterferans, lesel dimoun ki koz lo ferm ACCS se Prezidan Larepublik, li menm ki'n koz lo la.

In koz lo la apre in retourn lo son parol, *ok?* Vis-Prezidan Afif ti *whistle blower* ki'n fer sorti lo sa 50 milyon, me li i pa al Ankour ditou li. So, nou ti a kontan konnen sa zafer lenterferans kote i pase sa. Si non ACCS, mon krwar pe ganny servi pou manipil bann oponan politik Gouvernman. Se sa ki pe arive Mr Chairman.

(Interruptions)

MR SPEAKER

Mersi Onorab. Bon, *ok. Commissioner*, mon'n tann repet en kestyon lo *rate*? Ou lib pou ou donn leklersisman si ou annan, nou ava aksepte ou repons.

COMMISSIONER ANTI-CORRUPTION MAY DE SILVA

Mersi Mr Speaker. Nou pa peye zot akomodasyon. Pa nou ki peye. Nou donn zot, zot larzan zot deside kote zot al reste. Non-non-non mon krwar ou bezwen - Onorab mon krwar ou bezwen kler ki ler ou sonn en dimoun son *per diem* ou donn li son *per diem* i deside ki bor i pou reste.

Nou, nou pa pey zot akomodasyon, la zot larzan al rod ou loto lwe, al rod ou akomodasyon, zot ganny zot *expenses*. Apre zot ganny zot *fees*. Zot ki deside kote zot al reste. Pa nou ki pey akomodasyon, zot ganny zot *per diem*.

Zot *per diem* i menm *rate* avek *FCDO*. *In fact*, letan ou regard sa bann *rate* per diem ki nou, nou donn zot anba *PSO* 2018, i annan en *per diem* ki ou donn *foreign consultant*, *ok?* Sa i 250 i ganny apepre £250 par zour, *ok?*

Si ou pe kalkil lo sa ki *PSB* i donner dan *PSO* 2018, *ok?* Nou pa donn plis ki 300 mil, 300 par zour lo zot *per diem*, zot *expenses*. E nou, nou'n kalkile nou donn zot en *monthly rate*. Nou'n re negosye zot kontra, *ok?*

E mwan mon krwar i *value for money*. Si en dimoun, pa tou

ki reste *Eden Island*. Si en dimoun i reste Beau Vallon, i reste Anse Aux Pins, i reste Cascade sa i zot desizyon.

Nou, nou donn zot en larzan, zot ki deside kote zot reste epi zot lwe zot prop loto. Mersi.

MR SPEAKER

Mersi. Kestyon Onorab Naidu.

HON SEBASTIEN PILLAY

(Off-mic)

MR SPEAKER

Kestyon Onorab Naidu.

HON SATHYA NAIDU

Mersi Mr Chair. Bonzour May de Silva ansanm avek son lekip kot ACCS. Mon war li en pe drol, Onorab Pillay dan sa Lasanble ti'n dir ki i pou ede pou retrouv sa 50 milyon, selman ozordi se li ki pe met bar dan larou ACCS!

(Interruptions and comments off-mic)

MR SPEAKER

Bon, pa... les....

HON SEBASTIEN PILLAY

(Off-mic)

MR SPEAKER

Les Onorab Pillay 2 kote. Prosed,

(Interruptions and comments off-mic)

MR SPEAKER

Order! Order! Order! Order silvouple! Onorab Pillay, ou nonm non lezot Manm toultan. Mersi. *(Gavel sound)* silvouple!

(comments off-mic)

MR SPEAKER

Nou pou gard sa sesyon annord avek korperasyon bann Manm. Onorab Naidu, ou pwen lo Bidze.

HON SATHYA NAIDU

Wi. Zisteman lo Bidze avek sa ki ACCS pe resevwar, ki vin en pwen kon tansyon ozordi, avek dan Lasanble, Mon oule fer resorti sa pwen, poudir ozordi ACCS ler ou regard li, malgre ki i annan bann diferan ka ki zot pe *deal* avek, zot ganny asosye avek sa ka san al an detay ka \$50 milyon.

Ozordi zour letan dimoun i war nouvel, tanzantan zot war ki sa ka i vin devan dan nouvel. E pep Seselwa i annan en lekspektasyon poudir ki nou pou ariv ver son finalite, son konklizyon.

Mwan mon oule ganny leksplikasyon lo konpleksite sa ka. Pa neserman pou al an detay, me selman pou nou pep ganny konprenezon poudir ki, i pou pran en pe letan pou nou kapab vwar sa rezilta ki nou tou nou pe atann. Mersi.

MR SPEAKER

Mersi. Ou pe demann kestyon lo en ka. E *Commissioner* i konnen son responsabilite. E donk, mon les larepons pou li.

COMMISSIONER ANTI-CORRUPTION MAY DE SILVA

Lo ka *timetable* Ankour, i annan en dele avek sa *case*, nou *case* pou nou. Akoz i annan en ka zarm ki'n pas avan pou nou. Me selman nou annan 26 ziridiksyon ki nou'n demande pou nou ganny lasistans, kot nou bezwen travay lo en bann dokiman finansyel ki annan pres 20 an ki nou bezwen get sa bann lenformasyon.

So, i annan en kantite. I annan en kantite dokiman pou regarde, i annan en kantite analiz pou fer - i konpleks. Me sa i dan tou ka finansyel. *Case* krim finansyel. I pa zis sa ka. E sanmenm sa travay parey mon pe dir i annan enn ki nou'n bezwen fer en *task force internally*, ki pou nou kapab ganny sa lasistans.

Bann lezot lenstitisyon isi. E nou servi zot tou fason dan bann gran ka. E i konpleks wi, ou bouz en larzan la mon anvoy li dan 26 ziridiksyon. Prezan ou bezwen travay dan legal, kad legal sa bann ziridiksyon.

Ou annan ou *mutual legal assistance* ki ou bezwen demande, ou bezwen espere. Me ler tou sa lenformasyon i arive, lekel ki pou analize? Ou bezwen ou spesyalis pou analiz sa bann lenformasyon. Wi, i pran en ta letan. E sa i an deor nou kontrol. Mersi.

MR SPEAKER

Mersi. Onorab Herminie.

HON WILBERT HERMINIE

Mersi Mr Speaker. Mr Speaker, mon kestyon i senp mwan. I annan en keksoz ki nou pa asire e nou pa pe sir lo la, la. Eski devan Lakour *as it stands now*, i annan en *case* 50 milyon devan Lakour? Akoz Komisyoner i fek dir nou ki lannen prosenn ki zot pou anmennen.

Mwan mon ti anvi konnen, eski i annan en *case* 50 milyon ki pe ganny prosekite devan Lakour. Akoz nou pe sey gete si nou pe ganny *value for money*, akoz ou pe dir nou £250 pe ganny depanse par zour, nou pe

sey gete si i annan *value for money* la.

Akoz nou pa pe ganny sa *fixed figure* ki sa bann konsiltan pe gannyen, pou nou kapab fer en balans ki nou pou konnen si nou pe depans larzan Seselwa byen. Nou anvi konn *the real figure*. Mersi.

MR SPEAKER

Mersi. Bon, keston, eski i annan sa *case* Ankour *Commissioner*?

COMMISSIONER ANTI-CORRUPTION MAY DE SILVA

Wi, i annan en *case* Ankour pou sa 50 milyon. Epi mon'n fini eksplike lo bann *expenses* ki bann konsiltan i gannyen. Mersi.

MR SPEAKER

Mersi. Onorab Uranie.

HON ROCKY URANIE

Mersi Mr Speaker. Mr Speaker, mwan mon konmsi mon pa pe satisfè ditou avek performans ACCS. Konmsi pou mwan, mon war ki nou pe donn li en ta larzan nou pe sipòrt zot, me selman nou pa pe war rezilta.

E tousala pe zis lo petet. E pou mwan mon war ki *taxpayers money* la, pa pe byen ganny servi, an vi ki nou pa pe ganny bann larepons konkret ki

nou bezwen kot i konsern tou sa larzan. Zis parey pou rebran keston *LOTO*.

Konbyen ki nou pe pey sa bann etranze konpare avek bann Seselwa? Tou sa letan zot la, zot pa ankor kapab fer naryen pou ede ki nou ganny bann Seselwa ki kapab fer sa bann investigasyon.

Swa mon ti a kontan petet zot donn nou bann *breakdown* sa bann larzan ki nou pe depanse byen avek sa bann etranze silvouple. Pou Seselwa kapab *at least* kler kote tou sa larzan pe ale, si vreman nou pou war en solisyon final an servan tou sa larzan nou pe donn zot.

Akoz lannen prosenn pou annan ankor larzan ki zot pou demande. Mersi.

MR SPEAKER

Mersi Onorab. Onorab, ou pwen in ganny note. Kestyon ki ou'n azoute in fini ganny *deal* avek detrwa fwa. Onorab Loze.

HON JOHAN LOZE

Mersi Mr Speaker. Mr Speaker, les mwan sey senplifye keston dan en lot fason. Akoz nou pa pe gannyen okenn sif la. Ki poursantaz ou *cumulative budget* depi 2020, ki'n ganny servi pou pey *fees, expenses, salaries* sa bann etranze? Ki

poursantaz ou Bidze dan sa dernyen 3 an ki'n kit Sesel dan pos etranze? Sa nou anvi konnen. Mersi Mr Speaker.

MR SPEAKER

Mersi. *Commissioner*, si ou annan en poursantaz.

COMMISSIONER ANTI-CORRUPTION MAY DE SILVA

Mon ava anvoy sa *breakdown* kot *FPAC*. Selman ler nou pey nou bann etranze, zot reste la zot depans en bon pe zot larzan isi, akoz zot reste *on island*. Mersi.

HON JOHAN LOZE

(Off-mic)

MR SPEAKER

Mersi. In dir i napa sa sif pou lemoman, sa poursantaz. Onorab Henrie.

HON GERVAIS HENRIE

Mersi Mr Speaker. Mon kestyon mon pou retourn ankor lo latap performans. Latap performans ki mon'n demann en kestyon taler. Dabor, mon ankor pe esper *Leader* Lopozisyon fer retournen sa 50 milyon parey i ti pe dir.

Me lo latap performans mon ti a kontan demann avek ACCS, si i kapab met en lo latap....

(Interruptions and comments off-mic)

MR SPEAKER

Order! Onorab Pillay, gard lord silvouple. Onorab Henrie, tou bann Manm. Tou bann Manm silvouple evite fer referans lo bann Manm lo lezot Manm lot kote latap oubyen lo zot kote. Onorab Henrie, ki ou pwen?

HON GERVAIS HENRIE

Wi. Mr Speaker, mon pe demann ACCS, pou met en edikater lo la pou fer en travay avek Lopozisyon. Akoz i kler ki zot pa kontan ACCS e zot pa kontan travay ki ACCS pe fer, pou lager kont koripsyon dan nou pei. Akoz tou zot kestyon depi bomaten se pou *discredit* ACCS dan lizye piblik.

E se sa ki mon ti pe dir zot bomaten. I enportan, si zot perdi konfyans piblik ki i target Lopozisyon, zot travay pa pou abouti dan naryen. E i kler ki zot pe fer depi bomaten. Mersi Mr Chair.

MR SPEAKER

Mersi.

(Interruptions and comments off-mic)

MR SPEAKER

*Order! Order! Bon, Order! Bon, nou'n fini. Nou'n fini konsider bann dezyenm kestyon. Alor mon napa lot Manm lo lalis pou dezyenm kestyon. Nou a vot lo Bidze pou *Anti-Corruption Commission* ki lo paz 135 ziska 140, pou en total R75 milyon 719 mil.*

Manm ki an faver lev lanmen silvouple? Mersi. Manm ki kont? Manm ki kont? Ok. Mersi.

Tou Manm.

(Interruptions and comments off-mic)

MR SPEAKER

*Silans! (Gavel sound) vot pou Bidze *Anti-Corruption Commission* pou en total R75 milyon 719 mil, 22 Manm in vot pour, 10 kont, 0 abstansyon. Vot in aprouve par Lasanble.*

*Bon, mon krwar i pa pou tro vo lapenn komans lo Bidze *Department of Climate Change* la. Nou a esper son ler apropiye. Nou a pran poz, Lasanble a rebran 11er. Mersi.*

(BREAK)

DEPARTMENT OF CLIMATE CHANGE & DEPARTMENT OF ENVIRONMENT**MR SPEAKER**

*Madanm raporter i ava apel Minis ek son delegasyon silvouple. Bonzour Minis pour Lagrikiltir, Sanzman Klima e Lanvironnman Flavien Joubert. E bonzour Mr Tony Imaduwa Sekreter Prensipal pou Sanzman Klima; Mr Denis Matatiken Sekreter Prensipal pou Lanvironnman e Mrs Marie-Claude Labonte *Financial Controller* pou sa Minister.*

*Nou pou pran Bidze *Department of Climate Change and Department of Environment*, ki lo paz 457 ziska 467. E son total i R99 milyon 230 mil. Minis i a fer son prezantasyon, lo sa Bidze.*

MINISTER FLAVIEN JOUBERT

Bonzour Mr Speaker. Bonzour bann Manm Lasanble ki la ozordi bomaten. Bonzour bann dimoun ki pe ekout nou ozordi bomaten. Mr Speaker, mon ti a kontan komanse par pas en pti pe lo revi bann keksoz ki nou'n fer en pe dan sa lannen 2023.

E apre sa mon pou pas lo bann detay Bidze pou sa 2 departman anba nou Minister. Pou komanse, mon ava dir ki dan sa lannen ki'n pase 2023, nou'n arive fer en bon pe bann keksoz ki ti lo nou plan, pou

nou fer sir ki nou konsolid Minister e nou met an plas bann sistenm pou li fonksyon pli byen, e delivre pli byen dan son bann rol.

Enn bann keksoz ki nou'n fer, se plis kordinasyon ant bann diferan departman. Nou konnen poudir nou annan 3 departman ki'n ganny met ansanm, Lanvironnman, Klima, e Lagrikiltir. E ozordi nou war ki nou pe kapab fonksyon tre byen. Nou'n fer bokou bann travay ansanm konzwent.

E par egzanp Onorab Roucou, Lagrikiltir ki'n zwenn ansanm avek Lanvironnman nou'n fer bann travay dan kominote. Nou'n osi annan bann sipor ki nou'n anmenn direkteman dan bann aktivite ki nou'n fer.

Par egzanp nou'n siport aktivite Lagrikiltir atraver bann resours ki egziste, ki'n ganny anmennen atraver bann demars ki lanvironnman in fer.

Nou'n kapab travay lo bann proze ansanm, bann proze konzwent - sirtou bann kot nou konnen lagrikiltir i mank resours.

Par egzanp, nou'n *secure* larzan atraver bann fon ki administre par *UNDP*, pou nou siport Lekol Lagrikiltir, Lekol *SIAH*.

E nou'n anmenn en proze pou bann fermye Praslin atraver *International Solar Alliance*, kot nou'n kapab met an plas en *cold store*, ki en proze tipikman klima. Me selman nou'n fer sir ki i benefisye lagrikiltir. E i annan lezot demann ki nou pe fer pou fer ankor, pou nou anmenn ankor lenerzi renouvlab dan lagrikiltir.

E pou premye fwa, nou pou fer en proze e nou'n fini konfirm sa nou fer proze konzwent anba *GF 8* ant *FAO* ek *UNDP*, kot nou pou anmenn en bon pe resours dan sa lokasyon ki Sesel, i gannyen pou bann proze lanvironnman dan lagrikiltir. Nou ekspekte ki apepre en tyer larzan ki pou ganny donner, i pou al anver bann proze ki viz lagrikiltir.

Nou'n kapab etabli serten bann morso dan Minister ki nou ti bezwen, pou nou fer fonksyonnen. Nou annan *Program Development and Coordination Section* ki ranplas *PCU* ki ti egziste avan, ki ti pe ganny kordinen par *UNDP*.

Ki prezan i en *unit* ki debout lo li menm. E ki pe ganny finanse - son *core* pe ganny finanse par resours Minister. E in an plas depi Mars sa lannen.

E sa i pe ed nou bokou lo kote administrasyon bann proze. Nou annan sa *unit* ki pou fer ladministrasyon *Marine Special Plan*, ki aktyelman in antre an plas sa mwan la.

E nou pe fer sir ki nou pou kapab konstri sa lebra Minister pou ki nou kapab delivre lo bann komitman - komitman ki Sesel i annan pou etabli sa bann striktir lo kote konservasyon lamarin.

E nou osi ekspekte ki nou kapab ganny benefis dan lefitir avek bann *partners*, pou nou vreman travay lo laform nou Minister, pou ki i kapab pli byen delivre lo son manda. Me osi pou li kapab zwenn sa target ki Gouvernman in donn nou, pou nou kre en lazans ki pou annan pou bi proteksyon lanvironnman.

Nou annan bann finansman adisyonnèl ek bann proze ki nou'n kapab *secure* sa lannen. Par egzanp nou annan *chemicals and wastes*. E nou'n ganny sipor teknik sa lannen avek *Commonwealth* pou nou fer *climate finance*.

Nou'n ganny sipor avek *World Bank*, avek *AFDB*, avek Lenn. E sa in permet nou pou fer plizyer travay e nou'n vin isi Lasanble Nasyonal, pou nou travay lo bann Lalwa, ki nou met an plas; par egzanp Lalwa

lo konservasyon e Lalwa lo bann *utilities* ek lo lenerzi.

E osi bann nouvo *policies* ki nou kapab met an plas lo *wastes* ek polisyon. Nou'n kapab arive met an plas *public education officers* dan tou departman. Mon krwar i en demann ki Lasanble in deza fer avek nou. Tou nou bann departman zot annan zot bann *public education officer*.

E zot pe travay konzwentman avek mon biro. Nou dimoun ki annan kot mon biro, pou nou kapab fer sir ki nou annan en program konpreansiv pou adres *public education and outreach* dan Minister antye.

E aktyelman la, enn bann latas ki nou le fer avan lafen lannen se met an plas nou *website*, pou ki nou kapab vreman annan sa koneksyon avek piblik.

I annan en lot travay ki sa bann dimoun pe fer, se pou travay *under* Gouvernman pou fer bann program pou nou target lenerzi, delo ek salte dan tou bann biro Gouvernman.

E mon ti a voudre ki sa i vin en realite an 2024. Kot tou bann antite Gouvernman, parey Lasanble Nasyonal in demontre, zot pe port latansyon lo lafason zot perform, kot i konsern sirtou lenerzi, sirtou lo

konsonmasyon delo. E sirtou lo sa ki zot fer ek zot salte.

Strategic planning process in kapab ganny konplete dan tou le trwa departman. E nou'n ganny sipor avek serten lorganizasyon parey Liniversite *Zurich* ek *UN*. E nou ekspekte ki tou bann dimoun pou travay anba en *strategic plan* prezan, ki fer ki nou kapab plan pli byen e fer ki nou pli kler lo sa ki nou pe fer.

Nou'n kapab *roll out* dan 2 departman dan 3, sa i Departman Sanzman Klima ek Lanvironnman, nou sistenm *RBM* ek tou nou bann fonksyon *monitoring* nou'n met an plas e tou dimoun in fini sir zot kontra performans.

E *Meteo* ki en antite anba nou Minister, pe ganny servi koman en referans, e en legzanp par *PSB* pou montre ki mannyer nou kapab met an plas bann sistenm parey.

E ozordi la latas ki reste nou, se pou nou fer sir ki sa sistenm i ganny met an plas dan Departman Lagrikiltir. I annan serten bout ki'n pare, serten bout pa ankor pare. E nou pe travay avek zot pou fer sir ki nou kapab met an plas *full* sistenm *RBM* dan Minister antye.

Nou'n fer kantite verifikasyon. Nou'n servi

Internal Audit. Nou'n verifye par egzanp *Vet Services* lafason ki zot fonksyonnen. *NBA revenue* lafason ki zot fonksyonnen. *Management* later e tousala i bann rapor ki *Internal Audit* in soumet avek nou.

E sa i avek bi pou nou amelyor fonksyonman e pou nou detekte bann defo ki annan dan sistenm.

E tousala i sipoze ganny konplete par lafen lannen. E osi aktyelman la nou pe fer *internal audit* verifye nou bann *Recycling Schemes*. E osi *external audit* si mon rapel byen, pe al dan bann *subsidies* ki'n ganny donnen pou *animal feed* ziska ozordi, pou nou get byen ki mannyer sa sistenm i fonksyonnen.

E kwa ki ti merit gannyan osi ki bann keksoz ki merit ganny korize dan lefitir, dan bann *scheme* parey. Lot keksoz i se ki, nou'n kapab re etabli Lekol *SIAH*, Lekol Lagrikiltir. E nou'n kapab fer premye faz renovasyon.

E nou'n kapab tonm dakor avek Minister Ledikasyon lafason pou nou administre sa lekol. E nou ekspekte ki 2024 i pou annan keksoz ki pou ganny, i pou annan mouvman ki pou ganny fer pou ki bann etidyan i retourn laba antyerman. E nou kapab vwar

en lekol ki fonksyonnen tre byen.

Bann *challenges* Mr Speaker, nou annan kapasite ki reste koman en *challenge* enportan, pou nou bann dimoun kapab fer zot louvraz. I mank nou kapasite dan Minister, menm si i annan kantite dimoun pa toultan ki nou annan la kalite dimoun.

E nou ti a voudre annan plis avek sa kalite lekspertiz korek, pou nou kapab met an plas pou nou bann sistenm fonksyonman.

E donn sipor bann ki bezwen sipor pou nou kapab fer avanse azanda lanvironnman dan pei. Nou annan bann *challenge* ki pe leve la ozordi kot i konsern klima, e resaman nou'n war poudir par egzanp linondasyon lo bann lakot ek bann problem ki nou pe gannyen lo lakot partou, i komans vin pli sever.

E sa i en keksoz ki pe met en kantite presyon lo nou Minister. Nou bezwen reakte, e anmenn bann solisyon pou sa bann problem. E osi nou annan evolisyon bann kondisyon ekonomik ek bann lezot kondisyon, sorti leksteryer ki pe met lo nou bann presyon.

Par egzanp lo kote lafason ki nou zer bann resours, lafason ki nou prodwir lenerzi,

lafason ki nou prodwir manze dan pei.

Mr Speaker, prezan mon pou al lo Bidze ki'n ganny propoze pou sa 2 departman. Pou Departman Sanzman Klima ek Departman Lanvironnman, i annan en Bidze ki'n ganny propoze pou R99.230 milyon pou lannen 2024. E sa i en rediksyon 32.980 milyon konpare avek 2023.

Sa rediksyon i annan pou fer avek proze ki'n ganny plase dan 2023. E ki aktyelman pou ganny kontinyen demare an 2023 e ki pa'n ganny enkli dan Bidze ozordi.

Me selman nou konnen ki sa bann proze pe kontinyen e zot pou *roll over* 2024 pou zot ganny kontinyen ganny fer. Savedir sa Bidze i la, me i pa pe ganny enkli dan sa *write-up* pou 2024.

Wages and salaries, in ogmante par 1.658 milyon. I annan en *new spending proposal* pou kreasyon en pos pou *legal officer*. E sa pe ganny fer Mr Speaker, pou nou kapab amelyor nou performans lo *enforcement and compliance*, i zis en zofisye ozordi ki pe deservi 3 departman.

E nou annan en kantite bezwen pou bann servis, parey analiz legal, ki nou pe ganny en

kantite difikilte avek. Nou annan *scheme of service* ki i pou ganny R71.8000 mil pou enplimante. E nou annan osi transfer *cleaner* sorti kot *Cleaners Corporative* pou vin avek Minister. E osi 10poursan logmantasyon san saler.

Goods and services i ogmante par 36.775 milyon. E sa i akoz bann *grant* ki dan son natir i *recurrent*, in ganny mete dan *goods and services*. Savedir i pa neserman ki nou pe anmenn plis Bidze dan sa bout. Me akoz i annan en mouvman dan lafason ki bann dokiman, bann *grant* i ganny poste.

Non-financial assets, i 4.1 milyon. Nou annan en lalis proze ki bann pti, pti proze. Me aktyelman Mr Speaker, zis pou fer rapel, ki nou annan en kantite bann gro, gro proze ki ankor dan faz diskisyon. E ki nou ekspekte ki dan sa lannen ki pe vini, zot pou aktyelman monte koman bann proze ki nou pou met devan.

Akoz sirtou, prenon kont ki nou annan en kantite irzans ki pe leve la ozordi, e ki nou bezwen kontinyen met an plas bann provizyon pou sa bann proze.

Alor sa sonm 4.1 milyon i la pou kouver bann proze ki deza asire, ki deza konfirman. Me i annan plizyer lezot proze ki

pou antre dan lannen, sirtou bann ki pou adres bann irzans ki pe arive la. E letan bann diskisyon i ganny konklir lo sa bann problem ki pe arive. Mersi Mr Speaker.

MR SPEAKER

Mersi Minis pou prezantasyon. Nou a pran lentervansyon bann Manm. Nou a kontinyen avek pratik en kestyon pou premye *round*. Pa bliye zot annan posibilite pou en dezyenm kestyon, de ki nou'n fer en premye tour. Nou a komans avek Onorab Philip Arissol.

HON PHILLIP ARISSOL

Mersi Mr Speaker. Mr Chair, bonzour. Minis avek ou delegasyon tou lezot koleg Onorab. Minis dan *current challenges*, mon war i annan *point* dernyen i annan "*increased number of intense storm surges, rainfall causes more flash floods an incidence of coastal erosion*".

Mon ti a kontan demande, osi si zot pe pran kont pou vwar bann lerozyon koze par larivyer e osi lanmar dan bann landrwa? Mersi.

MR SPEAKER

Mersi. Minis?

**MINISTER FLAVIEN
JOUBERT**

Mersi Mr Speaker. Mersi Onorab. Mr Speaker, byensir parey mon'n fer kler i annan plizyer bann priyorite ki pe monte enn lo lot. Me nou kontinyen gard en lizye lo tou bann problem kot pe arive. Aktyelman i annan en group ki pe *focus* dan en fason entans lo tou bann keksoz ki annan pou fer avek inondasyon, lerozyon.

E toulezour i annan enteraksyon ki pe ganny fer ant nou Minister, Minister Later ek Lenfrastriktir ek bann lezot lazans ki annan pou fer avek sa bann size.

Alor, mon oule reasir Onorab ki i annan latansyon ki pe ganny donner e kot i annan bann problem dan bann distrik, i annan posibilite pou nou fer entervansyon. Me aktyelman keksoz pe kontinyen. Mersi.

MR SPEAKER

Mersi. Onorab Roucou?

HON MICHEL ROUCOU

Mersi Mr Speaker. Bonzour Minis. Bonzour tou dimoun ki a lekout. Minis, mon war poudir se ki anba *non-financial asset* la i annan pou 2024 i annan 4.107 milyon. E ti annan bann vizit ki nou'n fer dan mon

distrik, kot ti annan bann komitman lo kote bann travay ki pou ganny fer.

Parey nou konnen i annan Ile Aux Cerf ki annan degradasyon lans, Basen Larme li menm li. E osi nou annan kot lafanmir Gilly Chang-Waye kot laboutik Way-Hive la ki tanzantan i annan sa *flooding* la. Si ou ti kapab dir nou dan sa Bidze, si i annan larzan ki pou fer sa bann proze, oubyen kan ki ou ekspekte bann proze pou demare? Mersi.

MR SPEAKER

Mersi. Minis?

**MINISTER FLAVIEN
JOUBERT**

Mersi Mr Speaker. Mon pou reponn zis en pti bout lo sa kestyon. Mr Speaker, kot i konsern kot sa landrwa Mont Fleuri o bor laboutik, mon konnen ki poudir Minister Later in donn nou en *update*. Lazans Lenfrastriktir in donn en *update* sa semenn. E i annan demars ki pe aktyelman an mars la, aktyelman an kour ki pou fasilite enplimantasyon sa proze.

Pou Ile Aux Cerf avek Basen Larme, *desilting* mon a pas avek PS Imaduwa. *Thank you*.

MR SPEAKER

PS, ou a pran laparol?

PS TONY IMADUWA

Mersi Minis. Pou Ile Aux Cerf parey ou okouran Onorab, nou ti pe diskite pandan lannen lo kote ki mannyer nou pou entervenir lo kote Ile Aux Cerf. E en keksoz ki nou ti fer, nou ti releve pou se ki nou pou bezwen fer en proper *analysis and* resers.

Nou'n fini fer sa *analysis*, rapor in ganny *submit* kot nou e nou'n revwar. E nou lofis in pe lyez avek ou lofis, pou nou kapab organiz en vizit lo zil, en lot *meeting* pou *meet* avek sa bann zabitan, *ok?* Pou nou kapab prezant rezilta sa letid ki nou'n fer. E osi nou'n prepar en gid pou bann zabitan Ile Aux Cerf.

Parey ou konnen, en bon pe zot pe apros ou pou demande si zot kapab fer isi, si zot kapab fer laba pou protez zot propriyete. E sa gid li i pou ed zot kwa ki zot devret pe fer, e kwa ki zot pa devret pe fer, *in terms of* protez zot propriyete ki vir ek lanmer.

So, nou ava diskite plis lo la, pou nou kapab etablir e dat ki nou kapab retourn lo zil e prezant rezilta sa letid teknik ki nou'n fer pou Ile Aux Cerf.

MR SPEAKER

Mersi PS. Onorab Aglae.

HON EGBERT AGLAE

Mersi Mr speaker. Bonzour Minis, PS, *the whole delegation itself*. Minis mon oule get anba PSIP la, en referans avek sa *construction of breakwater for* Port Glaud, *ok?* Mon oule konnen, akoz 2 lannen konsekitiv nou'n met larzan proze pa'n materyalize. E la ou'n met R1.58 milyon.

Si ou kapab donn mwan detay premyerman ki *scope* sa proze? Akoz mon konpran ki i annan bann serten sanzman azisteman ki'n ganny fer. E kan ki nou mazine petet *tender* prosedir ava ganny fer pou sa proze lannen prosenn? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Tre vit. Sa proze in deza annan en *design* preliminar, me i annan serten azisteman ki nou bezwen ganny fer avek sa *design*. I annan 2 konponan; en konponan i annan pou fer avek semen li menm li ater kot ou bezwen ranforsi son lipye ek lafason ki laroul i vin tap avek.

E lot konponan i annan pou fer avek en striktir pli deor dan lanmer, pou anpes gro laroul vin ariv ater. Sel keksoz ki manke aktyelman pou fini fer *design*, se en *bathymetry study*.

Savedir en letid lo profonder lanmer. E sa Lazans Lenfrastriktir zot in dir mwan zot in deza demar sa travay. E de ki sa i antre, mon ekspekte ki nou kapab al lo *final design* e *tendering* pou sa proze.

Me mon ava donn ou en *update* letan mon ganny lenformasyon avek Lazans Lenfrastriktir. Me zis pou reasir ou Onorab ki i annan travay pe ganny fer pou ariv lo sa pwen, kot ou kapab *tender* e antre avek sa proze. Mersi.

MR SPEAKER

Mersi. *Ok*. Wi, ou annan pwen ki ou oule klarifye? Wi?

HON EGBERT AGLAE

Minis mersi pou ou larepons. Vi ki i annan sa 2 bout, i annan en konsern delo sale avek konsern sa semen li menm. Lekel ki zot pou al avan? Akoz mon konpran poudir zot pe mazin fer semen avan apre pou get sa bout konponan *breakwater*.

MR SPEAKER

Mersi. Nou a ganny klarifikasyon?

MINISTER FLAVIEN JOUBERT

Mr Speaker, sa proze i sipoze koman en proze ki pou annan en konponan ater ek en konponan dan lanmer. Alors akoz menm sa lipye sa semen, i pou bezwen osi annan en bout ki annan ki servi ros eksetera, eksetera. Alor, i pou menm kontrakter ki pou fer 2 morso louvraz. Mersi.

MR SPEAKER

Mersi. Onorab Samynadin?

HON KELLY SAMYNADIN

Mersi Mr Chair. Bonzour Minis avek ou delegasyon. Minis, mon ti ava kontan konnen ki progre i annan sirtou atraver sa Bidze, an sa ki konsern planifikasyon lo proze Lakot Les Mahe, sirtou dan Distrik Au Cap.

An vi ki sa sityasyon lerozyon pe vin pli pir, kot nou pe war disab pe kontinyelman mont lo semen; miray pe degrade lo lakot. E menm sityasyon kot semen pe defonse.

So, mon ti ava kontan konnen ki progre i annan dan bann diskisyon an sa ki konsern sa proze? Mersi.

MR SPEAKER

Mersi Onorab. *Panel*, Minis, i ava endike lekel ki pou ...?

MINISTER **FLAVIEN**
JOUBERT

Mersi Mr Speaker. Mersi Onorab. Mr Speaker, sa travay in deza komanse. *SLTA* i aktyelman in soumet avek mwan. Mon'n war en kopi rapor ki'n antre dan sa semenn, ki montre 33 sit ki bezwen fer entervansyon irzan pou kapab koriz bann problem ek semen.

E sa i en keksoz ki nou an diskisyon avek Minister Transpor. Mon ti a voudre i ganny fer la aktyelman. Akoz sankwa nou pou annan bann problem kot sirkilasyon pou ganny koupe.

Me dan pli *long term*, i annan en lot morso ki nou bezwen fer se nou bezwen *design* bann striktir, an deor semen pou nou anpes laroul ariv anndan lo lakot. E ki nou war i pe vin deplizanpli grav.

E sa nou pe ganny lasistans, avek en lekip. Me nou pa ancor kapab konfirmen kan egzaktaman sa bann *design*, sa bann striktir pou ganny fer. Parey nou konnen i annan *design* preliminar ki'n deza ganny fer pou Au Cap. Me nou bezwen en *design* final ki nou kapab donn en kontrakter pou li donn nou kotasyon.

Nou'n idantifye kontrakter, nou'n idantifye ki kalite materyo ki nou kapab servi. Me nou bezwen asire ki sa *design* ki nou pe fer, i pa pou koz plis problem lo lakot e olye ki rezourd problem.

Alor i annan en pti gin letan la pou nou fer sa travay *final design*, baze lo bann lenformasyon ki nou annan e apre nou a bouz devan avek bann striktir pli an deor.

Me i annan travay ki pou ganny fer imedyatman lo semen. E parey mon'n dir, *SLTA* in fini idantifye plizyer sit kot i annan problem. E i pou bezwen entervenir deswit lo sa bann landrwa. Mersi.

MR SPEAKER

Mersi. Onorab Esparon.

HON REGINA ESPARON

Mersi Mr Speaker. Bonzour Minis ek ou delegasyon. Mr Speaker, permet mwan demann avek Ms Tamatave pou eklersi en pti keksoz la, ki mon pa konnen si i en lerer avan mon demann mon kestyon.

Anba *grant*, lo paz 3 i annan 3 *head* la. *Protocol Montreal e implementation plan*. I deza annan en sif pou 2024 ki'n mete R2 milyon 891 mil. Prezan mon vwar letan mon pe al lo *non-financial assets* la, sa

3 *heads* i reaparet ankor anba avek en lot sif. Mon pa konnen si i en lerer. Petet ou ava kapab klarifye sa a lafen.

Mr Speaker prezan mon kestyon. Sa mon ti pe zis demann en klarifikasyon pou li rektifye en... mon krwar i en *typing error*.

MR SPEAKER

Anyway, Ms Tamatave i kapab etidye sa. Ou kapab demann ou kestyon aprezan.

HON REGINA ESPARON

Mon kestyon Mr Speaker, letan mon pe regard anba *non-financial assets* ankor Minis, mon vwar i annan en R700 mil pou *Carana Drainage*. Prenon kont ki mon pa konnen si sanmenm sa larzan ki'n ganny mete pou nou rektifye sa problemm delo monte dan plato North East Point, ki mon mazen son sif ti nou ti prozekte bokou pli o.

Parski nou annan sa problemm *flood* dan plato North East Point, ki kontinyelman vin en problemm. E nou ti'n fer plan - ansanm avek Minis nou ti'n vizite - kot nou ti pou met en pli gro *culvert* la kot *Rehab Centre* pou kapab tir sa delo lo sa kote.

Epi pou elarzi sa *culvert* ki dan plato kot lopital li menm, pou fer ki nou annan nou 2

outlet pou delo; ki anpese ki sa bann dimoun ki reste dan plato kot bann Godley la, ki zot ganny *flood* sa fwa ki lapli i tonbe. En pti leksplikasyon Minis. Mersi.

MR SPEAKER

Mersi. Minis?

MINISTER

FLAVIEN

JOUBERT

Mr Speaker, mon pou pas sa kestyon avek *PS Imaduwa*.

PS TONY IMADUWA

Mersi Minis. Mersi Onorab, pou ou kestyon. Wi, i pou adres sa *issue flooding* Carana. E parey ou dir i annan letid ki pe ganny fer, pou revwar en lot *outlet* ki pas o bor la kot rehab. Akoz sa enn ki deza egziste lo kote lo bout *Rehab* la, nou krwar i bouse. Akoz i pas anba semen.

E nou pe al grandi *even* lo zot *outlet down* kot *Old Peoples' Homes* la kot lopital i ete. Apre i annan louveraz pe ganny fer *even* kot sa *veeson* ki lot kote, ki nou pe ganny *issue* avek blokaz. So, i annan louveraz ki aktyelman pe fer lo sa *veeson* ki en pti gin pli ba ankor. So, tousala i ava ede pou retir en pe.

Issue avek Carana se ki i annan bokou delo ki akimile, i napa ase ki sorti. So, *that is*

why we get the flooding issue lo kote dan plato North East Point.

MR SPEAKER

Mersi PS. Onorab Lemiel.

HON SYLVANNE LEMIEL

Mersi Mr Chair. Bonzour Minis avek ou delegasyon. Minis, ou annan ou detrwa priyorite stratezik ki ou'n mete ki ou oule *achieve*, panda 2024 a 2026.

Me mon kestyon i se ki, ki ou pli gran priyorite stratezik pou lannen 2024, an sa ki konsern Departman Sanzman Klima avek Lanvironnman? E ki kantite larzan ou pe dedye dan ou Bidze, pou kapab *achieve* sa priyorite stratezik. Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, parey mon'n dir dan mon louvertir, enn bann gro priyorite ki nou annan dan nou departman se, son laform ek son kapasite pou li delivre lo son louvraz.

Alor i annan serten travay ki nou pe fer pou nou idantifye byen nou striktir ki mannyer i sipoze fonksyonnen.

E pou nou kapab fer sir ki nou annan dimoun apropiye

dan bann pozisyon apropiye, pou zot kapab fer fonksyonnen, sa bann travay ki zot sipoze pe fer. Mon krwar sa i enn bann keksoz ki vremen enportan. Apar bann lobligasyon teknik, ki nou bezwen delivre lo la, nou annan plizyer size dan pei ki nou bezwen *deal* avek.

Nou'n koz lo lerozyon lakot i enn. Nou annan nou leta lanvironnman teres i en lot. Nou annan bann size polisyon i en lot, me selman enn bann keksoz enportan se ki nou bezwen annan nou en departman ouswa en Minister ki delivre byen. E ki annan sa standar ek sa kapasite pou li kapab delivre lo son travay.

E mwan mon pou mwan lo kote resours, laplipar resours i annan pou fer avek bann *recruitment* ki nou pa pe ganny bokou. Me osi nou annan bann sipor ki nou kapab gannye par egzantp avek *ANHRD*, pou nou fer sir ki bokou nou bann dimoun i aktyelman al fer *training*.

E en lot keksoz ki mon pou dir lo kote nou kapasite Mr Speaker, i se ki nou pe osi sanz en pe nou fason ki nou get formasyon dan Minister. Akoz nou bezwen mazin formasyon ki donn konpetans, e non pa zis formasyon akoz i annan formasyon pou nou donn

dimoun ouswa. Ouswa akòz nou annan en *training plan*. Nou bezwen pe mazin konpetans.

E ozordi menm par egzanp nou annan *training* ki pe ganny fer la avek nou bann *staff* lo tretman *wastewater* direktman. Nou bezwen fer formasyon pou nou donn dimoun konpetans direk. E ki ed zot pou zot fer zot louvraz byen.

E se sa mon krwar i en keksoz ki i pa'n ase for dan nou Minister. E nou fer en kantite *training*, me selman nou pa war konpetans i monte.

Alor mwan pou mwan, sa i en priyorite enportan, ki pou ed nou prezan adres nou bann priyorite ki annan pou fer avek bann size teknik ki nou pe *deal* avek.

Me tan ki nou napa sa kapasite, pou nou vreman fer nou louvraz, mon pa krwar poudir nou pou kapab dir pou dir nou pe adres tel ou tel size dan pei.

E anplis ki sa parey mon'n eksplike, nou annan bann evalyasyon ki nou pe fer avek *audit* spesifikman pou nou konpran byen nou sistenm son bann defo ki i annan, pou nou kapab amelyor nou sistenm e fer ki aktyelman i fonksyonnen.

E non pa nou bann sistenm ki kontinyen donn nou probleman e nou pa zanmen *improve* lo la. Mersi.

MR SPEAKER

Mersi.

HON SYLVANNE LEMIEL

(Off-Mic)

MR SPEAKER

Sorry, ou annan en klarifikasyon? Si ou fer li bref.

HON SYLVANNE LEMIEL

Mr Speaker, mersi. *In terms of* monneter, ki kantite larzan pou ale anver sa ki ou'n eksplike la? Mersi. Si ou annan.

MR SPEAKER

Mersi. Minis, ou annan en sif?

MINISTER

FLAVIEN

JOUBERT

Ok. Mr Speaker, lo kote revè nou striktir, nou'n ganny diskisyon avek *UN*. Nou pe esper en konfirmasyon la. Nou'n ganny en diskisyon avek *regional coordinator* aktyelman *UN*, pou sipòrt nou pou fer bann revè fonksyonnel dan nou Minister. Sa i enn bann keksoz ki nou'n fer. E nou pe esper repons sorti kot zot.

Alors si nou ganny en sipòrt dan sa kote, nou pou

kapab fer sa revi fonksyon ek bann performans nou Minister bann diferan lebra ladan. Savedir i pa en keksoz ki pou annan en lenpak lo Bidze, aköz nou pe ekspekte nou kapab ganny resours an deor.

Kot i konsern formasyon, nou pou depan lo bann antite ki egziste par egzanj, *ANHRD* pou nou kapab fer sir ki nou met plis dimoun dan *training*. Apre nou annan bann *training plan*, ki i pa bokou.

E apre osi nou annan bokou posibilite pou nou fer formasyon anba bann *grant* ki nou pe gannyen deza. Par egzanj ou ava war ki par egzanj nou annan en proze ki apel *Ridge to Reef* ozordi, ki nou'n fer en kantite formasyon avek kantite dimoun partou.

Alor, nou servi sa bann mekanizm osi pou nou *build* kapasite dan nou Minister. San ki nou bezwen vin demann adisyonnèl resours dan nou Bidze, ki nou soumet avek Gouvernman, pou nou fer sa bann keksoz parey.

Gouvernman i ava sipòrt fonksyonman Minister, me nou pou nou avans pli devan, e fer sa bann demars ki nou bezwen, nou rod bann resours an deor. E nou fer ki nou kapab fer avanse keksoz dan nou Minister.

Alor mon napa okenn lenkyetid poudir pou mank resours pou nou fer sa bann demars. Lenportans se nou bezwen demar sa bann keksoz, ki fer li avanse. E resours i annan diferan landrwa kot nou kapab trouve e met li ansanm pou nou ganny ase, pou nou kouver sa bann bezwen. Mersi.

MR SPEAKER

Mersi Minis. Onorab Labonte.

HON ANDY LABONTE

Mersi Mr Chair. Bonzour Minis ek ou *panel*. Minis, premyerman mon anvi remersye ou pou sa proze ki'n komanse son dezyenm faz anler *Quincy*. Annefe mon kestyon i baze lo la menm. Kot nou dir li Proze *Fondamiere*, me selman i dezyenm faz *Quincy* Vilaz.

So, vi ki ti annan en retar pou komanse 2022, me 2023 nou'n war poudir in komanse i ti annan sa 967 mil an 2022 ki ou ti dir ek mwan, ou ti donn en konfirmasyon ki, an 2023 i pou ganny konsolide i pou vin avek sa 50 mil. E la mon war i annan sa lot 100 mil.

Eski i vèdir ki sa proze pou konplete 2024? E eski *tender* in komanse or i pou annan en lot *tender* ankor?

MR SPEAKER

Mersi. Minis? *Panel?*

MINISTER FLAVIEN JOUBERT

Mr Speaker, mon a pas avek *PS Imaduwa*. Mersi.

MR SPEAKER
PS?

PS TONY IMADUWA

Mersi Minis. Mersi Onorab pou ou kestyon. Lo kote Quincy proze in fini komanse, nou war apepre 85 pousan konplete. I annan zis en pti *issue* kot sa drenaz i pase, kot i annan en *issue* lo kote en *septic tank* ki dan *pathway* sa drenaz.

E i annan serten diskisyon ki pe ganny fer pou rektifye sa. So, nou kapab konplete, selman sa *allocated* i plis sa dernyen peyman pou sa. So, proze pros pou terminen, e nou ekspekte konplete *by* lannen prosenn.

MR SPEAKER
Mersi. Wi?

HON ANDY LABONTE

Mersi. Mon pou dir ou mersi ankor enn fwa, baze lo sa larepons ki ou'n donner, eski ou kapab *involve* nou ler i annan sa negosyasyon parey ki ou pe dir ki i annan en drenaz dan - ki pe kre en lenkonvenyans pou zot avek

sa... konmsi *involve District Authority*, enkli Lofis *MNA*. Mersi.

MR SPEAKER
Mersi. *PS?*

PS TONY IMADUWA

Yes, definitivman. E mon krwar i tre avanse diskisyon ki pe fer. E mon krwar nou'n agree lo kote *costing* ekstra. Me selman i tonm *within the budget* ki ti ganny *allocated*. E dapre mon bann *staff* in dir *hopefully* nou kapab konplete even sa lannen menm pou sa proze.

MR SPEAKER
Thank you. Onorab Larue?

HON FLORY LARUE

Bonzour Mr Chair. Bonzour *panel*. Mon ti a kontan demann kestyon apropo *Strategic Priorities 2024 to 2026* pwen limero 3, kot zot dir zot annan, zot pe met en stratezi an plas pou" *reduce threats leading to the loss of biodiversity.*"

E la spesifikman zot pe koz lo *invasive alien species*. Mon krwar zot pe koz lo bann lalyann anvaisan. Eski zot ti kapab dir nou konbyen larzan dan sa Bidze ki'n ganny mete pou komans sa program e *towards* sa *priority?*

E konbyen tan ki zot krwar an total i pou pran pou enplimante? E ki bann plan ki zot annan pou met an plas, ki sa lefe detri sa bann plant, i vin en keksoz ki sibstansyel, lo en nivo nasyonal? Mersi.

MR SPEAKER

Thank you. Minis, ler ou pare oubyen ou *panel*?

MINISTER FLAVIEN JOUBERT

Mr Speaker, mersi bokou Onorab pou sa pwen. Mr Speaker, mon pou pas sa pwen avek PS Matatiken pou li eksplik en pe, ki nou pou fer lo kote *invasive*.

Nou konnen ki i en keksoz ki i en konsern nasyonal. I annan serten demars ki'n komans fer, me nou krwar i bezwen ganny akselere. Alor mon ava pas avek PS Matatiken.

MR SPEAKER

PS, ou a kontinyen.

PS DENIS MATATIKEN

Mersi Mr Speaker, pou donn mwan loportinite pou laparol. Parey Onorab in mansyonnen, trwazyenm pwen i annan pou fer pou redwir bann sirtou bann lo kote bann diferan *threat* ki

annan pou fer avek biro diversite.

E parey ou'n mansyonnen poudir i *invasive species* i enn. Parey Minis osi in mansyonnen oparavan dan nou Bidze, akoz *usually* letan nou ganny Bidze nou annan en *ceiling* avek ki nou bezwen travay. Lo ki nou met tou nou priyorite.

Me ki nou tant pou fer osi lo kote Minister, nou tant pou revwar sirtou lo bann proze bann *grants* ki nou gannyen, pou nou kapab adres bann *challenge*, parey lo kote *alien invasive species*. Lo sa kote i annan serten travay ki ti'n deza ganny fer anba *Ridge to Reef*. E sa i annan serten landrwa kot in deza fini ganny netwaye.

E lo kote Minister osi ki nou pe tant pou fer, i annan en stratezi aktyelman ki'n ganny devlope anba *Ridge to Reef* ki aktyelman nou kapab *share* avek bann Manm Lasanble. E ki manner nou pou ede pou nou kapab *tackle* sa problem.

Mon krwar en keksoz ki enportan pou note, letan nou pe koz lo *alien invasive*. Parey i annan bokou fwa nou pe koz lo *creeper*. Ki *creeper* i tant pou fer, i tant pou blok tou lalimyer. E ou tant pou remarke poudir i detri sirtou tou bann lezot lespes ki anba.

E mon krwar osi i enportan pou nou note letan nou pe mazinen pou nou retir bann lespes anvaisan, nou osi bezwen mazinen kwa ki nou pou bezwen ranplas li avek. E mon krwar sa i en keksoz priyorite.

E i annan serten larzan lo kote Minister ki nou, nou'n mete anba *environment support*, pou nou kapab ede avek pou retir bann *alien invasive species*. Mersi.

MR SPEAKER

Mersi. Eski, mon krwar in ti'n demande si i annan en sif. Eski ou kapab nonm en sif oubyen i pa *available*?

MINISTER FLAVIEN JOUBERT

Mersi Mr Speaker. Mr Speaker, zis pou note ki i annan en konponan anba lanvironnman ki apel *Environment Support*. E sa i sa bann larzan ki i pas par ATF. E aktyelman anba la i annan 5.7 milyon. E bann aktivite ki i annan pou fer avek retir bann *invasive*, i ganny tire dan sa sonm.

E an menm tan parey PS in eksplike, nou annan bann lezot proze osi ki nou pe travay lo la. Me mon krwar ti a bon fer kler osi lo kote *alien invasive*, sa size menm si Minister pou

kontinyen travay lo la; par egzanp i annan bann nouvo gidans ki nou pe vin avek, lo bann prodwir ki kapab ganny servi pou kontrol sa bann lespes avek.

Me enn bann keksoz ki enportan se ki, bann dimoun ki propriyeter later, fodre zot osi zot form parti sa zefor. Akoz? Akoz bokou dimoun ozordi i netway son later. E i kit son later vid, e apre sa landrwa i ganny kolonize par bann lespes parey bann lalyann.

Alor i enportan ki nou kapab osi fer kler e eksplik dimoun, ki zot bezwen fer pou zot anpes bann plant anvaisan antre lo zot propriyete, ki apre i vin en problem pou zot e apre pou lezot dimoun. Mersi.

MR SPEAKER

Mersi. Ou ankor bezwen klarifikasyon Onorab? Silvouple, en kestyon spesifik.

HON FLORY LARUE

Mr Speaker, sa bann lalyann i ganny trouve bokou lo later Gouvernman, en? sirtou san montanny. So, i pa zis later prive e mon krwar i pli gro porsyon i lo later Gouvernman. Mersi.

MR SPEAKER

Mersi. Minis i a note. Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Tou koleg Onorab e byensir zabitan zil pros ki a lekout. Mr Speaker, mon kestyon i baze lo drenaz. Me selman i an 4 porsyon.

Premye, eski proze drenaz in konplete pou retir delo dan plato La Digue?

Dezyenm, eski sa 100 mil ki zot in mete la pou *improve* kapasite pou retir delo, zot santi i ase? Lekel ki'n ganny sa kontra e kan pou komanse?

E katriyenm bout, nou ti fer vizit ki nou'n war i annan drenaz ki ase danzere e i bezwen ganny bann kouvertir lo la.

Eski dan sa Bidze i annan provizyon ki'n ganny fer, pou met sa bann kouvertir lo sa bann drenaz? Mersi.

MR SPEAKER

Mersi Onorab. Minis, drenaz?

MINISTER FLAVIEN JOUBERT

Mersi Mr Speaker. Mon pou pas laplipar bann kestyon avek PS Imaduwa, ki sa i tonm anba son responsabilite. Me mon ti a voudre zis fer en pti pwen lo

drenaz lo plato La Digue Mr Speaker.

Ozordi nou pe war nou avek en sityasyon kot nou pe ganny salinasyon lo plato La Digue. Ki vedir delo sale, pe komans touy pye dibwa e pe komans detri kalite later lo plato. E i enportan ki dimoun i konsyan sa.

Pran tou delo dou e fer ki i ganny zete dan lanmer, i pa toultan benefisyel pou plato. Akoz, i permet delo sale antre e sirtou la nou pe ganny bann mare eksepsyonnèl, nou pe war inondasyon par delo sale.

Fodre nou fer sir ki nou pe fer lo kote lakantite delo ki nou pe zet dan lanmer, ki normalman i azir parey en baryer pou anpes delo sale antre dan plato.

Alor, mon krwar i enportan ki nou konsyan sa letan nou fer demann pou fer drenaz partou dan bann plato dan pei. Mon a les PS Imaduwa koz en pe lo sa size konplisyon ek kalite proze ki pou fer lo plato La Digue. Mersi.

MR SPEAKER

Mersi. PS?

PS TONY IMADUWA

Mersi Minis. Mersi Onorab pou ou kestyon. Parey ou konnen drenaz La Digue i en *major*

issue. E i annan plizyer letid pe ganny fer, ti annan site visit ki'n ganny conducted. E osi i annan topographic survey ki pe ganny fer, i pou ganny fer par SIA ki pou ede regarde ki mannyer nou adres an gro sa proze.

So, i pa fer sans ki tou kou nou vini, nou fer zis en bout apre nou bouz lo en lot bout. So, the other is se regard li an gro and the plato of La Digue i idantifye how we address once

HON ROCKY URANIE

(Off-Mic)

MR SPEAKER

Lekel...?

PS TONY IMADUWA

Mon napa sa lenformasyon la pou le moman. Mon kapab fer rode, e fer zot gannyen.

MR SPEAKER

Mersi. Onorab Mondon.

HON TERENCE MONDON

Mersi Mr Chair. Mr Chair, ler mon get Bidze anba *non-financial asset* kot departman in liste sa 34 proze ki'n etale dan peryod 2022 ziske 2026.

E Bidze pour 2024 ki i selman R4.1 milyon, e departman i rekonnet, enn dan son bann defi, ki i annan en logmantasyon dan *storm surge*

and for all the issue. I annan bann proze parey ou dir ki pe ganny fer la an se moman, pou adres serten bann nou apel bann drenaz danzere.

So, i annan sa proze pou kouver sa bann drenaz. E sa 100 mil ki ou'n dir sa i pou retention ki pou ganny peye pou sa bann proze.

ki pe fer bokou dega lo nou bann lakot.

Savedir i annan nesesite pour nou fer plis bann proze pour protez nou lakot. E mon get Anse Bazarka, i enn bann landrwa kot disab pe kontinyen ranpli semen piblik, e zis avek gran mare, nou pa pe koz *storm surge*, nou pe koz zis ek gran Mahe – gran mare.

E sak fwa LWMA i bezwen fer depans ek *excavator* pour retir sa gran volim disab ki akimile lo semen.

Eski Minis i kapab dir nou, eski zot pe eksplor posibilite pour mobiliz resours an kolaborasyon avek lezot departman? Par egzantp SLTA, e lezot antite non-gouvernmantal ki annan lenterere komen, pour protez lakot oubyen bann lespes ki trouve dan sa landrwa? Pour anmenn en

solisyon pour nou problem Anse Bazarka.

Mon vwar en vizit in ganny fer, mon ti a kontan en komitman lo sityasyon Bazarka. Mersi Mr Chair.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Wi, Onorab, nou pe travay avek bann lezot departman. Nou'n deza parey mon'n eksplike nou'n travay avek *SLTA*, *SLTA* in fini donn nou en rapor ki nou pe al diskite sa semenn ki pe vini, lo bann sit ki bezwen latansyon, latansyon irzan.

E nou pe kontinyen travay avek Lazans Enfrastriktir. E aktyelman enn bann demann ki nou pe fer ansanm avek Lazans Lenfrastriktir se ki, nou ganny sipor teknik, pour nou kapab *design* bann striktir lo bann lakot.

Akoz nou annan bann problem kapasite lokal pour nou kapab fini fer bann *design*. E bann solisyon long term, wi, i annan serten solisyon long term; par egzanp pour nou anpese ki nou ganny move, ouswa gro laroul ki ariv ater e nou bezwen fer restriktir pli deor.

Me selman, nou bezwen konpran poudir sityasyon pe kontinyen evolue, e plizyer landrwa anmezir ki nou met solisyon dan en landrwa, nou pour annan problem dan lezot landrwa.

Ozordi i annan en kantite landrwa ki menase, e mon pa krwar poudir ki nou pour kapab ganny en solisyon ki permanan pour tou sa bann landrwa en sel kou. I pour en keksoz ki pe - ki evolue.

E nou pour bezwen fer kler, par egzanp bann dimoun ki annan propriyete lo bor lanmer, pour zot osi port latansyon lo sa bann size donn zot lenformasyon, pour ki zot osi zot kapab reakte. Akoz bokou ka ou vwar ki nou ganny dimoun ki aproz letan zot in fini ganny afekte.

Me zot ti kapab pran serten mezir, pli avan pour zot anpese ki lenpak i ariv kot zot. Alor i enportan ki nou kapab travay avek kominote pour nou kapab fer keksoz avanse.

Me en solisyon permanan pour tou sa bann landrwa dan Sesel. Mon pa pour kapab donn en garanti devan Lasanble ozordi, me nou pe fer tou nou posibilite ek tou lazans dan pei. Mersi.

MR SPEAKER

Mersi. Onorab Woodcock?

MINISTER **FLAVIEN**
JOUBERT

Mersi Mr Speaker. Bonzour Minis ek ou delegasyon, e tou dimoun a lekout. Mon kestyon i ganny trouve anba 'PSIP, proze kapital' pour Departman of *Climate Change*, sirtou kot i konsern bann proze *coastal management* e *coastal rehabilitation*.

Annefe Amitie, Ros Korbizo, Anse Kerlan, Anse Consolation pour proze Anse Kerlan Amitie, *coastal phase 2* avek 3, i annan en sonm R29.3 milyon ki pour sa lannen travay pour kontinyen lannen prosen, e osi sa 1.5 milyon pour *coastal rehabilitation* Anse Consolation.

Mon kestyon se ki, kan ki sa bann proze pour al lo *tender*? Eski zot kapab donn nou en pe detay lo *scope of work*? Ki travay ki pe al ganny fer? Bann travay *coastal rehabilitation* ki pe al ganny fer lo tou lede, sirtou lo lakot parey mon'n dir Amitie Anse Kerlan e osi Anse Consolation? Mersi.

MR SPEAKER

Mersi. Minis, ler ou pare.

MINISTER **FLAVIEN**
JOUBERT

Mersi Mr Speaker. Mr Speaker Ms Tamatave *from Finance* i annan en bout kestyon, ki i krwar i merit pe reponn kot i konsern en alokasyon dan Bidze.

E apre mon a pas laparol avek PS Imaduwa pour proze Praslin ki'n ganny demande par Onorab Woodcock. Mersi.

MR SPEAKER

Mersi. Wi, Ms Tamatave?

COMPTROLLER **GENERAL**
ASTRIDE TAMATAVE

Mersi Mr Chair. Bonzour Mr Chair, bonzour tou Manm Onorab e tou dimoun ki a lekout. Mr Chair, mon pou reponn en pe anliny ek kestyon ki Onorab Mondon in demande, ki pour osi ede pour klarifye kestyon ki Onorab Esparon in demande bomaten.

Anba *non-financial asset* Onorab Mondon in dir i annan e rediksyon *from 2023* konpare ek 2024, sorti R75.5 milyon pour vin R4.1 milyon. E Onorab Esparon bomaten in dir ki kekfwa i annan en fot, akoz i pe vwar bann proze pe mansyonn de fwa.

Parey zot pour kapab konstate dan lefase anba sa *heading use of goods and services* pa ti zanmen annan en *subhead* ki ti apel *grants*. Sa

subhead grants, nou fek entrodwir li dan *PB Statement* sa lannen. Ki sa i vedir? I tou bann *grants* ki annan en *recurrent nature*, bann ki i pa pe al anver lenfrastriktir, nou'n klasifye li anba, byen ek servis.

Akoz prensipalman i bann *grant* ki ou pe pey konsiltan, ou pe pey bann program, ki i pa'n nanryen pour fer avek lenfrastriktir.

As part of the PEMA Report enn bann rekomandasyon se ki nou tir bann keksoz ki pa *of recurrent nature* dan *PSIP*, nou kit *PSIP*, pour pirman bann ki relye avek lenfrastriktir. E sa ki fer sa rediksyon *from non-financial*, aköz *up to 2023*, tou proze *Grant, recurrent non-recurrent* ti anba *PSIP*.

So, ou pour vwar an 2024, *grants* anba *goods* in mont, i 35.09 milyon ki oparavan ti zero. Me anba '*non-financial asset* i vin zero. So dan laliny Bidze detay ki Onorab Esparon ti pe eksplike, ou pour vwar menm proze repete de fwa.

Me pour en lannen i pour anba *grants*, anba *goods*, par egzantp *from 2024 onwards*, me *up to 2023*, ou pour vwar li anba *non-financial assets*.

So, i pa neserman vedir ki i en fot, me selman i zis en re-alokasyon *from non-financial up to 2023*, e in ganny klasifye

anba '*grants*' anba '*goods*' *from 2024 onwards*. Mersi Mr Chair.

MR SPEAKER

Mersi. Mersi mon krwar – Wi?

HON REGINA ESPARON

Enn pti klarifikasyon Ms Tamatave. Eski son *amount* i sanze depandan lo *foreign exchange*? I fer ki i annan en varyasyon dan son sonm?

MR SPEAKER

Ms Tamatave?

COMPTROLLER GENERAL ASTRIDE TAMATAVE

Bann proze *grant* Mr Chair, son *amount* i sanze. Enn par *foreign exchange*, apre osi par egzekisyon proze. Savedir program i dan diferan faz. Savedir si son alokasyon *forex* anmezir proze pe prolonze, i mwens, natirelman son Roupri pour osi mwens.

So, i annan *foreign exchange*, apre lenplimantasyon proze kantite larzan ki bezwen pour fini sa program. Mersi.

MR SPEAKER

Mersi. *PS* a kontinyen.

PS TONY IMADUWA

Mersi Mr Speaker. Onorab, lo kote proze Anse Kerlan, parey ou konnen *design* in fini ganny fer pour li, e nou la lo *planning stage* pour determinen en *proper time frame* pour ler nou bouz *tender*, e zot pour ganny notifie ler nou pour *proceed to tender*.

Lo kote Consolation bann proze parey ou konnen *topo* in fini ganny fer, e i annan serten rekomandasyon ki'n ganny fer dapre *design*. So, i pour annan ban *areas* kot pour annan *raised sea wall or so*, e sa osi pour ganny kominike avek. *It's ongoing*, sa bann proze.

MR SPEAKER

Thank you. Onorab Gabriel.

HON CONRAD GABRIEL

Mersi Mr Chair. *Welcome* Minis ek ou delegasyon. Minis nou konnen ki Pointe Larue i afilye avek problemn drenaz, *flooding*, inondasyon. Mon ti a oule konnen - kontan konnen ki zistans ou Minister arive lo sa bann proze drenaz, e osi proze *desilting* ki ti'n komanse en pe letan pase?

So, mon ti a kontan konnen dabor ki annan dan sa Bidze pour sa problemn *flooding* Pointe Larue? Mersi.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab, mon pou pas laparol avek PS Imaduwa, pour donn klarifikasyon lo *desilting* Pointe Larue e osi drenaz. Mersi.

MR SPEAKER

PS.

PS TONY IMADUWA

Mersi. Mersi Onorab pour ou kestyon. E parey ou okouran, sirtou la dernyen er ou vwar en bon pe bann louvraz pe ganny fer sirtou bann *desilting* lo kote drenaz dan plato Pointe Larue.

E sa louvraz pour kontinyen *in ensuring* ki nou, nou annan en *sort of* drenaz i *free from* okenn debri, okenn soz. Me osi i annan bann proze ki nou pe regarde lo kote Pointe Larue, pour adres ler i annan gro lapli.

E parey ou konnen kot Erport nou'n fini fer en *bypass* pour tir delo en pe plis lo sa plato kot UCPS, anba la kot *Air Seychelles* i ete, *headquarters*. Ti annan serten louvraz ki nou'n fer la.

E i annan plizyer lezot proze ankor ki pe ganny fer pour, target Pointe Larue. E sa

i pa zis lo kote drenaz, me osi bann *desilting* bann diferan area ki *prone to flooding*.

MR SPEAKER

Wi. Ale.

HON CONRAD GABRIEL

Yes, Mr Chair vitman. PS si ou kapab donn nou enn pti pe kot sa zafer drenaz Lekol Pointe Larue konmsi ki ti'n komanse, ki zistans en drenaz kot pour *improvement of drainage* Pointe Larue zot in fini or ti dan Bidze? Zot in konplete? Mersi.

MR SPEAKER

PS.

PS TONY IMADUWA

Ou pe refer kot Lekol Pointe Larue? Wi.

MR SPEAKER

Byen.

HON CONRAD GABRIEL

Nou - son sonm *please*?

MR SPEAKER

Ale. La ou pe *extend* kestyon la. Mon krwar PS napa sa sonm direktman, so nou a pas lo lot kestyon pour lemoman. Onorab Romain?

HON GEORGES ROMAIN

Mersi Mr Speaker. Avan mon komanse mon ti a kontan dir Minis ek son lekip mersi pour 700 mil ki zot pe donner pour drenaz faz 2 o bor *Saint Joseph Daycare*. Mersi pour sa.

Mon kestyon i trouve anba *goods and services office building rental*. Mon'n vwar ki an 2023 ti annan 3.1 milyon, la pour 2024 mon vwar 4.1 milyon almost R1 milyon an plis. Si Minis i kapab eksplik nou si zot in sanz landrwa, oubyen si i kapab – I *mean* donn nou en leksplikasyon lo sa? Mersi Mr Speaker.

MR SPEAKER

Mersi. *Panel*?

MINISTER

FLAVIEN

JOUBERT

Mersi Mr Speaker. Mr Speaker sa – mon ava pas laparol avek PS Matatiken i ava donn en pe detay. Me selman, zeneralman i annan pour fer avek bann sanzman dan lofis ki nou pe okipe e son bann *rent* ki vin avek. Mersi.

MR SPEAKER

PS. Klarifye.

PS DENIS MATATIKEN

Mersi Mr Speaker. Parey-parey Onorab in mansyonnen, in annan serten mouvman mon

kapab dir ki Minister in bouze, parey Minis oparavan ti pe dir poudir *PDCS*, aktyelman i an *full* fonksyonman. Aktyelman zot pe lwe landrwa, kote – *House of Francis*.

Nou osi annan mouvman kot Minis in bouze, sorti kot i ti ete avan *Unity House* pour li bouz kot *Kingsgate House*, e osi nou annan Seksyon Klima, I mean Departman *Climate Change* osi ki'n bouz *Unity House* akoz *building* ki zot ti pe *occupied* i pa ti tro *safe*. Mersi.

MR SPEAKER

Mersi. Onorab William.

HON WAVEN WILLIAM

Mersi Mr Chair. Bonzour Minis avek ou lekip. Mon anvi aport latansyon Minis lo *P2 Climate Change and Energy Management*,

Kot pe koz lo *contributing indicators*. Mon pe koz la pwen 4 avek 5, si mon pa tronpe dan *previous budget Presentation* zot koz lo apepre menm *figures*, vizavi bann sit ki zot pe travay avek.

Mon anvi demande si sit Grand Anse Mahe, lans kot Minis mon vwar ou'n deza fer en vizit, si i pe ganny enkli ladan, akoz i osi pe vin enn pti pe serye dan sa degradasyon lanmar avek lans?

E an menm tan Minis mon pe regard bann *figures* zot pe donnen la, mon pe demande par egzanp si ou pe get nimerò 4, letan ou pe pran depi 2022 avek 2024 i pour fer zot 13 sit. Me letan ou adisyonn avek sa 2 an pli tar, konmsi i pa balanse konmsi. Eski i annan nouvo sit ouswa zot pe travay lo menm sit tou-le-z-an? Mersi.

MR SPEAKER

Mersi.

MINISTER
JOUBERT

FLAVIEN

Mersi Mr Speaker, mon pas laparol avek *PS Imaduwa* ki pe kit en - ki son departman, pe aktyelman swiv sa bann endikater.

MR SPEAKER

Wi, *PS*.

PS TONY IMADUWA

Mersi Minis. Mersi Onorab pour ou kestyon. Onorab ou pe *refer to* sa bann *priority sites* ki ganny trouve anba nou *indicators* dan sa *18 sites*.

Sa *18 sites* ti ganny idantifye anba sa *Coastal Management Plan* ki ti ganny fer par *World Bank*. E sa i enkli diferan *areas* otour Mahe, Praslin, La Digue, e i bann *areas* ki nou konsider koman

high priority. I aktyelman bann *areas* ki a sa moman nou pe fer fas.

So, i annan *areas* ki tourn parey *east coast, west coast* ki nou'n idantifye koman bann *priority areas* pour nou entervenir. *Of course, issue* ki'n annan se ki, *the amount* larzan of entervansyon ki nou kapab fer i limite.

Aprè *what's limited* i kapasite ki nou annan pour adres sa. So si ou vwar bann *figures* parey nou'n mete 4 sa, i sanze dapre sa 18 *site*. Me selman i pa vdir ki nou restrikte nou lekor a 18 *site*.

La an se moman nou pe regarde avek lezot sipor, pour fer en lot letid pour regarde lezot sit ki soz e parey Minis in mansyonnen pli boner.

Resaman nou pe vwar, nou pe ganny bokou bann lezot sit ki pe ganny *added to, to* nou lalis e sa i en pe konsernen akoz *already* nou, nou *constrain* pour entervenir pli vit posib.

Me osi i annan sa *issue* finansman ki vin en gro soz e sa nou'n diskit avek Minister Finans *to try and see how* nou kapab adres sa *issue*.

Me *yes*, i en pe konsernen. E osi si mon kapab azoute, lo kote bann *indicators* e *as part of* nou *process RBM* nou pe revwar lafason ki nou vreman montre,

annan en ledikasyon ki vreman montre nou'n vreman pe *increase* nou rezilyan kont sanzman klima.

E zis annan sa bann *indicators* pour *site, address* i pa donn ou en bon, soz ki nou vreman pe *increase* nou rezilyan.

So, so sa i en diskisyon ki nou pe fer aktyelman pour *come up* avek en *proper indicator* ki demen nou kapab vreman mezire, *are we improving on our* rezilyan pour sanzman klima *or not?* Mersi.

MR SPEAKER

Eski – eski ou kapab dir li si Grand Anse Mahe i enkli dan enn sa bann sit? Mon krwar i ti'n komans avek sa.

PS TONY IMADUWA

Yes, Grand Anse Mahe i osi i enn.

MR SPEAKER

Tre byen. Mersi Onorab Gill.

HON CHURCHILL GILL

Mersi Mr Chair. Bonzour *panel*. Mon kestyon se *coastal erosion* Anse La Blague gran lans ek pti lans, nou'n fini fer sa vizit depi 2022, 2023 sa ti dan Bidze ziska konmela nanryen pa ankor ganny fer.

Mon pe gete si dan Bidze 2024, i annan keksoz pour ganny fer? Akoz mon pa vwar i *appear* la, dan *PSIP* konmkwa sa pour ganny, sa travay pour ganny fer Anse La Blague. Mersi.

MR SPEAKER

Mersi.

MINISTER FLAVIEN JOUBERT

Mersi Mr Speaker. Mersi Onorab. Mon ava pas laparol avek *PS* Imaduwa, pour koz lo Anse La Blague.

MR SPEAKER

PS?

PS TONY IMADUWA

Mersi Minister. Mersi Onorab pour kestyon. Ou - mon krwar ou okouran ki Anse La Blague ki enn pti pe pli konplike, dan sa sans ki nou bezwen regard plis long term solisyon.

Akoz teknikman ou annan en semen ki pre avek lakot e i pas lo serten later prive ki pe deservi en kominote. E mon krwar nou pe tou an diskisyon avek bann lezot idantite pour vwar en solisyon pli lonterm.

Akoz i annan diskisyon ki si nou fer - akoz nou pa fer en

parapet walls, nou fer bann proteksyon lakot.

Me selman mon krwar demen si lonterm, en solisyon lonterm se regarde mannyer nou kapab even bouz sa semen, pli anndan *rather than* kit li la kot lakot. Akoz i *increase* sa risk ki i inonde e *having* en proteksyon miray, pa pour vremen rezourd e ou pour *end up* annan - ou pour fer plis louvraz *in terms of maintaining* sa proteksyon.

So-so the idea now, mwan mon konnen ki i annan serten diskisyon parey mon'n dir ou pour bouz sa semen pli anndan, e sa bout devan, fer en parey *nature-based* entervansyon kot ou plant bann feyaz e osi *raise* sa semen enn pti git pli o.

So, i annan serten diskisyon lo la. E parey mon dir ou, wi nou pour fer sa louvraz *desilting*, me solman i enportan ki nou regard pli lonterm, lo kote solisyon pour Anse La Blague.

MR SPEAKER

Wi, klarifikasyon Onorab. Zis -

HON CHURCHILL GILL

Wi, mon problem *PS* se depi 2022 sa *issue*, prezan i pe deteryore. *So* nenport ki fason ki zot oule apros sa, ti a bon

konmsi nou *speed up* sa *process*. Mersi.

MR SPEAKER

Mersi *PS* a note. Mersi. Onorab Vidot.

HON AUDREY VIDOT

Mersi Mr Chairman. Bonn apre midi delegasyon ki prezan. Mon pe regard dan *strategic priorities* 2024 pour 2026. Dernyen anba mon'n vwar ki zot in met *established* de lazans pour kree de lazans, enn *Seychelles Ocean Agency* avek *Environment Protection Agency*.

Me selman zot pa'n spesifye ki lannen spesifik, e mon pe regard dan zot *current challenges* ki konsern mankman *trained staff* pour zot kapab devlop regilasyon, Lalwa, Polisi e pour zot *enforce* sa bann Lalwa. E osi retar, pour devlop bann Lalwa spesifik e osi pour enplimant li.

Prezan mon kestyon i baze lo sa *strategic plan* ki zot annan pour kree sa de lazans, avek sa bann problem ki zot annan la aktyel, vi ki zot pa'n spesifye si i dan *strategic 2024*, eski dan sa Bidze zot in fer serten provizyon? Konbyen?

E si vreman zot krwar poudir zot pour kapab enplimant sa de lazans prenon kont zot bann *challenges* la si

sa Bidze osi i permet zot kapab adres li, pour *by the time* kreasyon sa de lazans? Mersi.

MR SPEAKER

Mersi.

MINISTER

FLAVIEN

JOUBERT

Mersi Mr Speaker. Mersi Onorab pour ou de pwen. Mr Speaker, kot i konsern *Seychelles Ocean Authority* i ti en propozisyon ki ti la avan.

Ozordi nou'n fini etabli komansman sa lazans, nou annan dimoun ki'n ganny *recruit* koman kordinater, me an servan larzan proze ki nou pour annan depi sa lannen la, savedir ziska 2025.

E alors sa bann dimoun in deza an plas. E son *core* sa lorganizasyon in deza fini komans demare e sa lorganizasyon son travay, sa lazans son travay se pour travay lo administrasyon *Marine Special Plan* ki nou tou nou konnen, in ganny prepare pour proteksyon lamarin Sesel.

Environment Protection Agency li, parey mon'n eksplike pli boner, i annan en demars ki nou'n fer pour nou ganny - pour nou fer en *functional review* nou Minister, e pour nou travay lo amelyorasyon sa striktir ki nou annan; pour nou fer li *fit* pli

byen sa ki nou bezwen - sa ki nou ti a voudre annan an term *environmental protection*.

E parey mon'n dir nou'n fer demann avek *UN Office*, nou'n fer diskisyon, nou'n fer demann e nou pe esper en repons pour nou ganny en lasistans pour nou fer sa *functional review of departman*, pour nou vin avek bann lezot propozisyon.

Me en propozisyon ki nou'n deza pe met an plas ozordi, se pour nou konsolid nou *Unit Enforcement and Compliance*. Parey dan Bidze i annan, nou pe deza ganny en nouvo *legal officer*, ki pour ed nou ranforsi sa lebra *Enforcement and Compliance*, ki i enn bann eleman ki merit la pour *Environment Protection Agency* deza.

Nou bann *challenge* lo kote Lalwa ek laplikasyon ek devlopman Lalwa, sa i enn bann rezon ki nou pe ranforsi nou, nou *legal unit*. Nou le ki annan en *legal unit*, ki perform pli byen, me nou le ki i annan en pli bon lyezon ant *legal enforcement of Lalwa* dan Minister. Akoz nou vwar ki i annan en kantite febles dan sa kote.

Par egzanp ozordi si ou demann mwan en kestyon lo lakantite ka ki nou pe anmenn

devan, menm si nou pe atrap dimoun nou pe fer diferan keksoz, me sa bann ka i bezwen ganny konklir, e nou bezwen vwar rezilta pour ki dimoun i santi ki zot ganny menase par Lalwa, e zot kapab *comply* avek Lalwa.

Alor sa i bann febles ki nou bezwen admet fran. I bann febles ki nou bezwen adrese lo kote Minister. Me nou krwar ki avek en ranforsman lo *enforcement, compliance* ek konpetans legal dan nou Minister, nou a kapab met sa bann *challenge* annord. Mersi.

MR SPEAKER

Mersi. Wi, Onorab?

HON AUDREY VIDOT

Zis enn pti leklersisman. Minis eski osi dan - i pour enkli - ou'n dir, vi ki mon'n mansyonn poudir i annan *untrained staff*, pour apard sa ki ou'n dir mwan in deza ki la ki pe travay pe kordinen, zot pour bezwen bann *staff* adisyonnèl pour fer fonksyonnen sa bann lazans. Eski i annan Bidze - dan sa Bidze osi zot pe komans *train* bann *staff*?

MR SPEAKER

Mersi. Minis, en repons bref silvouple.

MINISTER **FLAVIEN**
JOUBERT

Mersi Mr Speaker. Dan sa Bidze Mr Speaker, nou pe *recruit legal officer, training* i 311 mil pour sa lannen. E parey mon'n dir nou pe sanz nou bann lapros avek *training*, pour nou *focus* strikteman lo konpetans.

E dan sa 311 mil ki nou pe - ki nou annan pour *training* pour sa lannen, i pour annan *training* pour *enforcement staff*, pour zot kapab vreman aplik Lalwa ek annan sa konpetans pour zot fer sir ki bann *case* i bouz devan. Mersi.

MR SPEAKER

Mersi. Onorab Labrosse?

HON RICHARD LABROSSE

Mersi Mr Speaker. Bonzour Minis ek ou delegasyon. Mr Speaker, dabor avan mon ti a kontan remerci Minis pour son bon korperasyon avek distrik, son lofis, son bann *staff* pandan sa lannen ki la.

Me Minis ler mon pe al vot pour Bidze Lanvironnman avek Sanzman Klima, mon rapel lannen pase mon ti demann ou sa kestyon, mon pou demann ou ankor sa lannen, konsernan zabitan Fairview Estate.

Actually, depi bomaten la mon'n ganny mwan apepre en dizenn *call*, la akoz i paret

mwan ozordi i annan en zafer enn pti pe pli, pli zafer ki'n eksploze kot zot anler.

Alors, mon ti a kontan ki ladres ki ou ti a kontan dir ek sa bann zabitan zot pe ekout la aktyelman, lo ki zistans arive pour zot vwar en solisyon, pour sa problemn li menm?

E eski Gouvernman li menm, i annan en nouvo plan, oubyen en nouvo keksoz ki'n ganny diskite pour zot lo la? Mersi Mr Speaker.

MR SPEAKER

Mersi. Minis?

MINISTER **FLAVIEN**
JOUBERT

Mersi Mr Speaker. Mersi Onorab pour sa kestyon ki tre enportan. Mon krwar i en keksoz ki devre reste lo nou azanda toultan.

Mon poudir ki Fairview i annan de eleman ki nou pe *deal* avek; enn se son eleman legal, parey nou'n deza koz lo la avan. I annan bann pwen legal ki nou bezwen adrese. E aktyelman Minister pe fer bann demars, pour ki nou ganny byen lenformasyon pour nou kapab bouz devan avek nou kad legal.

E sa i annan pou fer avek bann analiz adisyonnal, bann sipor adisyonnal ki nou pe rode, bann sipor teknik pour nou

kapab rezourd sa – aranz pozisyon legal pour nou kapab bouz devan. Sa i enn. E sa Gouvernman pe fer la aktyelman nou ekspekte li pour konplete *by* lafen sa lannen.

Lot pwen se son pwen teknik ek rezourd sa problem ki nou vwar i annan – egziste *Fairview* ozordi. Aktyelman mon'n fer kontak avek *PUC* e dan bann zournal, dan bann zour resan zot ava vwar ki *PUC* in lans en *request for proposal*, pour nou fer *design* en *sewer line* depi *Fairview* ziska *Mamelles*.

E *PUC* aktyelman pe travay avek enn sa konpanyen ki'n reponn sa lapel. E enn bann keksoz ki nou lentansyon se ki *regardless of* son konklizyon legal ki arive, nou pour bezwen anmenn solisyon pour *Fairview*, aköz kondisyon zeoloji ki egziste dan sa landrwa, kot i annan delo ki pas anba later ki transmet partou, e ki osi met an danze baraz *Basin Ble*.

Alor *PUC* in fini fer sa *request for proposal*, in ganny pibliye e i annan en konpanyen ki'n reponn. E nou pour travay lo fezabilite en laliny *sewage* ki vin tonm *Mamelles* e ki apre i anmenn tou bann *wastewater* dan sistenm *PUC* santral.

Alor nou ti a voudre fer sa osi, koman en mezir, ki pour rezourd sa problem aköz menm si nou ariv lo en konklizyon legal, nou pa pour ankor ariv lo en konklizyon teknik.

E nou pa pour ariv lo en konklizyon kot tou keksoz pour ganny rezourd, enkli bann lakaz e bann nouvo devlopman ki ganny fer dan sa landrwa. Mersi.

MR SPEAKER

Mersi. Onorab Herminie.

HON WILBERT HERMINIE

Mersi Mr Speaker. Bonzour Minis avek ou - bonn apre midi – (*sorry*) Minis ek ou delegasyon. Minis anba *current challenges* paz 458 premye *bullet point* i met "*Inadequate and untrained staff*" kapab *skip* pour sa part kot pour "*enforce environmental laws*".

Lo sa, kwa ki annan dan sa Bidze pour sirtou bann *staff* ki fer *enforcement* lo bann proze, bann gro proze devlopman? La kekfw mon a pran legzanp parey Anse La Mouche avek Intendance, kwa ki annan pour zot, pour zot kapab - mon pa le servi sa mo *deal*, me fer sir ki sa bann devloper i fer zot proze *according to zot EIA*?

Sa lefe pour kapab ed sa bann aktivis Lanvironnman, ki Prezidan menm ti maltret zot dan Konvansyon *LDS*. Mersi Mr Speaker.

MR SPEAKER

Ale Minis.

MINISTER FLAVIEN JOUBERT

Mersi Mr Speaker. Mersi Onorab pour sa pwen. Mon pour pas laparol avek *PS* Matatikenn lo performans bann *staff* lo sa bann proze e ki bann mezir ki pe ganny pran atraver sa Bidze? Mersi.

MR SPEAKER

PS.

PS DENIS MATATIEN

Ok mersi Minis. Mersi Mr Speaker. Onorab parey Minis in fer mansyonnen ti annan en Bidze 311 mil ki ti'n ganny mete pour *train- - I mean* pour *training* prensipalman.

Lo kote Minister ki nou, nou pe fer, nou pe revwar en pe sirtou parey ou'n mansyonnen an term kapasite nou bann *staff*. E parey in deza mansyonnen avan, nou le ki bann *training* ki ganny fer, i ganny fer lo en keksoz spesifik.

E parey Minis in mansyonnen, parey lo kote

sirtou lo kote polisyon, nou'n deza annan en *training* ki nou pe fer ansanm avek *Health* ki i vin enn pti pe pli spesifik, an term parey letan i annan bann – i annan bann problemm avek *wastewater*.

Lo kote *EIA*, sa osi i en landrwa kot nou'n ganny - kot aktyelman nou pour met bokou plis zefor, ki bann proze ki annan ki pe ganny enplimante *staff* i *monitor* li enn pti pe pli *closely*.

E mon krwar lo sa kote osi i enportan pour nou *raise* kapasite nou bann *staff* ki nou annan, pour asire ki *at the end of the day*, nou kapab adres bann problemm letan i arive. Mersi.

MR SPEAKER

Mersi. Onorab Henrie.

HON GERVAIS HENRIE

Mersi Mr Chair.

MR SPEAKER

Eskiz mwan. Minis, i annan keksoz pour azoute lo sa enn dernyen pwen?

MINISTER FLAVIEN JOUBERT

Eskiz Onorab. Mr Speaker ,zis enn pti pwen ki mon ti a voudre fer sorti avek Onorab se ki, parey mon'n dir Mr Speaker pli

boner se ki, nou pe met lanfaz lo nou sistenm performans *RBM*.

Akoz pa toultan, sa bann febles pa toultan ki annan pour fer avek kapasite, konpetans. I annan en eleman konpetans e kapasite, me i osi en eleman performans.

E nou, nou pe fer sir ki nou bann *staff* zot ganny byen kler sa bezwen pour zot demontre performans atraver zot travay.

E parey mon'n dir sa de departman, nou'n kapab enplimant antyerman sistenm *RBM* dan nou, dan sa de departman e nou ti a voudre ki bann *staff* zot fonksyonnn dapre en sistenm ki bokou plis strik, lo size performans e non-pa zis ki parey nou fer toultan, nou les pase bann defo e nou pa zanmen amelyor sa bann defo. Mersi.

MR SPEAKER

Mersi. Tre byen, Onorab Henrie ou kapab pran laparol la.

HON GERVAIS HENRIE

Mersi Mr Chair. Bonn apre midi tou dimoun. Mr Chair, mon krwar nou annan, nou annan en problemn koman en pei. Mon pe get Bidze Minister Lagrikiltir, Departman Sanzman Klima e

Lanvironnman ansanm 3,213 milyon 607 mil. Kote mon krwar i annan problemn?

LWMA tousel 287 milyon 775 mil. *Now* problemn i annan lo de fron. *Either* koman en nasyon, nou pa pe kapab zer - pa zere, me plito redwir salte dan nou pei, nou kontinyelman prodwi plis *or* zesyon salte in vin en *area*, kot i annan en group dimoun (mon pa pe blanm zot) *but making easy money through the national budget*.

Netway semen, lav bin *and all that*, so i annan sa de *issue*. Prezan mwan pour mwan i se ki oli larzan dan program ledikasyon pour redwir sa Bidze *LWMA* lavenir? Parske an 2025, i pour ariv pres 300 milyon.

E ler mon pe get zot bann target pour mezir performans, an term ledikasyon, avek konsyantizasyon, mon santi poudir, i annan en mank irzans, pour nou ranvers sa sityasyon demen bomaten.

Sa bann *target it's too, too low*. Pour mwan mon anv i zot donn mwan en reasirans poudir, nou konsyan, nou annan en irzans dan zesyon e rediksyon salte dan pei. Mersi.

MR SPEAKER

Onorab, Bidze *LWMA* i –

HON GERVAIS HENRIE

Non, Mr Speaker. Me mon krwar poudir an term, mon pe koz lo ledikasyon, pour nou ranvers *this situation* ki tonm anba *Environment* - si i dan -

MR SPEAKER

Ok, si Minis i annan en repons an term Bidze *Environment*.

HON GERVAIS HENRIE

Wi i tonm dan Bidze kot nou pe koz lo la, la i lo paz 466; '*Education and Awareness*'. Mersi.

MR SPEAKER

Mersi.

MINISTER FLAVIEN JOUBERT

Mersi Mr Speaker. Mr Speaker, mersi Onorab pour sa pwen vreman enportan kot i konsern Bidze. Mr Speaker, premye keksoz se ki sa diferans dan Bidze, *LWMA* son Bidze i san poursan Bidze Gouvernman.

Me bann lezot morso dan sa Minister, zot Bidze ki zot depan lo la pour fonksyonnen ek bann fonksyon ki zot fer, i annan bann konponan ki sorti an deor ki azout avek zot Bidze.

Savedir petet sa *figure* 213 avek 287 i pa toutafe reflekte antyerman resours ki ganny plase dan sa de landrwa.

LWMA li i depans antyerman lo sa ki sorti dan - kot Minister Finans atraver *tax*.

Me i annan bann korperasyon ki nou gannyen, i annan bann proze ki nou gannyen, ki parfwa i aktivman ase sibstansyel.

Lot keksoz kot i konsern ledikasyon, ek nou bann target, kantite irzans ki annan pour nou bann target, mon poudir ki aktyelman ozordi letan mon pe gete, bokou dimoun dan pei i konsyan sa size salte.

Mon pa tro krwar si annan okenn manm piblik ki poudir i pa'n zanmen tann nonmen sa size, i annan en kantite konversasyon pe ganny fer.

E sa lannen, nou'n fer en kantite zefor pour nou ariv kot bann dimoun. I annan bann travay ki ganny fer menm kot bann *housing estate*, i annan proze ki pe ganny fer, avek bann dimoun dan bann *estate*, pour konsyantiz zot lo sa size salte.

LWMA i annan son zofisyé ledikasyon ki'n antre e i annan travay ki pe ganny fer partou dan bann pei, e ou vwar ki menm i annan bann *NGOs*, bann group ki pe met zefor pour kontinyen konsyantiz dimoun lo polisyon lanmer, polisyon later, eksetera.

Me mon krwar i annan en kantite problemm avek nou piblik ki dimoun pa pe konpran vremen kwa ki zot devret pe - ki kalite konportman ki zot merit annan. E mwan mon poudir ou fransman Onorab en, mon'n *drive* deryer dimoun ki responsab dan sa pei, dimoun ki nou konnen isi anndan si mon nonm zot non, serten bann Manm pour konn zot e zot salte par lafnet.

I pa neserman dimoun ki pa konn nanryen ki pa konn ekrire, ki pa konn lir, ki pa konn ki pa'n zanmen vwar - tann lo radyo eksetera, i bann dimoun ki zis pa konpran poudir zot annan en responsabilite zot tou parey nou tou.

E sa bann dimoun si ou demann li kestyon i pour dir ou, mon ti tande mwan, me selman zis i pa oule fer.

So, mon krwar i annan en lot morso ki nou bezwen fer se ki nou bezwen siviliz nou piblik en pe. Mon pa konnen ki manner nou pour fer li petet avek Lasanble nou kapab fer li pli byen.

Me nou bezwen osi anmenn sa responsabilite sivik parmi nou bann piblik, pour ki zot vremen konpran poudir zet salte i pa en keksoz normal pour nou fer, e alor e ki son

konsekans se ki nou pe depans en kantite larzan lo netwayaz.

I annan sa konsyantizasyon. I annan zefor ki pe ganny fer. Sa lannen nou'n met en kantite zefor, petet nou'n depas nou target pour sa lannen. Me mon pour dakor ek ou, ki nou bezwen fer plis ankor, nou bezwen kontinyen, kontinyen met zefor.

Me i pa neserman zis sa zefor ki Minister pour fer ki pour sanz dimoun. Mon krwar i annan plis ki sa ki nou bezwen fer pour dimoun sanze dan pei e vremen vin konsyan pour zot pa zete. Mersi.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Chairman. Bonzour *panel* e bonzour tou koleg Onorab e tou dimoun ki pe swiv nou Lasanble. Mr Chairman, mon ti a kontan zis lo komansman dir poudir i iresponsab pour dir bann dimoun ki travay avek bann Kontra *LWMA* ki netway semen, netway *bin site* zot fer *easy money*. I iresponsab lo lapar en *MNA* poudir sa.

Si nou dir sa nou pa konsyan e *l'homme* dan lopilans in bliy son nesans Mr

Chairman. I kler sa. *L'homme* dan lopilans in bliy son nesans.

Mr Chairman, mwan mon kestyon pour Minister Lanvironnman, i vin lo lefe ki mon pa pe vremen vwar en *budget allocation* ki fer sans avek bann problemn ki zot dir nou zot sipoze fer fas avek.

Par egzant an sa ki konsern *enforcement*, resaman nou'n annan en gro *case* ki'n fer - al lo televizyon partou, nou'n koz lo la kot en gro konpanyen in fer *breach*, in koz en gro lofans, ki mwan mon vwar sa en lofans an sa ki konsern lanvironnman, nou pa'n tann nanryen lo si in ganny *fine*? Si pa'n ganny *fine*? Ki kalite *enforcement* ki'n ganny fer?

E nou pa vwar Bidze, ki pe al ver *enforcement* pour nou kapab ranforsi bann zefor ki nou pe fer vizavi *enforcement*. Akoz se sa bann dimoun ki nou bezwen fer sir zot pa repete sa bann lofans.

Otherwise ler piblik i get sa enn poudir be ou pa'n kapab *deal* ek en boug ki'n al defriz en lans laba anler, selman ou le fer li ou le *deal* ek li akoz en sak plastik. Be ou annan en problemn!

Konpran? So, mon ti a kontan konnen, akoz ki Bidze *enforcement* lo lanvironnman pa'n ogmante signifkaman,

pour zot kapab reponn a lapel ki zot bezwen pour reponn ozordi, pour zot fer zot travay?

E i enportan osi, pour nou konpran Mr Chairman, ki rol sa Minister pe zwe, pour li asire ki bann desizyon ki Gouvernman i pran, par egzant an sa ki konsern konpansasyon *PUC*. Si kapasite ki annan dan Minister i permet zot avek en Bidze ki'n desann sorti - mon kapab konpran ti annan bann lezot eleman ki pour annan serten *capital project*, i annan bann *fixed assets* ki petet ti pour annan serten larzan ki zot in fer depans. Me i sorti 132 milyon pour nou vin 99 milyon.

Me selman Lasanble pa kapab ganny en *rate* ki en etranze in vin travay Sesel pour en, pour en antite lo ler i lwe lakaz, lo ler i fer bann keksoz...

MR SPEAKER

Mersi. *Ok* Minis son kestyon i lo *enforcement* si i pe ganny fer, e akoz i pa pe ganny fer e akoz i pa pe ganny fer plis?

MINISTER FLAVIEN JOUBERT

Mersi Mr Speaker. Mr Speaker, kot i konsern *enforcement*, laplipar bann aksyon *enforcement* i konsern kapasite imen. Mon krwar *PS* in lev sa pwen kot i konsern *training* ki

nou pour, nou pe met *enforcement* parmi, i enn bann priyorite ki nou bezwen travay lo la.

I annan *legal officer* ki nou'n dir nou pe *recruit* pour konsolid nou lekip legal. E sa lekip legal se enn son rol se pour donn gidans nou bann dimoun ki fer *enforcement*, akoz aktyelman la, i pa ase kapasite pour nou kapab vreman donn ase gidans e fer sir ki bann dimoun ki dan seksyon *enforcement* i kapab travay antyerman.

E menm bann *authorized officers* partou an deor i ganny sa kapasite pour zot kapab, fer zot louvraz.

E Mr Speaker, kot i konsern *enforcement* osi nou bezwen konsyan ki i pa zis Minister, me i en keksoz i ganny fer en pe partou. I annan bann lezot lazans ki pran en bon pe sa rol e ki asiste nou avek *enforcement*. Nou annan lapolis, nou annan *Attorney Zeneral*, nou annan *Zidisyer*.

E alor Bidze pour *enforcement* ek resours pour *enforcement* i aktyelman disperse atraver lasenn, depi kot Minister ek dan diferan landrwa.

E alor pour nou, nou krwar ki avek zefor ki nou pe fer, ki enportan se sa zefor ki

nou pe fer, nou pour kapab amelyor sityasyon *enforcement* dan pei.

Sa lannen par egzanp nou bann *staff* in kapab *perform* ase byen. Nou vwar ki kantite *fixed penalty* i ganny donner, in monte.

E nou krwar ki avek kantite travay ki pe ganny fer, nou pour kapab kontinyen agrandi performans sa bann dimoun. Me osi kot i posibil, nou pour annan osi bann azisteman akoz petet ou bezwen plis *senior officers*.

Savedir pour annan bann azisteman kot nou pour bezwen promot, ouswa aziste pozisyon serten dimoun, pour nou kapab fer zot diriz plis *enforcement*.

Aktyelman la napa propozisyon pour nou aziste nou bann dimoun, me i annan posibilite ki avek bann formasyon ki nou fer, nou pour osi annan nou bann dimoun ki pour bouze pour vin dan pozisyon responsab, pour devlop sityasyon kondisyon *enforcement* dan Minister.

E osi administrasyon in *update* mwan ler nou pe koze, ki i annan diskisyon ki *ongoing* avek *PSB* lo lafason ki sa seksyon, ek *enforcement* ek *compliance* pour ganny devlope, pour nou kapab fini annan en

laform pour sa seksyon e son Bidze ki vin avek.

Me vi ki nou pa ankor konplet diskisyon, nou pour, nou pa pour kapab met li dan Bidze la deswit.

Me selman i annan zefor ki pe ganny fer Mr Speaker, e sa lannen i annan serten *areas* dan *enforcement* ki nou vwar i annan progre par nou bann *staff* e nou krwar i osi, enfliyanse par sa bann target ki nou'n mete dan nou sistenm *RDM* aktyelman, pour nou bann *staff*. Mersi.

HON SEBASTIEN PILLAY

(Off-Mic)

Si in ganny *fine*?

MR SPEAKER

Mersi. Ki - pardon?

HON SEBASTIEN PILLAY

Mon pa al pran letan Lasanble.

MR SPEAKER

En klarifikasyon?

HON SEBASTIEN PILLAY

Wi.

MR SPEAKER

Reste lo la.

HON SEBASTIEN PILLAY

Wi sa - sa lofans ki ti'n - ki nou'n vwar al dan piblik ki'n

ganny raporte la, ki'n arive avek sa mon'n demande? Eski nou'n pran-nou'n pran aksyon ek sa devloper? Eski i annan en *fine* ki'n gannyen? Sa ki mon ti ...

MR SPEAKER

Ale Minis, si ou kapab klarifye.

MINISTER FLAVIEN JOUBERT

Ok, Mr Speaker, mon ava pran bann detay avek bann *staff* mon ava donn - mon fer sir ki Onorab e menm si Lasanble i bezwen mon a fer zot gannyen.

Me selman lenformasyon ki mon ti annan a sa letan, ki mon pa ankor ganny en *update* lo la, se ki en pe sa bann travay ki ti pe ganny fer ti aktyelman pa form parti *Air Vegetation Management Plan*, be selman bezwen verifye kwa ki'n an deor sa *vegetation plan* e kwa ki'n aktyelman, in vin koman en lofans dan sa ka. Mersi.

MR SPEAKER

Mersi. Bon, mon'n nobou termin tou dimoun ti lo lalis e les mwan dir zot mon'n pran 21 Manm in nobou demann kestyon, nou pa pour ganny letan pas lo dezyenm *round*.

Me solman zot ava apresye ki nou'n kouver en kantite size e plis Manm in ganny sans poz kestyon, petet sa kestyon ki zot

ti pour demande koman dezyenm kestyon, in ganny sans ganny demande par en lot Manm.

Donk, mon tre satisfé avek mannyer sa prosedir pe ale. Sa Bidze nou pour vot li ansanm avek Bidze pour Lagrikiltir apre midi ler nou pran sa. Donk la nou a pran poz e nou a rebran 2er. Mersi.

(BREAK)

**DEPARTMENT OF
AGRICULTURE**

MR SPEAKER

Bonn apre midi tou dimoun e sirtou bonn apre midi Minis, ki'n rezwenn nou pour konsiderasyon Bidze Departman Lagrikiltir. E mon osi note ki nou zofisye -- Minister Finans in sanze Mr Jude Commettant, in ranplas Ms Tamatave - *Deputy Controller General* Mr Commettant e me Madanm Pool i kontinyen la.

E lo kote Departman Lagrikiltir byenveni Mr Keven Nancy, *PS* pour sa Departman; Mr Randy Stravens *Chief Biosecurity Officer*, e Mrs Nedzit Azemia *Direkter Human Resource* ek *Administration*.

Mon remersye zot tou biro – Bidze Departman Lagrikiltir i lo paz 445 ziskan 456 pour en total R114 milyon 316 mil. Minis, nou a demann ou lentrodiksyon lo Bidze.

**MINISTER FLAVIEN
JOUBERT**

Bonn apre midi bann Manm Lasanble. Bonn apre midi Mr Speaker; bonn apre midi bann dimoun ki pe ekoute. Mr Speaker, apre midi nou pour prezant Bidze pour Departman Lagrikiltir ki tonm anba nou Minister.

Mon ava komans par enn pti lentrodiksyon. Bomaten mon'n koz lo enn de bann size ki tous en pe lo sa ki Departman Lagrikiltir pe fer. Me mon a pas enn pti pe, en pe pli detay dan bann pwen ki konsern sa departman.

Bann keksoz ki nou'n arive *attend* dan lannen 2023, mon ava liste detrwa.

Enn, se ki nou'n arive aplik bann mezir, ki swiv bann odit ki nou'n fer lo kote furni bann materyo pour bann ferme. Ozordi mon kontan pour raport ek Lasanble ki nou *store*, depi komansman sa lannen ziskan Novanm in arive vann R7.5 milyon materyo avek ferme.

E nou *revolving fund* ki dan le pase nou ti pe demann Gouvernman larzan pour met ladan, in sorti mwens ki 1 milyon e ozordi i R5 milyon e i pe kontinyen grosi avek lavant ki nou pe fer.

E menm yer swar mon ganny konfirmasyon, ki dernyen *container* ki materyo pour sa mwan in arive – in ganny debarke. I annan ankor pe vini dan ankor de semenn. Alor nou pozitiv lo sa size.

Dezyenm keksoz ki mon kapab liste pour 2023 Mr Speaker, se ki nou'n kontinyen donn sipor Sekter *Livestock*. Menm si nou'n bezwen fer bann lazisteman lo kote *subsidy*, i annan bann sipor ki kontinyen.

E ozordi nou vwar ki bann azisteman dan lafason ki nou pe fer keksoz, bann pri lo marse in desann en pe. E nou ti a kontan pouse, kontinyen pouse pour ki pri i kontinyen desann.

E an menm tan nou bann diskisyon avek bann *supplier* i kontinyen, e nou laport i reste ouver pour diskisyon. E nou annan ankor bann fourniser ki pe vin devan, pour nou konverse avek zot. E nou ti a voudre evantelman nou ariv en pwen, kot nou pri lo marse i stabilize, e tou dimoun i kapab ganny manze a en pri rezonnab,

ki prezan nou, nou kapab sorti dan sa tranzaksyon.

Trwazyenm pwen Mr Speaker, se ki Departman avek Minister Ledikasyon, nou'n kapab remet debout, remet an plas Lekol Lagrikiltir. Aktyelman nou'n fer premye faz renovasyon e nou pe al fer dezyenm faz la.

I annan sistenm *hydroponic*, ek *shade house*, ek *nursery* ki pe al ganny met an plas, e nou ekspekte ki dan premye lanmwatye 2024, bann etidyan i kapab bouze an permanans sorti Grand Anse pour al Anse La Mouche. Ki vedir ki sa laranzman ek Lekol Grand Anse pour nepli egziste an 2024.

E dernyen keksoz ki mon ti a kontan leve koman enn bann keksoz ki'n arive *attend* 2023, se i en size ki nou pa tro kontan koz lo la byensir, me selman se lisyen.

Nou'n fer diferan diskisyon. Nou'n vin Lasanble. I annan plizyer konversasyon, plizyer argimant dan piblik. E mon kapab dir ki ozordi, nou relasyon avek bann group ki konsernen avek sa size, in *improve* en kantite.

Nou kantite travay ki nou pe fer avek bann lasosyasyon, ek dan bann landrwa piblik in ogmant en kantite.

E la menm dan bann mwan ki pe vini, nou pour annan bann linisyativ mazer ankor pour sterilizasyon ki nou pe fer. E osi i annan bann nouvo lareg ki nou pe fer sorti, pour ki nou kapab annan plis kontrol lo sa sityasyon lisyen dan pei.

E alor mwan mon reste pozitiv ki nou pour kapab *attend* nou lobzektif, kot dimoun i vreman konsyan son rol, i kapab met an plas bann mezir pour li kapab kontrol son zannimo lo nivo son lakour.

Kot bann *challenges* i konsernen, nou'n liste en pe dan dokiman. De landrwa ki mon krwar i mank nou - pour sa trwa landrwa ki mank nou, sipor e ki nou pe fer demars pour nou gannyen se *livestock* - devlopman *livestock*.

Nou pe rod sipor teknik e resers. Akoz nou bezwen plis kapasite pour nou kapab aplik byen bann resers e entrodwir nouvo metod pour bann ferme dan pei.

E osi *extension service* ki nou krwar e nou'n ekout byen bann ferme, e nou'n swiv byen bann travay ki mannyer in ganny fer. Nou krwar ki nou kapasite pour fer en bon *extension service*, i merit ganny amelyore.

I annan demars ki nou pe fer pour nou re- *train* nou bann zofisyè *extension* pou pe kapab donn sa pli bon servis.

Lot keksoz ki en *challenge*, se nou bann lenformasyon lafason ki i ganny zere anndan departman. Nou annan en demars ki nou pe fer la aktyelman, pour nou kapab ganny en sistenm pour *manage* kliyan dan departman.

Nou'n deza fer serten lesey, bann propozisyon ki nou'n gannyen, pa tou ki bon e alor nou pe fer en nouvo demars pour nou kapab ganny sistenm pour nou *manage*, dan en fason *digital*.

Nou bann kliyan ki nenport ki moman ki nou bezwen lenformasyon, nou a ganny lenformasyon lo *loan*, lo *lease*, lo tou detay prodiksyon bann dimoun ki anrezistre avek departman.

Bann priyorite pour lannen 2024-26 nou'n liste dan dokiman, me mon a zis enform Lasanble ki i annan de proze priyoriter ki nou pe lans ladan. Enn, i annan pou fer avek *FAO*, kot i annan en proze pour bann Pti Leta Zil Lafrik ki nou pe lans ladan deswit la.

E nou pe ekspekte ki larzan i kapab ganny debloke dan bann 2024, kot nou pour kapab lans bann proze ki

annan pou fer avek adaptasyon klima, pour lagrikiltir dan sa bann pei. Sesel ava ganny en konponan ladan.

E lot se ki nou annan en *agricultural census* ki nou ler dan lannen ki pe vini, ki pour ed nou ganny en pli bon portre e aziste nou program an relasyon avek bann lenformasyon ki nou anmase dan sa peryod letan.

Pour al en pe pli spesifikman lo Bidze Mr Speaker, Bidze parey ou'n mansyonnen i R114 milyon 736 mil, e sa i distribye anba 6 program pour sa departman.

Nou osi konsyan ki annan plizyer lezot fasilite ki ganny met akote sa Bidze, pour fasilite travay bann dimoun ki dan sekter e nou kontan ki Minister Finans, nou'n kapab ganny en konversasyon avek zot.

E ozordi nou vwar ki Fon *ADF (Agriculture Development Fund)*, in ogmante dan en fason enportan, in ariv R60 milyon, ki fer ki nou a kapab annan bokou plis larzan pour ofer bann dimoun ki le fer devlopman lagrikiltir dan pei e pour zot mete anver zot proze.

An zeneral Bidze pour *wages and salaries*, in ogmante par R1.116 milyon, e sa ogmantasyon i prensipalman pour kouver peyman trezyenm

mwan e osi 10poursan ogmantasyon saler.

E en sonm R5.268 mil ki enkli revizyon saler bann nouvo *post*, e sa i osi pran kont bann *allowance* ki'n ganny *consolidated*. I osi annan en ogmantasyon 839 mil ki'n ganny transfer anba Bidze Departman Lagrikiltir atraver *Cleaners Corporative*.

Savedir bann mouvman ki pe arive, konsernan bann dimoun ki pe fer netwayaz dan bann batiman eksetera.

Pour konponan *goods and services* en total 45 milyon in ganny bidzete pour 2024 e sa i an mwens – i mwens ki an 2023 par 39.8 milyon. Sa i reprezant en rediksyon anba diferan kod tel ki *office expenses*, ki'n redwir par 800 mil – 872 mil, *transportation and travel* ki en rediksyon 80 mil, *maintenance and repair* en rediksyon 90 mil e *materials and supply* en rediksyon R456 mil.

Anba konponan *goods and services* i annan en nouvo alokasyon Bidze, anba program 1 pour *other service agreement* ki pour fasilite lenplimantasyon *agricultural census* parey mon'n dir, ki'n ganny planifye komansman lannen 2024, e sa i pour en sonm R1 milyon.

Anba konponan *other goods and services*, i annan en sonm R31 milyon ki'n ganny bidzete pour 2024, avek en rediksyon 37 milyon an mwens. Me sa i prensipalman ki annan pour fer avek *subsidy* lo manze zannimo ki'n ganny redwir, apre ki nou'n pran sa desizyon sa lannen, kot i konsern laplikasyon *subsidy* pour *animal feed* dan pei.

Me par kont Mr Speaker, i enportan pour note ki dan Bidze 2024, i annan en sonm 15.8 milyon ki'n ganny mentenir pour kontinyen siport lezot program *subsidy*. Sa i vedir labatwar, karkas, *day-old chicks*, ek transportasyon ant bann zil. Ki vedir ki, *subsidy* pe sorti zis lo manze zannimo, me i pa pe sorti lo bann lezot sipor ki nou donn bann ferme ki dan *livestock sector*.

Pour *minor capital outlays* i annan en sonm 693 mil ki'n ganny bidzete pour 2024 avek en rediksyon 759 mil, an mwens ki 2023. Pour bann proze kapital, anba konponan *non-financial assets*, i annan en son R25.6 milyon ki'n ganny bidzete pour finans 15 diferan proze an 2024.

Sa i en pe mwens ki 2023. Me 2023 en pe bann larzan ti pe ganny servi pour *subsidy*

annefe, e pa tou ki ti pe al dan *capital projects*.

Apre i annan en lot Mr Speaker, kot i konsern Lekol *SIAH*, me mon krwar mon'n koz en pe lo la, mon pa pour al plis ki sa. Mersi bokou.

MR SPEAKER

Mersi Minis. Nou a pran lentervansyon bann Manm. Onorab Georges Romain.

HON GEORGES ROMAIN

Mersi Mr Speaker. Bonn apre midi Mr Speaker. Minis, bonn apre midi avek ou delegasyon. Mr Speaker, avan mon demann mon kestyon, eski mon kapab demann de oubyen zis enn pour lemoman - lo premye kestyon?

MR SPEAKER

Annou demann enn pour lemoman. Nou a refer otan ki letan, nou annan nou a repase.

HON GEORGES ROMAIN

Ok. Mersi Mr Speaker. Minis, mon kestyon i lo kote irigasyon. Mon ti fer dan mon *Reply* pour Bidze, mon ti fer mansyon lo la 3.5 milyon e la mon vwar i klerman dan Bidze i pe koz lo la.

Alors mon kestyon, *PS* i okouran byen, nou problem delo dan La Gogue, kot i afekte bokou bann ferme. La nou pe ganny bokou delo, bokou lapli

nou apresye, me selman i *still* en problemm.

Mon kestyon mon ti a kontan demann Minis, an vi ki *PS* parey mon'n fer resorti *PS* i okouran Minis, kan nou – pou sa proze 2024, kan apepre i pour ganny materyalize?

Anvi ki sa problemm i en pe letan i la e nou annan – mon krwar nou ti pe esper konekte zis en pe tiyo ek en laponp en keksoz koumsa. Si Minis i - oubyen atraver *PS* i kapab, *confirm* lannen 2024 sa pour ganny materyalize? Mersi Mr Speaker.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mon a pas laparol avek *PS* Nancy pour reponn. Mersi.

MR SPEAKER

PS?

PS KEVEN NANCY

Mersi Chairman. Mersi. Bonn apre midi Onorab. Mersi pour kestyon. Parey ou pe dir, nou'n kominike a plizyer repriz, i annan proze an – La Gogue ki nou'n fini fer, anler Dan Kafé. Me par kont i annan bann lezot

ki nou, nou pour kontinyen avek.

Parey i annan sa enn pli gro ki ou'n, ki nou ti pe koz lo la, se ki nou pran delo anba anvoy anler. E sa definitivman nou bezwen fer li dan sa Bidze ki nou'n gannye la, pour nou mont avek anler.

E apre sa i ava fer delo desann par gravite anba savedir i a mont dan sa premye – ou konn byen bann lozistik, e nou a kontinyen kominike pour nou fer sir ki bann fermye La Gogue i ganny delo. Mersi.

MR SPEAKER

Mersi *PS*. Onorab William?

HON WAVEN WILLIAM

Mersi Mr Chair. Bonn apre midi Minis avek ou lekip. Mr Chair, mon ti a kontan demann Minis mon pe regard latab 4 '*performance measures for programme*', en bann lenformasyon ki enteres nou koman Manm Lasanble se, ki pozisyon ou ete avek prodiktivite letan nou pe koz, sekirite alimanter avek otosifzans konsernan prodiksyon *broiler, pork, crops* avek dizef dan pei?

So ki nivo nou ete ozordi la avek program ki'n ganny lanse? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mersi Onorab pour sa pwen. Mr Speaker, parey mon'n eksplike, nou annan en resansman mazer ki nou pe al fer komansman Zanbye sa lannen – (*sorry*) Zanbye 2024, pour nou vremen anmas tou lenformasyon lo prodiksyon dan pei, pour nou vremen konpran sityasyon kot i ete.

Me selman kot i konsern *pork* ek *broiler*, klerman in annan bann mouvman pozitiv ek negativ dan tou lede sekter. Ozordi i annan bann difikilte ki bann ferme pe anvoy lenformasyon kot nou, kot i konsern *pork*, zot pe ganny bann difikilte lo lavant *pork*. E zot pe ganny bann problem kot i annan bann mekontantman ant ferme ek bouse dan pei, kot zot pa pe ganny lavant *pork*.

E nou, nou lapros se ki nou, nou ti a voudre annan plis posibilite pour sa bann dimoun, vann zot prop materyo pour ki zot kapab fer zot profi.

Nou pa'n okouran si i annan okenn landrwa ki prodwi *pork* ki'n fermen

aktyelman, ki'n aret prodiksyon.

Me parey mon pe dir i kler poudir i annan en serten endikater ki montre ki *pork* i pa neserman dan son kondisyon ideal aktyelman.

Me solman bann lenformasyon statistik, *census* ki pour dir nou egzakteman ki *volume* ki nou annan. Lot keksoz kot i konsern poul, poul osi in annan bann diferan mouvman, monte desann e sa in relye avek bann mank konfyans, ouswa annan konfyans dapre kantite *supply animal feed lo market*.

Nou pe sey fer mannyer pour nou stabiliz *animal feed lo market* e nou ekspekte ki letan nou stabilize, bann ki ti dan prodiksyon poul zot a kapab antre e prodwir bokou plis.

Me ankor nou pa okouran si annan okenn laferm ki'n aret prodwi poul. Me selman nou konnen poudir prodiksyon in monte desann dapre bann difikilte ki'n arive lo kote *supply* pour manze. E nou konnen poudir manze i pa zis en kestyon annan ouswa napa.

Me i parfwa annan bann faktor osi, par egzanp *cashflow* sa bann dimoun, par egzanp *credit facility* bann keksoz koumsa ki anpes dimoun *access* materyo ek menm

access avek *day-old chicks*, pour zot kapab *stoke* e apre fer prodiksyon.

Alor lo kote *broiler*, mon pou dir ki'n annan monte ek desann. E potansyelman lala kot nou ete, i pa neserman lo sa nivo ki ti ete komansman lannen.

Me nou pe ekspekte si nou stabiliz sityasyon e si nou kontinyen annan bann pri ki stab, nou kapab vwar en amelyorasyon dan sityasyon prodiksyon pour *broiler*.

Me lot keksoz se dizef. Dizef nou pa'n vwar gran sanzman dapre bann lenformasyon ki bann *staff* anmennen lo lakantite ki ganny prodwir, me selman in annan bann sanzman dan pri dizef; dapre demann, dapre bann mouvman konsonmasyon lokal, konsonmasyon par lotel ek touris, eksetera.

E alor in annan bann lazisteman dan pri dan lannen, me dizef nou pa vwar en rediksyon dan lakantite dizef ki annan. Nou ki nou ti a kontan vwar se, stabiliz bann ki deza la e donn zot sa konfidans, pour zot retourn lo sa nivo kot zot ti ete dan bann lannen ki'n pase.

Me osi an menm tan ankouraz bann nouvo ki kapab azout avek sa ki la. Ee osi akote sa, nou bezwen fer sir ki nou

adres sa size lavant aköz lavant i lakle pour tou sa bann *area* prodiksyon depi *broiler pork*, eksetera.

Menm si nou poudir i prodwir, si i napa en bon lavant napa en bon fason pour kliyan akse sa bann lavyann. E si napa en bon fason pour bann lezot dimoun ki aste par egzant bann lotel ouswa lezot, ki zot pa satisfè avek standar, nou pour dan problem.

Alor nou bezwen adres oi sa size lavant, *outlets* e kalite prodwi ki nou pe met lo *market*. Mersi.

MR SPEAKER

Mersi Minis. Onorab Loze?

HON JOHAN LOZE

Mersi Mr Speaker. Mr Speaker, an pasan mon le komans par note ki ozordi i lanniverser Prezidan France Albert Rene, arsitek Sesel modern. Mon le sezi lokazyon pour mwan swet tou son bann fanmir, zanmi senpatizer, e siporter en bon lazournen refleksyon lo lavi sa zonn ki'n pouse pour moderniz nou pei.

(APPLAUSE)

HON JOHAN LOZE

Mr Speaker, mon kekyon pour Minis i konsern - i en pe lo size

ki i fek aborde, be selman Minis ou'n koz lo *short term fluctuation* dan prodiksyon e *supply*.

Ou'n koz osi lo *subsidy* ki'n ganny bese. Mon ti le poz ou en kestyon Minis; swivan bes dan *subsidy*, ki bann previzyon lonterm dan prodiksyon *livestock* Sesel? Pa sa bann *short term fluctuation*, be selman a lonterm kit zot analiz pe dir zot?

E *what is the way forward?* E ki previzyon – provizyon (*sorry*) provizyon finansyel dan Bidze i annan, pour siport en stratezi lonterm? Pou anmenn sa vizyon ki ou pe dir, ou anvi stabilizasyon, ou anvi ferme retournen pour retourn lo nivo prodiksyon ki ti annan dan lepase. Me pour lonterm Minis.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker. Mersi Onorab pour sa kestyon. Mr Speaker, previzyon lonterm bann teknisyen, ek bann dimoun ki'n fer bann verifikasyon, zot in donn nou en lendikasyon ki prodiksyon i kapab kontinyen Sesel li.

Nou napa nanryen ki anpes dimoun antre dan prodiksyon. Bann faktor i la pour dimoun kapab kontinyen dan prodiksyon.

Me selman i annan plizyer keksoz ki bloke, e ki a fer ki sa ki antre dan prodiksyon i pa ganny en ranman ki fer sans.

Par egzanzp, nou annan konpetisyon avek lenportasyon, sa i en keksoz ki pour menas prodiksyon dan lonterm, menm si nou pour ankouraz dimoun pour prodwir.

Nou annan lavant ek kalite prodwi ki parey mon'n dir pli boner, ki en problem. E nou, nou krwar ki si nou adres en bon pe sa bann keksoz *long-term*, nou kapab vwar en logmantasyon dan prodiksyon.

Akoz menm ozordi i annan plizyer dimoun, ki ankor pe espere pour antre dan prodiksyon *livestock* dan pei.

Mon a donn ou serten legzanp - i annan dimoun ki'n pare pour investir dan fasilite *processing* pour *white meat*, e sa i lo latib e i en kestyon zis finaliz bann laranzman. Savedir sa bann dimoun in analize, zot in vwar poudir zot konfidan ki zot kapab fer en ranman ladan.

Ozordi nou annan dimoun ki pe espere, pour nou fini avek

sa proze 8 *plots* Praslin, Grand Anse Praslin pour fer *livestock*, ki pour enkli poul ek koson.

Ozordi i annan serten laferm ki'n fermen, kot nou annan dimoun ki pe espere pour antre lo la lo Mahe. E nou pe fer bann laranzman pour nou kapab met annord tou bann zis legal, *lease*, eksetera.

I annan ki'n demann nou lenformasyon lo labatwar ki nou pe fer, zot enterese pour *operate* labatwar e *process* atraver sa bann fasilite.

E alor i annan en kantite demann; i annan en kantite lentere, e i annan en kantite lendikasyon ki nou pour *still* kapab vann prodwi lokal e dimoun pour *still* kapab prodwir, tan ki tou bann fakter ki siport zot i kontinyen reste annord, sirtou par egzanp lo kote manze, e lo kote bann fasilite parey *loan*, eksetera.

Me parey mon'n dir enportasyon i reste en *challenge*. Nou bezwen mazin byen ki lenportasyon pe kontinyen *gronny, ouswa ronny lagrikiltir lokal lo kote *livestock*. Me osi lo kote menm legim, kot nou vwar en kantite bann keksoz ki nou pa ti vwar avan. Parey nou vwar zepis pe antre; kot dimoun pe konplent pe dir mwan i annan zepis ki pe ganny enporte, prezan pe

compete avek prodiksyon zepis lokal.

I annan en kantite bann *areas* kot dousman, dousman lenportasyon pe vin en *challenge*. E nou bezwen trouv en fason pour nou kapab vremen prodwir lo sa nivo pour satisfere bezwen lokal.

Lot *area* Onorab, ki fer mwan krwar ki keksoz i pa pour neserman pli pir ki ozordi, se ki bann lentere i kontinyen reste pour nou prodwir lo zil. E i annan serten demars ki pe ganny fer pour get dan prodiksyon lo bann zil, pour ki nou kapab azout ek sa ki nou annan lo Mahe e Praslin e La Digue, pour anmenn lo marse lokal.

Alor i annan sa lentere. I annan sa konfidans dan marse, e i annan sa demann osi par dimoun an deor. I annan bokou, bokou demann par bann dimoun an deor.

Mon a donn ou legzanp, letan mon'n al bann aktivite ki resaman in fer par Lagrikiltir, i annan dimoun ki dir ou poudir bann piblik pli an pli zot remarke, menm bann dimoun ki dan prodiksyon, pli an pli zot remarke ki piblik pe demann en kantite bann prodwi ki ganny prodwi lokalman, sirtou bann gro manze, sirtou bann legim ki

ganny prodwi lokal par bann pti fermye eksetera.

E sa i pa mwan ki pe envante sa i bann dimoun ki dan prodiksyon ki dir ou demann anver zot pe ogmante.

Alor i annan sa demann. E mwan mon krwar ki si nou travay parey lo bann faktor sipor, e nou larg lanmen bann dimoun pour zot kapab debourye, nou pour vwar en amelyorasyon dan prodiksyon e amelyorasyon dan marse pour prodwi lagrikiltir dan pei.

Sa i mon vizyon *long-term* avek bann lenformasyon ki mon'n gannyen sorti an deor. Me ki nou, nou pe fer lo kote departman? Parey mon'n dir lo kote *livestock*, nou pe rod sipor adisyonnèl pour nou kapab siport bann dimoun.

Nou ti a voudre ki nou annan *extension service* e nou fer *training*, nou'n fer laranzman pour *training* pour nou bann *extension service* kapab donn sa lenformasyon pli korek.

Avek bann laranzman ki nou pe fer lo *store*, nou pour kapab *supply* pli bon kalite lekipman, e pli bon varyete lekipman pour bann dimoun kapab fer zot travay e dan en kantite pli enportan.

E avek nou bann fason ki nou *manage* anndan dan

departman, nou ti a voudre ki annan plis fasilite pour dimoun kapab vremen devlop zot lekor vitman.

Loan par egzanp, *lease*, later ek bann dokimantasyon ek bann prosedir administratif i bezwen ganny fer pour zot bouz devan. Sa nou ti a voudre ki i bouz pli vit. E nou pe aktyelman fer bann analiz, anndan pour nou konpran ki mannyer nou pour fer li mars pli byen. Mersi.

MR SPEAKER

Mersi Minis. Onorab Labonte.

HON ANDY LABONTE

Mersi Mr Chair. Mr Chair, mon kestyon i al koumsa. So Minis, vi ki mwan mon konsider mon lekor koman en dimoun ki kontan zannimo e mon'n apresye ler ou dir poudir ou relasyon in *improve*, an relasyon avek bann endividi ki kontan zannimo.

So, mon annan en kestyon me petet ki pour pran de laspe. Ler mon'n get Bidze li menm li mon'n get pour ou manda, mon'n get ou bann *achievement*, mon'n get ou bann priyorite, mon pa vremen vwar nanryen ki kouver lo kote byennet obyen veteriner servis li menm li.

Me selman ler mon'n get ou Bidze anba *programme 4*, '*Animal Health Production SP1*' i kouver servis veteriner. So an zeneral i annan en Bidze 8 milyon ekek ki'n ganny prozekte.

Mon kestyon i, ki vreman i annan dan sa Bidze pour si oule pran ka avek zannimo? Dan le sans se ki vi ki nou annan en, nou annan en klinik ki prive, veteriner i pe fer bon servis ki nou apresye, me selman i annan en mankman dan pei.

E *at the same time*, menm landrwa i annan bann batiman la ki an rin, ki pa pe ganny servi parey i merite, petet eski zot pe mazin petet *extent* sa servis oubyen ouver avek lezot? Konmsi ki vreman ou pe mazin fer dan sa Bidze pour byennet zannimo li menm li? Mersi.

MR SPEAKER

Mersi Onorab. Minis?

MINISTER FLAVIEN JOUBERT

Mersi Mr Speaker e mersi Onorab pour sa kestyon. Mr Speaker, zis pour met a latansyon Lasanble, par egzant bann aktivite ki nou fer pour sterilizasyon sa lannen, en bon pe sa bann – aktivite in ganny siporte par bann fon sorti kot Lanvironnman atraver *ETF*.

Akoz parey mon'n dir bomaten, dan nou Minister nou pe fer mannyer pour nou kordin bokou plis ant nou bann departman. E nou pe rod fason pour nou siport bann aktivite ki annan lenpak dan kominote, sa i enkli *welfare* bann zannimo, e i annan ankor bann aktivite ki pe ganny fer la.

Alor i annan serten aktivite ki ganny finanse pa toutafe anba sa Bidze li menm. Letan i annan bann debordman nou rod larzan lezot landrwa e nou siport sa bann kalite aktivite.

Me bann keksoz par egzant ki pour tous lo sipor pour *welfare* zannimo; par egzant *vet services*, i annan en *rental* mon krwar, dan nou Bidze e sa *rental* i annan pour fer avek larive – avek landrwa reste pour veteriner ki pe travay avek departman.

Nou annan osi bann prodwi ki nou pour fer vini, e sa i annan bann provizyon ki deza la ki pour servi pour siport bann aktivite ki nou fer; sterilizasyon ouswa sipor veteriner ki bann dimoun i bezwen.

Me lot keksoz - zis pour enform Onorab - se ki kot i konsern veteriner, nou osi nou'n fini pas *Cabinet* avek en propozisyon pour annan en

framework pour veteriner dan pei, ki ava ankouraz bokou plis klinik prive veteriner ganny *set up*.

Nou, nou oule ki i annan en *framework* parey lezot pei, pa zis aköz nou ti a kontan kontrol veteriner. Me aköz nou krwar i annan en nesosite pour bann veteriner ganny ankadre parey dokter ek ners i ganny ankadre.

Aküz veteriner zot travay avek bann prodwir ki annan lenpak lo lasante imen, parey antibyotik, parey bann diferan prodwi kontrole, bann drog kontrole eksetera.

Ki nou ti a voudre ki annan en lankadremman formel pour sa. Alors sa osi nou ti a voudre ki letan sa i vin an plas, i pour osi ankouraz lezot pour zot *set up* zot klinik, e donn sa servis bann dimoun parey sa klinik ki ou'n nonmen, ki deza egziste dan pei.

Alor pour nou menm si, nou pa pe annan, nou pa pe met larzan direktman pour nou dir sa pour *animal welfare*, i annan bann sipor ki nou pe vin avek sorti dan diferan parti nou Bidze.

E i annan bann laranzman ki nou pe fer ki pour ankouraz bokou plis latansyon lo sa size, anmezir ki keksoz i progresse dan pei. Mersi.

MR SPEAKER

Mersi. Onorab, *sorry*, ou repons in ase konplet, mon annan en kantite Manm pe espere, mon a pran kestyon Onorab Roucou.

HON MICHEL ROUCOU

Mersi Mr Speaker. Bonn apre midi a tous. Minis, mon kestyon i enn pti pe dan laliny avek Onorab Herminie. Si ou kapab dir nou – mon'n sey gete la, ki provizyon zot annan dan sa Bidze la, pour *training* bann asistan veteriner?

Ki sa demen i ava kapab ede pour tir enn pti pe presyon, i a vin koman en *para-vet* ki pour ed bann veteriner ki la ki tir en pe presyon lo bann travay ki annan? Mersi.

MR SPEAKER

Mersi. Minis?

MINISTER FLAVIEN JOUBERT

Yes. Mersi Mr Speaker. Mersi Onorab. Onorab pour – Mr Speaker mon zis pas enn pti kou lo enn pti pwen ki Onorab Labonte ti leve. Zis pour fer le pwen ki nou ti'n demande aktyelman *additional welfare animal officers*, nou ti'n demann 2.

Me nou pa'n gannyen dan Bidze aköz nou *ceiling*. So, i enn

bann demann ki nou ti fer ki ti pour direktman, annan en lenfliyans lo sa size *animal welfare*.

Me kot i konsern *training of vet assistant*, nou'n deza pe fer en kalkil. Nou pa ankor trouv resours pour li e nou pa kapab met li dan Bidze aköz napa lespas pour lemoman.

Me selman koman parti nou zefor, ki annan pour fer avek veteriner ek bann *para-vets*, i annan en provizyon ki nou pe - nou baz kalkil se ki apepre letan nou fer verifikasyon avek Liniversite *Maurice*, i kout R300 mil par latet, pour *train en para-vet over* en peryod letan, pour li kapab *upgrade* son kapasite pour li ganny son *license* dan en fason.

Alor nou pe rod fason pour nou kapab trouv sa Bidze, petet nou pa pour trouv li anba nou Bidze, petet nou pour trouv li anba bann Bidze *training* Nasyonal.

Be i nou lentansyon pour nou *upgrade* 15 *para-vets*, dimoun ki dan departman e dimoun ki an deor departman, pour zot kapab vin lo sa nivo, kot zot kapab ganny sertifye konmkwa zot kapab donn sa servis, profesyonnel pour *animal welfare*, siport aktivite veteriner eksetera, eksetera. Mersi.

MR SPEAKER

Mersi. Onorab Lemiel.

HON SYLVANNE LEMIEL

Mersi Mr Chair. Bonn apre midi Minis ek nouvo delegasyon. Minis, nou konnen poudir, menm si departman i pe vremen seye, me i toultan annan bann defi.

E bann lezot konplent ki ou tann fermye li menm, fermye ou kapab dir *both* lo kote ki plante, fermye ki fer *livestock*, i toultan annan bann konplent.

E mwan mon ti a kontan konnen atraver Bidze 2024, petet ki ou Minister pe fer atraver sa Bidze, pour zot kapab adres sa bann defi e osi sa bann de-satisfaksyon petet, ki bann fermye i annan?

E an menm tan ou'n nonm ou annan 15 diferan proze pour fer an 2024, petet nou ti a kontan Mr Chair, Minis i dir nou, lekel sa 15 proze ki ou'n ganny larzan pour ofer pandan lannen 2024 osi? Mersi.

MR SPEAKER

Mersi. Minis?

MINISTER **JOUBERT**

FLAVIEN

Mr Speaker, mersi. Mersi Onorab, mersi Mr Speaker. Mon ava zis pas enn pti pe lo sa

size ki nou pe fer pour nou adres konsern bann fermye e apre mon a les *PS* pas lo sa 15 proze.

Mr Speaker, kot i konsern fermye, enn bann keksoz ki mon'n nonmen ki direktman enpakte bann fermye se, kalite servis zot gannyen letan bann zofisy e i apros zot, e letan i fer kontak avek zot.

Nou rekonnèt ki nou bezwen *upgrade* nou, *extension service* e nou pe fer *training*, i annan *training* ki'n plan pour zot ganny *upgrade* e teste pour zot kapab donn en bon servis.

Nou pe osi adres nou servis lakonpanyman pour *loan* ek devlopman pti biznes dan lagrikiltir, e sa i en keksoz ki nou pe fer konzwentman avek nou *partner DBS*.

Me i osi annan demann ki nou'n fer an deor, pour nou ganny sipor, pour nou bann zofisy kapab akonpany bann fermye, depi ler zot met zot nide ater ziskan ler zot proze devlope e anmezir zot avanse.

E osi i annan nou bann servis sipor, ki nou pe travay for parey mon'n endike, pour nou fer sir ki letan en dimoun i vini i pe rod tel materyo, i pe rod tel kalite keksoz, i kapab gannyen.

E menm ler i al rod son *loan*, i annan konsern, ki konsern *disbursement of loan*

par egzanp, i annan diskisyon avek Minister Finans. E nou kontan ki Minister Finans in aktyelman in antre en bon pe ladan.

E zot pe fer sa, parey entermedyer avek *DBS*, pour ki nou kapab annan en fasilite ki pli vit, e sa i enn bann landrwa ki dimoun toultan i *call* mwan e zot konplent ki zot in fini fer tou prosedir, me zot larzan pa pe ariv kot zot vitman.

Alor sa i en keksoz ki nou pe fer pour nou adres konsern. I annan osi bann size *lease* ek bann rikord. Parey mon'n dir i annan problem rikord ek lafason ki nou *manage* bann lenformasyon dan departman.

E nou pe rod fason pour nou aranz sa, pour ki nou kapab ganny pli bon kalite rikord. I annan de fwa kot problem i leve, senpleman akoz dan nou sistenm rikord i annan fot, ouswa sa fot i dan en *file* e apre sa *file* i ganny difikilte pour li bouze, tel landrwa pour lot kote. E sa i kree en pe problem dan kalite ek lavites servis ki nou donn bann fermye.

Apre sa Mr Speaker, Onorab, nou annan osi bann size pratik par egzanp provizyon delo, par egzanp semen, ki nou pe fer tou nou posibil pou nou kapab blok sa

vitman. Par egzanp ek *SLTA* nou annan en program pour nou met koltar dan serten landrwa.

Nou annan program delo, nou annan fasilite parey elektrisite, ek bann fasilite pour dimoun ki'n fek antre lo bann nouvo landrwa pour zot kapab devlop zot landrwa.

Alors sa i bann zefor ki nou pe fer *internally*. I ganny kouver partou, partou dan Bidze, dan proze, dan nou *training*, dan devlopman fasilite *loan* eksetera. Me i napa en bout spesifik ki koz lo fermye e adres zot problem.

Me i ganny disperse partou. Me mon kapab asir ou Onorab, lo tou bann pwen ki ou'n leve, ki bann fermye pe konplent nou kapab donn ou bann repons pour en bon pe sa bann kestyon. Menm si nou pa ankor arive rezourd zot aktyelman, antyerman.

Me solman nou pe seye, e nou krwar ki sa Bidze i pour ed nou pour nou fer sa. Mersi.

MR SPEAKER

Mersi. *PS*, si ou pour donn detay, si ou pour nonm bann proze sa i en dezyenm size ki Onorab in leve. Donk, nou bezwen 15 proze, ou pour bezwen zis donn non sa bann

proze. Nou pa pour ganny letan antre dan detay. Mersi.

PS KEVEN NANCY

Mersi Mr Chairman. Mersi Onorab pour ou kestyon lo lalis proze pour an 2024. Mon a pas vitman lo la akoz pour kontrent letan.

Nou annan proze nimeron enn; Bazar Anse Boileau ek Bazar La Retraite. Sa i en kontinyasyon, akoz nou'n fini dan bann faz an *planning* ek bann faz *ground setting*, pour ki nou demare ek sa de proze, ki vremen enportan.

Nou annan *road diversion* Cap Samy Praslin, ki en kontinyasyon apre nou annan *surfacing of roads*. Nou'n met li *surfacing of roads*, akoz nou annan en lalis semen lo bann laferm ki nou anvi, oubyen ki dan bann landrwa *agricultural zones*, ki nou bezwen fer *surfacing* lo la.

E nou'n met li koumsa, ki i vin pli fasil apre pour nou kapab lyez avek *Land Transport*.

E i annan sa kontinyasyon *asphalting of roads at Au Cap Amitie*.

Apre semen La Digue Grand Anse kot nou'n met en kominote fermye laba ki fek ganny later.

I annan upgrading of *Research Center*, akoz nou annan *research center* ki'n fer son *building* apepre 2 an pase, e fodre toultan ou pe kit li *up to maintenance*, pour ki i pa vin difisil pli tar pour nou kapab *maintain* li.

Nou annan *upgrading of irrigation systems*. Parey ou okouran nou annan en lalis *irrigation system* dan bann *agricultural zones*, ki nou bezwen *maintain*, pour ki bann ferme i ganny delo *at farm level*.

Desilting project of rivers and marshes, ki nou travay tre pros avek lanvironnman, pour ki ferme pa ganny bokou problemm ler ou annan lapli, oubyen ler ou annan *floods* ki monte.

Mon annan *irrigation – I mean upgrading of buildings*, bann diferan *buildings* departman.

Construction of dog pound. Nou annan en *dog pound* lo Mahe ki'n preski fini, nou pe servi li la. Be i annan enn lo Praslin ki nou anvizaz-e fer pour ki nou anmenn *animal welfare*, tou en pe li Praslin e nou met en pe kontrol, kontrol lisyen.

Nou annan *construction of abattoir*, nou annan sa labatwar lo Mahe, Providence *zone 18*. E

nou'n fini komans bann *groundwork*, nou'n fini donn Kontra pour komans travay lo la.

E nou annan *upgrading of pig genetic center* ki baze Grand Anse e sa i osi annan bann serten travay ki nou pe fer lo la, pour ki nou met landrwa *up-to-date* pour ki nou kapab *provide* sa servis ki nou pe donner.

Upgrading of Victoria Market, i en kontinyasyon sa travay ki nou'n ti komans fer *groundwork* sa lannen. E i pa'n fasil, akoz nou'n bezwen re-rod *blueprint* pour nou kapab fer sa dezyenm faz.

E i annan *complete renovation of Victoria Market*. Li i sa bout bann ki nou'n komans travay lo la, par egzamp *Butchers' Shop*, i annan bann serten travay ki nou'n fer, *stainless steel cabinet*. E kot bann vander menm i vann, i annan serten travay ki nou pe fer lo la.

Upgrading of Bulk Store Mahe ek Praslin tou. Setadir nou *Bulk Store* i landrwa kot nou fer nou bann materyo *inputs* lagrikiltir antre, e *from the Bulk Store* apre i al dan bann *Requisite Store*.

Savedir sa *Bulk Store*, nou'n fini avek en premye faz e la pour lannen prosen 2024,

nou a kontinyen avek sa dezyenm faz.

I annan *upgrading of - renovation of extension building*. Nou annan en *extension building* pour nou bann zofisye ekstansyon Beoliere, e sa *building* i dan en sityasyon ki pa byen e vwala 2024, nou bezwen mazin *staff welfare* tou. E 2024 nou pour kontinyen ek sa proze pour ki nou fini avek sa *renovation of the extension building*.

E vwala sa lalis 15 proze pour lannen prosen. E i annan ki nou'n fini komans fer bann faz inisyal, pour ki koman 2024 i komanse nou demare avek. Mersi Mr Speaker.

MR SPEAKER

Mersi. Onorab Philip Arissol.

HON PHILIP ARISSOL

Mersi Mr Chair. Bonn apre midi tou bann dimoun. Minis anba *PSIP* mon vwar i annan en sonm R3.5 milyon, pour *upgrade* sistenm irigasyon. Minis, mon ti a kontan konnen si sa proze *gabion* ki ti pe fer anler Montagne Posée, pour osi enkli dan sa proze?

Pour asire ki bann fermye dan mon distrik Montagne Posée avek Hermitage i kapab finalman ganny en pe delo. Mersi.

MR SPEAKER

Mersi. Minis? *Panel?*

MINISTER FLAVIEN JOUBERT

Mersi Mr Speaker. Mersi Onorab. Mon a pas laparol avek *PS* pour donn detay.

MR SPEAKER

PS, ou adrese?

PS KEVEN NANCY

Mersi Onorab pour ou kestyon. Sa proze *gabion* Montagne Posée, i ankor *still* dan nou program e i annan bann travay ki'n ganny fer lo la. I annan bann vizit ki'n ganny fer avek bann zofisye lagrikiltir, e menm avek kontrakter avek konsiltan ki pour ed nou fer sa *gabion*.

E *gabion* i dan en staz kot bann materyo i lo *site*. E ti annan en zafer avek lokasyon ki nou'n fini finalize la, e la nou'n ganny konsiltan ki pour komans travay lo la, e nou a demare avek sa *gabion* osito posib.

Akoz i ankor *still* dan nou program. Akoz nou okouran ki sa *gabion* i vremen enportan, pour donn bann fermye Anse Boileau delo bann ki par lao nou premye baraz anba. Mersi.

MR SPEAKER

Mersi.

(Off-Mic)

PS KEVEN NANCY

Pardon?

MR SPEAKER

Onorab?

PS KEVEN NANCY

(I pe demann mwan ki si sa *gabion*). *Gabion* i en baraz parey ou'n vwar Dan Sours, parey ou'n vwar Val D'en D'Or, i en baraz ki fer avek fil avek ros, akoz nou pa le met tro bokou *hardcore infrastructure* beton, dan bann landrwa en pe dan bwa.

Alor en *gabion* i pli *environmentally friendly*, pour ganny delo. Mersi.

MR SPEAKER

Mersi. Onorab Woodcock.

HON WAVEL WOODCOCK

Mersi Mr Chair. Ozordi le 16 Novanm, en zour refleksyon pour tou bann zanfan ki pa'n ganny sans selebre laniverser avek zot papa. Akoz zot ti ganny swa touye, ouswa ganny fer disparet par en diktater ki ti selebre son laniverser ozordi!

MR SPEAKER

Ok. Alright.

HON WAVEL WOODCOCK

Mon kestyon-mon kestyon i trouve anba 'PSIP' dan proze kapital, "*complete renovation of Praslin offices and store*". I annan en sonm R10 milyon total, kou total sa proze.

I annan 4 milyon pour 2025, e 6 milyon pour 2026 e osi 1 milyon parey PS in dir pour *upgrade Bulk Store* - ki enkli Mahe osi, sa bout Praslin ek en *dog pound* ki pour kout R1 milyon an 2024, an vi problemn lisyen eran sirtou dan Amitie otour *landfill*.

Mon kestyon i, eski Minis i kapab donn nou en pe detay lo *scope of work*, travay ki pour ganny fer lo sa detrwa proze? Mersi.

MR SPEAKER

Mersi. Minis?

MINISTER**FLAVIEN****JOUBERT**

Mersi Mr Speaker. Mersi Onorab. Mon ava demann PS pour donn detay. Onorab, mon - ou pe koz lo sa travay ki'n prevwar pour lofis, *store* e osi ou'n demann osi lo *dog pound*? *Dog pound, ok.* Mon a les PS donn detay. Mersi.

PS KEVEN NANCY

Mersi Mr Speaker. Mersi Onorab pour ou kestyon. Wi, mon a komans avek sa ki'n mon'n pran dernyen, lo kote *dog pound*. *Dog pound* i en proze ki nou ti'n met li dan Bidze sa lannen e nou'n fini ganny landrwa pour nou fer nou *dog pound*.

Me par kont, nou'n bezwen pous nou *plot* kot nou ti pe fer *dog pound* par deryer, akoz *this is within the boundary of the Airport Praslin*. E sa i fer ki nou'n sanz – nou sanz lokasyon e nou'n met sa *dog pound* dan Bidze pour 2024, pour nou kapab travay lo la. In fini annan en *approved plan*; *plan* in fini al kot *Planning*, in ganny aprouve.

E ti annan en lot sizesyon lo la, pour ki nou fer en *Animal Welfare Society* travay ansanm ek nou pour sa *dog pound*. Me par kont avek negosyasyon, nou'n vwar ki nou pour bezwen fer en *MOU*, pour ki nou kapab travay avek sa *Animal Welfare Society*.

Akoz parey ou konnen en *dog pound* i anba Lalwa, e anba Lalwa i annan serten keksoz ki ou pour bezwen fer e *Animal Welfare Society* tou, zot annan serten keksoz ki zot pour bezwen fer. E vwala nou pour bezwen travay ansanm.

E nou menm sizere ki nou annan en *lot plot* o bor nou *dog pound* ki nou anmenn plis sa zafer *animal welfare* lo Praslin, kot zannimo ki eran i ganny anmase byen e i ganny trete byen, *both* avek Minister Departman Lagrikiltir avek *Animal Welfare Societies*. E vwala kot nou ete avek *dog pound*.

E lo kote *store*. Lo kote *store* lagrikiltir Praslin e menm pour La Digue tou, mon ava koz pour La Digue tou. Zot dan program zot osi, e pour La Digue nou'n fini fer en plan, e nou pour fer li L'Union o bor *way bridge LWMA*, pour ki i deservi fermye La Digue e osi i deservi ankor sa zofisyse *LWMA*.

Savedir nou pa le fer de gro *building*, pour ki apre i annan *minimum use*. Savedir i en sel zafer, e nou'n fini *design plan* e pour Praslin, ti annan vizit ki ti ganny fer lo *store* Praslin Amitie. Ti annan en serten travay ki nou ti dir, nou pour fer.

E vwala nou'n met li dan program, pour ki nou *upgrade* sa *store*. Akoz ki arive, konmela ou annan diferan kalite *fertilizer* ki antre, an? Ou annan ou *biofertilizer*, ou annan ou bann sentetik, e menm ou bann pestisid tou.

E vwala i fer ki ou bezwen fer ou *store* adapte avek bann diferan prodwi ki ou annan, pour ki zot *lifespan* i vin pli long pour ki ferme i kapab servi.

E menm lo kote *staff* tou, fer landrwa apropiye pour *staff*. E vwala lo kote *store upgrading* pour Praslin e i dan program. Apre i annan en trwazyenm, Randy? *Office building*.

Wi, *office building* li osi i dan program akoz nou pour – nou'n vwar ki Amitie - nou lofis Lagrikiltir Amitie i en lofis ki'n la pour en plizyer lannen e i demann fer serten travay tou.

E menm anler kot nou *staff* i reste, parey nou annan nou bann dimoun, par egzant veteriner ki mont Praslin e zot annan sa landrwa anler kot zot reste, ki pa sitan konvenab.

Alor sa i fer ki parfwa nou bezwen *rent* landrwa deor pour zot. Be nou, nou le fer sir ki nou kapab amelyor sa landrwa anler, e an menm tan, fer en landrwa apropiye anba, pour nou ganny bann lofis pour *staff* e menm pour nou bout veteriner tou.

Akoz i annan en bout veteriner anba, kot bann dimoun ki annan zot bann zannimo oubyen lisyen zot anmenn anba la. Savedir amelyor sa lenfrastruktir an

antye e sa osi i dan program msye Onorab.

MR SPEAKER

Mersi. Minis ek *PS*, nou pe tonm an aryer avek lakantite kekyon ki nou pe *deal* avek. So si i posib, *summarize* en pe, i ava ede. Onorab Uranie?

HON ROCKY URANIE

Mersi Mr Speaker. Bonn apre midi Minis avek nouvo delegasyon. Minis, mon kekyon i vi ki L'Union Estate i tonm en antite Gouvernman. Ki i annan dan sa Bidze pour zot ede soutenir L'Union Estate dan term ekspertiz pour fer ki lagrikiltir L'Union Estate i vremen devlope?

E eski ou satisfè avek lafason ki lagrikiltir pe ganny fer dan L'Union Estate, vi ki i en gran laferm dan li menm?

Apre an pasan ou'n koz lo sa...

MR SPEAKER

Onorab!

HON ROCKY URANIE

Bridge. Non, Mr Speaker, in nonm sa...

MR SPEAKER

Nou'n pran en kekyon...

HON ROCKY URANIE

....sa lofis kot *weighbridge* kan i ekspekte komanse? Mersi. Dan L'Union Estate? Mersi.

MR SPEAKER

Ok, zis sa. Minis?

MINISTER **FLAVIEN**
JOUBERT

Mersi Mr Speaker, mon ava reponn tou lede morso kestyon. Lofis L'Union Estate i ekspekte ganny *tender any time* la, ant la ek Desanm.

Kot i konsern sipor pour L'Union Estate pour li prodwi. L'Union Estate i en *company*, i en konpanyen, e i sipoze annan son prop *farm manager* ki diriz lafason ki i *run* son laferm.

Alor Departman Lagrikiltir, nou travay avek L'Union Estate lo en baz teknik, me nou pa travay ek L'Union Estate lo en baz direksyon ki i pran kot i konsern prodiksyon.

Me selman si Gouvernman i demann nou konsey, ouswa i demann nou serten lopinyon lo lafason ki keksoz i ganny fer, nou ava donn L'Union Estate.

Me an prensip L'Union Estate i endepandan, i *operate* parey en laferm endepandan avek departman. Mersi.

MR SPEAKER

Lo size *weighbridge*.

MINISTER **FLAVIEN**
JOUBERT

Wi Mr Speaker. Mon'n klarifye ki sa batiman ant la, avek Desanm *tender* pour ganny fer pour konstriksyon sa pti batiman. Mersi.

MR SPEAKER

Ok. Mersi bokou Minis. Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi tou Manm Onorab, bonn apre midi Minis avek ou delegasyon.

Mr Speaker, mon annan en sel topik, me selman de - trwa pti klarifikasyon anba la, kot i konsern resours imen. Mon le demann Minis baze lo ou *challenges*, ki mon vwar ou'n mete; mon vwar i annan nimerò 2 avek nimerò 5 i baze lo resours imen, ki ou napa sa kapasite.

E lot i dir poudir i annan difikilte pour *retain* avek *recruit* bann dimoun, dan Lagrikiltir, ouswa dan ou Minister.

Konbyen – sa ki mon pour demann ou Minister, konbyen etidyan ki'n *exit* Lekol Lagrikiltir, ouswa liniversite pandan sa 2 an? Konbyen ki'n

pran pozisyon kle dan ou Minister? Apre ki poursantaz ki ki'n pran sa metye pour promot sekirite alimanter dan nou pei? Mersi.

MR SPEAKER

Mersi. Minis, ou repons?

MINISTER FLAVIEN JOUBERT

Mersi. Mersi Mr Speaker. Wi, mon krwar Onorab in lev en pwen kot i konsern *retention* dan departman. Sa bann kondisyon travay parfwa i fer ki dimoun i dekouraze en bon pe. E nou vwar ki pa toultan ou kapab *retain* dimoun.

I annan dimoun avek leksperyans ki ganny atire, par bann loportinite lezot landrwa e sa i fer ki nou perdi dimoun. Kot i konsern *scheme of service* nou'n, nou ankor pe kontinyen travay avek, Biro Servis Piblik.

E nou pe swete ki serten bann landrwa, kot nou vwar i pa ganny amelyore dan lepase, nou kapab fer en sanzman ki bann *staff* i ava santi zot rekonpanse dan en fason apropiye. I annan plizyer landrwa ki konplent in ganny anmenn devan nou konsernan sa.

Kot i konsern bann etidyan, nou direkter administrasyon isi dan lasal,

me i dan lot latab. Mon ava demann li our donn nou en pe statistik, lo bann dimoun, bann etidyan ki'n antre dan departman.

E nou ava kapab fer ou ganny lenformasyon osi lo konbyen etidyan sorti Lekol Lagrikiltir ki'n aktyelman *join* sa sekter.

Me selman mon pour dir ou laverite se ki, lenformasyon ki mwan mon'n gannyen avek Direkter Lekol, pa bokou ki reste dan Sekter Lagrikiltir e pa bokou ki aktyelman spesyalize dan bann size lagrikiltir.

Laplipar i fer zis sa *course basic* e apre zot bouze zot al lezot landrwa. Alor i enportan ki nou kapab, parey nou dir ouver laport pour ki bann etidyan, i ganny bann loportinite pou zot devlop zot antyerman e la zot a santi zot konfortab pour zot kontinyen dan sa laliny.

E non pa zis avek en sertifika ki pa donn zot bokou opsyon e zot pa santi zot enportan, ouswa kapab ganny servi byen dan sa sekter. Me mon kapab fer direkter administrasyon donn ou – prepar en pe lenformasyon, nou ava donn ou bann statistik. Mersi.

MR SPEAKER

Mersi Minis. Onorab Loizeau?

HON NORBERT LOIZEAU

Mersi Mr Speaker. Bonzour Minis. Mr Speaker, mon annan mwan enn, de, trwa - 5 kestyon.

MR SPEAKER

5 kestyon. Non. Ha! Ha! Ha! Pa posib Onorab. Demann enn.

HON NORBERT LOIZEAU

Mon a demann enn.

MR SPEAKER

Wi.

HON NORBERT LOIZEAU

Ok Mr Speaker, mon a demann sa enn kestyon ki la. Mr Speaker, Minis, pandan lannen, souvandfwa ler kestyon in vin kot li, in lev en konsern difikilte ki i pe gannyen sirtou pour li *allocate* bann later, sirtou pour *agroforestry* e menm pour *farming*.

E nou dan distrik Belair nou annan dimoun ki entereze dan sa domenn, e nou'n ganny difikilte pour *allocate* akoz en *lack of surveyors*. Alors, mon anvi demann Minis, eski - e vi dan vizit COGA osi, nou'n vwar sa dan bann vizit ki nou'n al vizite.

Eski Minis i kapab dir nou, si dan sa alokasyon Bidze ki annan la, eski i annan en

alokasyon pour zot adres sa sityasyon ki mon pe koz lo la, la? Mersi.

MR SPEAKER

Mersi. Mersi Onorab. Minis?

MINISTER FLAVIEN JOUBERT

Mersi Mr Speaker. Mr Speaker, kot i konsern *surveyor*, nou'n fer en long prosedir avek, avek *POU*, e si mon rapel byen Septanm, oubyen boner Oktob, nou ti ganny *go ahead* pour nou *contract* avek serten *surveyor* lokal.

I annan serten landrwa menm nou'n ale avek Komite Lasirans, pour montre serten landrwa ki nou ti pe anvizaze donn bann dimoun, me nou pa ankor kapab fer li, akoz sa mank *surveyor*.

Me selman resaman nou'n kapab ganny permisyon, pour nou kapab met sa bann dimoun dan sa bann pti kontra lokal, pour nou kapab fer sa bann louvraz. Alor *POU* finalman in dakor pour nou *contract* avek bann *surveyor*.

E anba *goods and services*, nou annan larzan pour nou pey sa bann kontra lokalman. Alor nou pour fer - nou pour kontinyen fer li koumsa. Me parfwa i arive kot sa bann *surveyors*, zot napa

plas dan zot program pour *accommodate* nou e sa ki problemn.

I pa neserman ki napa *surveyors* dan pei, parfwa bann *surveyors* zot *busy* avek en kantite aktivite ki anpes zot vin donn nou sa servis.

E a en moman nou pe osi espere pour gete ki mannyer Minister Later i fer, e si i ogmant son kapasite lo son kote, mon mazine zot ti pe fer serten *recruitment* zot osi.

Si zot kapab ogmant zot kapasite, zot kapab donn nou en pe sipor adisyonnèl. Me alokasyon later i osi – i reste en landrwa kot nou annan bann andikap e *surveyor* e sa bann andikap ki nou pe sey *deal* avek tou nou posib. Mersi.

MR SPEAKER

Mersi. Nou a sey gete si nou kapab donn ou en lot kestyon pli tar Onorab. Onorab Aglae?

HON EGBERT AGLAE

Mersi Mr Speaker. Bonn apre midi ankor enn fwa Minis ek ou *panel*. Minis, ozordi ferme ki pe fer *livestock* e ou'n avoue sa ou menm dan ou larepons taler – taler. Se ki zot ki pe pas dan difikilte e sa i swivan lyen direk desizyon Gouvernman pour koup *subsidy*.

Now Minis, mon ti a kontan petet demann ou, eski zot pe fer en evalyasyon premyerman kour term e *medium* term, pour vwar ki sa lefe pe anmennen direkteman? Akoz mon'n koz ek plizyer ferme mwan, i annan ki'n bezwen koup prodiksyon sorti 10 mil pour desann 7 mil, 7 mil pour desann 5 mil e se sa ki annan sa lensertitid ozordi.

So eski zot pe fer sa evalyasyon pour vwar ki kantite lefe lo sa 40poursan prodiksyon ki nou ti'n ogmante dan *livestock* - in ariv lo sa nivo e ki la i annan en retonbe signifikan ki riske arive. Sa i enn.

E Mr Speaker, mon ti a kontan osi pour Minis konpran, akoz marse e letan bann - kot labousri pe vann zot bann lavyann kot i konsern *marketing*, i annan sa difikilte se ki, akoz ferme pe bezwen *top up* ankor en larzan, lo sa lavyann ki zot ti pe vann. Si pe vann R50 kilo bezwen fer monte 60, 65 e *margin profit* in redwir en kantite. Se sa problemn.

Eski zot kapab dir ek sa Lasanble, poudir zot pour al evalye sa sityasyon, e si i annan en desizyon pour ganny pran, ava ganny pran pour soutenir nou *livestock*, parey Minis ti dir dan Lasanble - Minis Finans - nou pe *subsidy* R31 milyon

pour nou bann manman avek *orphan*. Be sekirite alimanter i osi bezwen pas parey akoz sa i nou vant nou pei. Mersi.

MR SPEAKER

Ok mersi. Minis?

MINISTER FLAVIEN JOUBERT

Mersi Mr Speaker. Mersi Onorab pour sa kestyon konsern *subsidy* ankor. Mr Speaker, Onorab lo komansman in dir ki bann lenpak lo *livestock* i an rezilta - i en rezilta direk desizyon Gouvernman pour koup *subsidy* lo *livestock*.

Mon ti a kontan fer rapel Onorab ki *subsidy* lo manze zannimo pa ti egziste avan 2020; ti napa. E sa ki nou'n fer desann, se ki en *subsidy* ki ganny entrodwir zis lo komansman *COVID*, e ki apre nou pe sey fer mannyer pour nou fer li redesann pour li retourn parey kot ti ete.

E ou a realize Onorab, ou ava rod lenformasyon ou menm lo marse lokal, manze zannimo i parmi bann sel prodwi dan pei ki'n monte, ki pa'n zanmen desann.

Tou prodwi in monte, in desann; tou keksoz in monte in desann e manze zannimo in pa'n zanmen desann li. Depi ler

zot in monte - e lot keksoz se ki, mentenir sa *subsidy* pa ti pe donn okenn ensitasyon bann dimoun ki pe vann pour zot fer desann pri.

Akoz letan i fer desann pri son *margin* i desann e i ganny mwens *subsidy*. Alor i pa enterese pour li fer desann son pri, akoz sa *subsidy* pe kontinyen tenir li en oter.

Laverite Mr Speaker, se ki letan nou'n fer desann, nou'n koup *subsidy*, nou'n komans lenportasyon, i annan en bon pe rediksyon in arive dan pran manze.

Aktyelman par bann *supplier* lokal, e i annan ankor diskisyon ki nou pe kontinyen fer, pour fer desann pri manze. Alor nou pa krwar poudir zis kontinyen anvoy *subsidy* dan sistenm pour ede, pour aranz sityasyon, i pour senpleman fer ki nou zis kontinyen pran larzan e nou met dan en keksoz ki nou pa konnen ki rezilta i pour donn nou ditou, *at all*.

Ou'n koz lo 31 milyon ki Minis Finans i dir i pe *subsidized*: par egzanp bann mezir sosyal. Mr Speaker, si nou ti kontinyen avek *subsidy* sa lannen, nou ti pour pe R100 milyon *subsidy* sa lannen.

E mon pa konnen ki mon ti pour vin akont Lasanble letan nou'n pey R100 milyon *subsidy*

dan sa lannen. Mon konnen zot ti pour dir mwan al analize. I byen ki ou pe dir mwan analize, mon pour ale analize e nou pe fer *analysis* anmezir nou ale.

Me selman analiz en keksoz ki nou krwar i pe pous dan en serten direksyon e non pa zis anvoy larzan avek *subsidy*, ekspekte ki i pour donn nou en rezilta diferan, mon pa tro krwar Mr Speaker.

Alor nou, nou pa - nou napa nanryen kont sa bann *supplier*, e nou napa - nou ti a voudre ki bann ferme i retourn lo en sityasyon kot zot pe ganny zot manze san gran problem.

Me selman nou konsyan ki nou bezwen pran bann desizyon ki pa popiler. Nou bezwen pran bann desizyon ki pour fors sityasyon. E deswit ki bann *supplier* i ofer bann pri ki nou vwar i vin rezonnab, dousman, dousman nou pe rapros avek rezonnab la, nou vwar bann rediksyon pe arive dan bann pri.

Deswit ki bann *supplier* i dir, be *ok* mon'n pare pour vin avek keksoz ki rezonnab, nou Departman Lagrikiltir nou pour nepli antre ladan nou.

Akoz mon pa ti a voudre ki nou pe partisip dan enportasyon ek distribisyon manze, aköz i en keksoz ki prive

i kapab fer byen, san ki nou pour bezwen enterfer ladan.

Me sistenm mannyer in ete i pa'n ankouraz, i pa'n ankouraz rediksyon dan pri. Alor Onorab, mon dakor ki bann ferme pe ganny enpakte, par bann mouvman ki pe arive la aktyelman.

Me nou bezwen osi konpran, ki Gouvernman pa kapab soutenir en sistenm parey e ki nou, nou pour bezwen pran bann mezir ki pa enteresan pour bokou dimoun, pour fors pri desann.

E sel fason pour fors pri desann se pour tir *subsidy*, e pour *set* bann pri, ki bann dimoun prezan i bezwen tay deryer dapre bann mezir ki *market* i permet.

Nou ava gete an mezir nou ale ki bor sa pri i stabilize, e apre nou a fer desizyon, lo ki kalite sipor ki nou pour kontinyen anmennen. Me selman pa R100 milyon Mr Speaker. Mersi.

MR SPEAKER

Mersi Minis. Onorab Porice.

HON DOYACE PORICE

Mersi Mr Speaker. Bonn apre midi Minis avek ou delegasyon. Bonn apre midi mon bann koleg Onorab. Mon pour pas mon senser kondoleans avek tou

fanmir lo Praslin, ki'n perdi enn zot pros e mon vreman sagren mon pa avek zot.

Minis, vi ki labatwar Cap Samy in fini fer renovasyon. Eski dan sa Bidze i annan larzan pour lekipman pour labatwar? E kan eski zot pour gannyen? Mersi.

MR SPEAKER

Mersi. Minis, PS nou ava reste bref silvouple, si zot kapab.

MINISTER FLAVIEN JOUBERT

Mersi Mr Speaker. Mersi Onorab. PS i a donn en *update* vitman lo sa size.

MR SPEAKER

PS?

PS KEVEN NANCY

Mersi Mr Speaker. Mersi Onorab. Lo kote labatwar Praslin parey ou okouran, Gouvernman Sesel in travay lo tou pour *refurbishment of* lenfrastruktir, ki nou'n fini avek.

E la sel keksoz ki reste se ki pour nou fer son *sewage* ek son *soakaway*, e nou'n sanz pozisyon. Avan ti pour pli pre avek sa *marsh area*, e nou'n dir ki *weather table* i en pe tro *high* laba, fer li antre pli anndan, e sa nou pe *tender out* pour nou fer, apre i annan lekipman.

Lekipman bazar Praslin i annan en *tender* ki'n fini fer, pour ki bann lekipman i kapab antre, e dek ki nou - lekipman mon pe dir tou lekipman enkli son refrizerasyon tou.

E koman nou fini avek tou sa, nou met *expression of interest* ki nou'n komans travay lo la e nou demare avek. Savedir pa reste gran, gran travay pour fer lo la. Mersi.

MR SPEAKER

Eski ou kapab dir li kan, apepre?

PS KEVEN NANCY

Kan? Ler ou pou ekspekte ou bann *tendering process*, savedir i kapab dezyenm – lafen premye kar, dezyenm komansman lannen prosen. Mon pe met li en pe *safe* sa zistans.

MR SPEAKER

Mersi PS. Onorab Gabriel.

HON CONRAD GABRIEL

Mersi Mr Chair. *Welcome* Minis ek ou *panel*. Minis, an vi ki nou Pointe Larue, nou napa gran potansyel pour fer lagrikiltir *to a large scale*.

Me par kont nou annan dimoun lo lalis ki pe esper en morso later pour plizyer letan – lizyer lannen.

So mon'n tann ou eksplik en pe la bann prosedir ki zot pe fer pour ganny bann later, mon *welcome* sa. Zis pa bliy sa bann dimoun silvouple.

Anliny ek kestyon Onorab Lemiel, Minis ki bann lenterval oubyen bann *frequency* ki zot rankontre pour diskrit ek bann ferme. Eski i annan bann *meeting* ki zot fer regilyerman, pou diskrit bann problem e difikilte ki ferme pe fer fas avek la deor? Mersi.

MR SPEAKER

Mersi. Minis ou repons. Wi, bref silvouple.

MINISTER FLAVIEN JOUBERT

Mersi Mr Speaker. Kestyon vremen enteresan. Letan mwan mon ti antre dan biro mwan Mr Speaker, pa tou ferme ki ti pe zwenn ek Minister, aköz ti annan serten mekontantman avek – antre tou dimoun.

Me mwan mon'n zwenn avek tou ferme e mon'n fer sir ki, mon'n ouver laport pour nou zwenn lo en baz regilye.

Resaman nou pa'n fer bokou *meeting* regilye avek bann ferme. Me selman nou'n kontinyen annan bann *meeting* par bann, parmi bann lasosyasyon letan zot demande, nenport ki moman.

Par egzanp tou resaman nou'n fer Praslin, ek diferan group ki demann nou pour zwenn avek zot, nou zwenn.

Alor i annan sa gran *meeting* ki nou fer avek bann ferme, nou pa ankor fer li pour apepre en 6mwan la. Me okenn lasosyasyon, okenn group ki le zwenn, ouswa okenn demann ki bann ferme par egzanp bann pti kominote ferme zot demande pour nou pas kot zot, nou fer laranzman e nou zwenn zot.

Alor laport i ouver pour tou ferme, e mwan mon fer sir ki mon pa fer sa zafer kot Minis i dakor ek sa enn group, Minis pa dakor ek sa enn group, ouswa nou pa koz ek okenn dimoun. Mon koz ek tou dimoun mwan, menm i annan serten ki maltret mwan me mon *still* koz ek zot.

Alor laport i ouver pour nou kontinyen fer bann diskisyon regilye. E nou osi annan plan pour nou kontinyen nou bann *meeting* dan gran group ferme pour nou anmas tou bann lenformasyon avek zot.

Me i annan bann lokazyon osi ki'n leve, par egzanp dan resaman la i annan bann proze kot nou annan plizyer ferme ki regroup ansanm, ki pe fer *training* par egzanp.

E i annan bann pwen ki ganny leve e nou osi pran kont sa bann pwen. Alor i annan plizyer lokazyon pour nou kontinyen koze avek bann ferme, e nou kontinyen reste 100 poursan ouver avek tou ferme ki anvi koz avek nou. Mersi.

MR SPEAKER

Mersi Minis. Onorab Larue.

HON FLORY LARUE

Bonn apre midi Mr Chair. Bonn apre midi Minis ek ou *panel*. Minis, lefet ki nou fek pas dan *COVID*, e enn bann priyorite nou Gouvernman, se sekirite alimanter nou popilasyon. Lefe ki annan en kantite lenpak enternasyonal. E lefe ki Sesel in siny *Maputo Declaration*, depi 2006 e nou'n ratifye li osi an 2006.

E nou vwar ki Bidze in desann konpare avek lannen pase, eski - e la ou en Minister ki annan 3 departman, ou annan 3 *heads* la kot ou. Ki nou pe fer pour nou kontinyen promot sa target 10poursan alokasyon Bidze pei, ki ganny targete pour lagrikiltir?

Ki fer ki nou kapab zwenn sa bann defi ki pei i annan, tel ki sekirite alimanter popilasyon. Mersi.

MR SPEAKER

Mersi. Minis?

MINISTER

FLAVIEN

JOUBERT

Mersi Mr Speaker. Mersi Onorab. Mon krwar i en kestyon ki vreman enportan. Parfwa nou siny bann Lagreman, e nou zis ekspekte ki keksoz pour bouz en serten direksyon, san ki nou, nou vreman port latansyon lo la. Alor mon krwar i enportan ki ou'n lev sa pwen.

Bidze Mr Speaker, sa Bidze ki la i Bidze Departman Lagrikiltir ek tou bann servis ki i pe ofer. Me ti a bon nou reflexir lo sa Bidze osi an relasyon ek tou bann lezot konponan Bidze ki siport sa enn Bidze.

Par egzanp mon'n koz lo *store* lagrikiltir, ki li pour li i annan en Bidze ki pe kontinyen grosi. Alor i annan *availability of* materyo, ki pe kontinyen amelyore. Nou annan kantite larzan ki pe ofer pour *loan*, ki sa lannen nou vwar in triple, konpare avek bann lannen avan.

Dan plas annan 25 milyon apepre, nou annan 60 milyon *available* pour bann dimoun servi. Savedir i annan bann landrwa kot ferme i bezwen sipor, kot zot pe ganny

posibilite pour zot ganny sipor pour fer zot travay.

Lot keksoz parey mon'n koz lo la, i annan de proze ki nou pe targete. Enn mon konnen apepre aproksimativman konbyen larzan i pour vin *available* pour lagrikiltir.

E sa se anba sa proze *GEF-8* ki nou'n demann en tyer ki pour ganny *allocate* pour bann proze lagrikiltir, e ladan nou pe koz en tyer \$12.8 milyon.

Savedir nou pe koz apepre 4 - omwen \$4 milyon ki merit *available* pour siport bann proze ki relye avek lagrikiltir. E sa i en demars ki nou'n fer resaman, ki anmenn bokou plis larzan dan sa sekter, pour devlopman proze par bann dimoun lokal.

Alor i annan posibilite pour nou agrandi kantite larzan, kantite resours ki *available* pour bann dimoun dan sekter, san ki nou fer grosi senpleman sa Bidze.

Akoz Bidze Gouvernman mon pa ekspekte ki i pour grosi masivman, me nou kapab anmenn lezot resours pour ki nou kapab vreman annan en *package* ki fer sans pour lagrikiltir dan pei.

E ki letan nou bezwen, servis, sipor par egzanp pour

devlop bann proze pour bann dimoun ki enterese, i annan sa fasilite. Mersi.

MR SPEAKER

Mersi. Onorab Cosgrow.

HON WALLACE COSGROW

Mersi Mr Speaker. Bonn apre midi tou dimoun. Mr Speaker, vi ki nou lo Bidze Lagrikiltir e nou pe rod tou le meyer pour bann ferme, bazardye, mon annan zis enn pti remark, enn pti keston.

I annan en bazardye Grand Anse Praslin i dir mwan i annan en Onorab ti pran pwason sale ek li plis ki 6 mwan pa ankor peye. Si i kapab vin peye silvouple. Mersi bokou Mr Speaker. Mr Speaker...

(murmurings off-mic)

MR SPEAKER

Bon.

(murmurings off-mic)

HON WALLACE COSGROW

Mr Speaker, si Minis i kapab dir nou, si dan son Bidze, si dan son Bidze i annan en alokasyon pour sekirite bann lenfrastruktir ki zot annan? Si wi- si wi, kan zot anvizaze fer *tender* pour sa bann servis sekirite? Akoz aparaman i annan ki plis ki 1

an edmi zot bann servis sekirite i ankor pe esper *tender* pour lenfrastruktir, -bann lenfrastruktir Minister. Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker, mon ava pas laparol avek *PS* pour reponn size sekirite.

MR SPEAKER

PS. Wi?

(murmurings and laughter off-mic)

MR SPEAKER

Silvouple! *PS* nou pe ekoute.

PS KEVEN NANCY

Mersi Mr Speaker. Mersi Onorab. Wi, li kote sekirite, vi ki nou annan diferan enfrastruktir en pe eparpiye partou e nou annan ki'n fek *tender* la. Akoz nou bezwen al dan bann *tendering procedures*. E pour *both static* avek *surveillance by camera*. Mersi Mr Speaker.

MR SPEAKER

Ok. Onorab Hoareau.

HON JOHN HOAREAU

Mersi Mr Chair. E bonn apre midi tou dimoun. Mr Chair, mon kestyon i baze lo demars ki Minis pe fer pe travay avek *Animal Welfare, Animal Society*, mon pe – mon le demann li si dan son Bidze, i annan provizyon pour moderniz *Dogs Act*, moderniz en pe son bann Lalwa, sirtou sa bout ki annan pour fer avek *poison baiting*, pour ki sa bout i kapab ganny retire dan Lalwa?

Swivan demann plis ki 1000 *petitioners* ki mon'n ganny enn zot kopi zot *petition* e ou osi Mr Speaker, ou'n ganny enn zot kopi. Mersi.

MR SPEAKER

Minis.

MINISTER FLAVIEN JOUBERT

Mersi Mr Speaker. Modernizasyon *Dogs Act*, i annan serten mezir nou pe pran aktyelman la. E anefte nou'n pas *Cabinet* avek, i annan pour fer avek *breeding* ek lenportasyon lisen.

Mon pa'n ganny kopi okenn petisyon Onorab. Menm si mon'n ganny enformen ki i annan petisyon ki pe ganny fer, a plizyer repriz mon'n ganny dir petisyon, me ziska konmela mon pa ankor ganny okenn kopi okenn petisyon e mon ti

ava enterese konnen konteni sa petisyon, pour nou kapab reazir lo la. Mersi.

MR SPEAKER

Mersi. Onorab Herminie.

HON WILBERT HERMINIE

Mersi Mr Speaker. *Good afternoon* bann nouvo Manm *panel*. Minis, ler mon pe get anba ou *current challenges* lo paz 446, ou'n met '*insufficient internal capacity*'.

Be pour ou kapab ganny bon dimoun pour fer louvraz, fodre zot bann *scheme* i byen. Mon ti tann ou pli boner, pour Departman Lanvironnman, ou ti dir *scheme* pe travay lo la, i ankor *still* kot *PSB* e mon prezimen *Scheme* Lagrikiltir tou i ankor kot *PSB*.

Be Minis ou zwenn avek Prezidan tou le Merkrede e *PS*, i tonm anba Biro Prezidan, kwa ki ou pe fer pour pouse, ki sa bann *scheme* sa bann travayer i ganny travay lo la o pli vit posib?

E osi eski in ganny diskisyon lo sa proze kot bann ferme ti pe ganny dir pour, ganny ankouraze aktyelman pour zot al fer prodiksyon lo bann zil? Mersi.

MR SPEAKER

Ou'n al lo de kestyon la. *Ok* Minis silvouple adres vitman?

MINISTER FLAVIEN JOUBERT

Mersi Mr Speaker. Mersi Onorab pour sa de kestyon. Mr Speaker, kot i konsern *schemes*, sa bout *internal capacity*, mon poudir ki Departman Lagrikiltir, konpare avek Departman Lanvironnman, nou annan en bon pe dimoun ki annan konpetans dan Departman Lagrikiltir.

Mon pou dir laverite, se ki i annan dimoun ki konpran zot size, byen. I annan dimoun ki in fer *training* dan plizyer domenn e zot la dan Departman Lagrikiltir. Me i mank nou osi serten laranzman pour nou fer sir swa nou plas dimoun dan pozisyon korek, swa nou donn zot bann sipor adisyonnèl, pour zot kapab travay avek, pour kapab delivre dan zot louvraz.

Alor mon pou dir ki Departman Lagrikiltir son mankman lo kote konpetans, i pa telman sever. Me selman Departman Lagrikiltir fodre aranz son fason ki i fonksyonnen, pour ki nou kapab delivre pli byen, lo sa size.

Alor pa tou ki pour depan lo *scheme*, serten i pour depan

lo kalite laranzman ki nou mete dan departman, e kalite direksyon ki nou met an plas pour diriz travay dan Departman Lagrikiltir.

E mon'n nonm serten landrwa, kot i mank nou ankor plis sipor ek bann kondisyon entern pour ganny aranze.

Me *scheme* byensir, nou'n met devan kot i annan bann mankman, i annan serten *staff* ki'n fer demann avek nou, nou'n met devan. E parfwa i en kestyon Bidze. E ou konnen Onorab se ki, Gouvernman prensip se ki nou pa grosi Bidze, nou pa grosi lakantite dimoun.

Nou bezwen fer sa ki nou bezwen fer anndan Bidze, e se sa *challenge* ki nou annan ozordi. Se sey fer fonksyonnen nou departman avek sa Bidze ki nou aktyelman annan.

Kot i konsern devlopman lo bann zil, i annan en aplikan ki'n demann, ki'n fer demann avek nou, nou'n fer demars e sa aplikan i aktyelman dan en prosedir pour li fer en demaraz lo zil Silhouette avek *IDC*.

I annan bann lesey ki *IDC* pe fer lo zil Desroches e sa nou'n ganny *update* lo la, mon krwar Lasanble osi in ganny en pe *update* lo la.

E aktyelman la, nou pe travay avek Minister Finans e

letan nou'n fer sa diskisyon par egzanp lo kote bann laranzman pour nouvo fasilite *loan*, nou osi pe fer refleksyon lo ki mannyer nou pour kree en *credit line*, pour bann dimoun ki pe al lo zil, pour al fer bann devlopman agrikol.

Me nou pa ankor arive met an plas sa enn sistenm. Me selman laport i reste ouver pour lezot ki enterese, pour al lo zil pour fer bann devlopman.

Alor sa travay i kontinyen, e nou menm nou, nou'n an kontak avek *IDC*. Nou'n ganny serten *feedback* avek zot. E nou ti a kontan ankouraz bann dimoun ki enterese, pour kontinyen vin devan e vwar ki mannyer zot kapab met en plas en proze pour prodwir lo en pli gran lesel lo bann zil. Mersi.

MR SPEAKER

Mersi. Onorab Romain, akoz mon'n promet ou, mon'n zis ganny letan pour kapab pran ou dezyenm kestyon.

HON GEORGES ROMAIN

Mersi Mr Speaker –

(Off-Mic)

MR SPEAKER

Ok, Onorab Romain, poz ou kestyon. Onorab Gill, mon a donn ou dernyen kestyon.

HON GEORGES ROMAIN

Mr Speaker-

MR SPEAKER

Non-non, Onorab Gill pa ankor demann kestyon dan sa peryod li.

HON GEORGES ROMAIN

Mr Speaker, mersi. Be selman *anyway*, en kote mon'n tann PS in koz en bout lo mon kestyon. Be selman zis mon ti anvi kekfwa re demann Minis osi, an vi ki sa Bidze pou Bazar La Retraite ti ganny mete depi lannen pase - *I mean* sa lannen ki nou ladan pe al fini - mon espere ki sa lannen, sa bazar i vremen demare sa lannen.

Sa lannen *early 2024, I mean*. Akoz depi 2023, mon'n war ankor dan Bidze sa lannen. So, sa ti mon dezyenm kestyon. Be PS in tous en pti bout lo la osi Mr Speaker. Mersi.

MR SPEAKER

So, ou satisfè? Tre byen. *Ok*. Onorab Gill ou kestyon.

HON CHURCHILL GILL

Mersi Mr Speaker. Mon annan zis en kestyon menm pou Minis. Minis, ou a rapel ler ou ti fek pran lofis ou ti vin dan Lasanble, ou ti eksplik nou ou

Plan Konpreansiv pou Lagrikiltir.

E an menm tan plizyer kestyon ki'n vin dan Lasanble, nou'n fer sorti kot bann fermye i annan en bon pe zot, ki pe travay tre byen zot pe prodwir. Me selman toultan a lafen dizour nou ganny sa sityasyon kot zot napa landrwa pou vann.

So sa i en keksoz ki depi ler ou'n pran lofis ou okouran. Mon kestyon se, ki konversasyon serye dan sa direksyon ki'n ganny fer pou ki fermye Sesel - akoz ler ou'n ouver tou sa bann laport, larzan pou zot kapab devlope, later pou zot al devlope, nou pou *still* annan sa dilenm kot ler tousala i tonm an plas, nou pou annan serten la kantite prodiksyon.

So ki diskisyon serye, kot sa size i sipoze ganny adrese ki ou Minister in fer ziska la? Mersi.

MR SPEAKER

Mersi Minis, bref silvouple.

MINISTER FLAVIEN JOUBERT

Mersi Mr Speaker. Mersi Onorab. Mr Speaker, lo kote *outlets* nou annan de ki deza la dan plan pou 2023. I annan Anse Boileau apre La Retraite parey Onorab in demande. I annan en diskisyon ki nou'n fer

pou fer en *extension* avek Bazar La Digue.

Akoz nou konnen poudir letan bann peser pou sorti kot zot ete bor lanmer, nou pou mank lespas lo Bazar La Digue. Nou pe esper konfirmasyon pou nou kapab gete, si nou kapab bouz devan avek sa *extension* egzakteman parey i ete. Me zis en nouvo *wing* parey nou dir avek sa bazar.

Dan nou plan pou lannen prosen, nou pe mazin ankor omwen 2 *outlet* pou nou travay lo la. Praslin parey ou okouran, nou'n met en *solar chiller* ki nou'n gannyen avek *International Solar Alliance* pou en kou apepre R400 mil.

E sa *solar chiller* i en *prototype* ki nou kapab servi pou ed bann ferme prezerv zot legim, pou zot kapab met lo marse pandan plizyer semenn. Nou konnen Praslin parfwa zot ganny par egzantp *excess* tomat, e i pouri e nou pa kapab fer nanryen avek. Me si nou annan bann fasilite parey nou kapab prezerv li met li lo *market* pli lontan.

E nou, nou ti a voudre nou annan plis sa bann fasilite lo Mahe ek lo Praslin. Nou pe fer demars avek bann lorganizasyon enternasyonal, pou nou kapab ganny sipor pou nou enstal plis dan kad nou

plan, pou nou anmenn plis *climate smart agriculture* dan pei.

Aprè sa, i annan osi sa size *central market* ki – *centralised wholesale market* ki i en pwèn ki toultan in ganny met devan, menm parmi bann ferme letan nou diskit avek zot. Kot nou kapab annan en pwèn kot bann dimoun ki le aste. Zot kapab vini pou zot fer tranzaksyon avek bann dimoun ki pe vann an gro.

E sa i enn bann keksoz ki nou pe sey rod en landrwa pou nou enstal li. Be nou ti a voudre ki enn bann plan ki vini dan bann lannen, ki pe vini, se ki nou annan en *central wholesale market*.

Kot nou konnen nou kapab annan en sistenm, kot ferme prezan i vann an gro avek en parey nou dir en *middleman*. Ki apre li i fer distribisyon ouswa i distribye avek bann – wi, i fer distribisyon avek bann dimoun ki travay ki fer *retail*.

Aprè sa Mr Speaker, nou'n koz lo *outlets* pou lavyann. Nou pe koz nouvo labatwar. Nou pe koz nouvo fasilite *processing* ki pou atase avek. E nou ti a voudre ki nou annan bann fasilite parey *meat shops* dan diferan landrwa.

An kolaborasyon avek *SFA* nou'n fer enn Praslin. Nou'n siport enn prive Cap Samy. E nou'n fer en lot Baie St Anne e nou ti a voudre ki nou kapab annan plis *meat shop* dan diferan landrwa e i annan menm demann.

Dan rezyon Sid Mahe i annan demann. Dan rezyon Les Mahe i annan demann. Dan rezyon Nor Des Mahe i annan demann pou nou fer *meat shops*, pou dimoun kapab vann lavyann lokal avek bann konsonmater lokal.

Alor dan nou plan Mr Speaker, se ogmant la kantite *outlets* e nou'n fini konmansé. E nou ti a voudre ki tou le lannen nou pe fer omwen 2 *outlet* e nou pe ale koumsa. Mersi.

MR SPEAKER

Mersi. Nou a pran vot lo Bidze pou Minister Lagrikiltir Sanzman Klima e Lanvironnman, lo paz 445 ziska 456 pou en total R213 milyon 607 mil. Manm ki an faver lev silvouple? Mersi mon krwar tou Manm in vote. Okenn Manm ki vot kont?

Lo Bidze Minister Lagrikiltir pou R213 milyon 607 mil 32 Manm in vot pour, 0 kont, 0 abstansyon. Sa Bidze in aprouve par Lasanble. Bon nou zis a tan pou pran nou poz

regilye e Lasanble nou a rebran konsiderasyon Bidze 4er. Mersi.

(BREAK)

Mr Deputy Speaker in the Chair

LANDSCAPE AND WASTE MANAGEMENT AGENCY (LWMA)

MR DEPUTY SPEAKER

Bonn apre midi tou dimoun. *Welcome back* pou nou dernyen sesyon pou sa Merkrede. *Is it Merkrede ozordi ouswa Zedi?* Zedi byen. Avek nou, nou annan delegasyon ki sorti kot *Landscape and Waste Management Agency*.

E bann zofisye ki'n zwenn nou. Nou ava dir zot *welcome*. Minis Flavien Joubert i ankor avek nou. E bann zofisye ki'n zwenn nou i annan Mr Shane Emilie ki *Chief Executive Officer*, Mr Rahul Mangroo ki *Deputy Chief Executive Officer* e Madanm Louise Azemia ki *Accountant*.

E bann zofisye ki lo latav Mr Commettant sorti kot Minister Finans, i ankor la. Mr Jude Commettant ki *Deputy Comptroller General* avek Mrs Ruth Pool ki ki *Principal Finance Analyst* kot Minister Finans.

Nou ava envit Minis pou fer lentrodiksyon e apre lasal ava ouver pou bann Manm demann kestyon. *Minister*.

MINISTER **FLAVIEN**
JOUBERT

Mersi Mr Deputy Speaker. Bonn apre midi ankor enn fwa bann Manm Lasanble ek bann dimoun ki pe ekoute.

Mr Deputy, Lazans LWMA parey nou konnen i responsab pou netwayaz e osi zesyon salte dan pei. I en lazans ki'n fer en kantite zefor dan lepase pou fer sir ki bann servis i ganny donnen. E ozordi mon ava avek dan nou prezans nouvo CEO ki ti ganny apwente an Out sa lannen Mr Emilie, ki pe travay formant pou fer sir ki lazans i amelyor son performans.

Nou annan bann nouvo keksoz ki lazans pe gete. Par egzantp nouvo program ki i pe travay avek bann finansman ki nou pe gannnen, sorti kot bann *partner* enternasyonal parey *World Bank*.

E osi i annan bann demars ki lazans pe fer pou amelyor kondisyon travay bann travayer. Parey sa demars ki annan pou fer avek sanzman lokasyon kot zot ete.

Akoz sa biro ki zot ladan ozordi i pa konvenab. E osi i en danze an ka ki nou annan

okenn *emergency* parey dife. Alor sa i annan bann keksoz ki LWMA pe fer, e nou ava prezant son Bidze.

E ladan i annan bann eleman ki kouver en pe bann demars ki sa lazans pe fer. Bidze pou 2024 ki'n ganny propoze pou lazans i 18.178 milyon (pardon) i 281.775 milyon. E sa i en ogmantasyon 18.178 milyon konpare avek 2023.

Dan sa 18.178 milyon i annan 3 konponan ki'n koz sa ogmantasyon. Premye se *wages and salaries* ki annan en *overall increase* 2.456 milyon. E sa i kouver revizyon saler pou met sa 10poursan. I annan kreasyon nouvo pozisyon pou *Contract Manager* pou program 1, ki en pozisyon nesaser. E osi dimoun kot i konsern ladministrasyon.

I annan enplimantasyon bann *scheme of service* pou bann *staff* sa lazans. E osi i annan bann sanzman ki'n arive, aköz bann *allowances* mannyer in ganny *merged* avek bann lapey ki bann dimoun i gannnen.

Dezyenm konponan ki'n koz sa ogmantasyon 18.178 milyon i *goods and services*, kot 9.722 milyon, i annan pou fer avek ogmantasyon dan *landfill* - bann depans pou *management*

landfill. E osi bann adisyonnèl netwayaz ki sa lazans i bezwen ferm ki kouber bann nouvo enteraksyon ki zot in fer avek bann distrik.

E dernyen konponan Mr Speaker, ki annan pou fer avek sa azisteman dan Bidze pou 2024, i annan pou fer avek 3 proze ki'n ganny prevwar pou 2024. Enn, se pou fer konstriksyon en miray avek *landfill* La Digue, ki pou aranz kondisyon sa *landfill*, pou fer ki i kapab kontinyen fonksyonnen, san ki i koz en problem pou sa zil. E ki nou kapab ganny ankor en pe lannen itilizasyon sa *landfill*.

I annan reparasyon lo sa sistenm tretman delo sal, ki sorti anba *landfill* ki nou apel *LPTP* Providence. Ki i annan en problem striktirel ki ti'n deza ganny vwar depi avan. Me sa lannen nou pou fer demars pou nou vin avek bann solisyon *engineering*, ki pou stabiliz sa basen e ed li e fer ki i kapab fonksyonnen a 100poursan.

E trwazyenm se konstriksyon enstalasyon bann baryer, bann *boundary wall*, otour *landfill* Providence. Sa i pou en premye faz kot serten parti *landfill* Providence pou ganny bloke pou akse. Akoz nou konnen bann danze ki sa i vin avek ek bann

lenkonvenyans ki'n koze dan lepase.

E lentansyon se ki nou kontinyen avek diferan faz anmezir nou ale, pou ki avek letan nou anserkle preski antyerman *landfill* Providence. Mersi Mr Speaker.

MR DEPUTY SPEAKER

Mersi *Minister*. Donk in ariv ler aprezan pou nou pran bann kestasyon *from the Floor*. E dabor mon ava kriy Onorab Regina Esparon.

HON REGINA ESPARON

Mersi Mr Chairman. Bonn apre midi Minis ek ou nouvo delegasyon. Mr Chairman, enn bann lakonplisman ki *LWMA* in liste, se ki sa in kapab ranforsi sa relasyon travay ant Lotorite Distrik ek bann kontrakter.

E sa in anmenn i fasilite kominikasyon. Me selman i *still* ankor annan defi e i annan lespas pou amelyore.

Lo kote lafason ki alokasyon oubyen aporsyonman Bidze pou bann kontrakter i ganny donnen la. Ler *tender* i fer Minis, bokou fwa *CEO* ou a konnen poudir parey nou annan sa ka North East Point. Parey nou ti annan sa lanmar North East Point, ki li i ti tpipti. Apre sa travay ki *BA* in fer ladan in agrandi li.

Prezan sa dimoun ki ti ganny kontra pou li fer sa travay li, i war li pe netway en pli gran lespas. Epi i vin bokou louvraz pou li. Epi i annan bann kontrakter ki zot, zot ganny donnen travay pou fer 2 fwa par mwan pou netway larivyer.

Be tan ka en bann i annan pou netway tou le semenn. I annan kontrakter i ganny travay pou fer toulezour. Konmsi ki *LWMA* pe fer pou etabli sa standar?

Sa standar lo kote sa bann kontrakter pou fer ki letan konmsi i annan sa *tender* i ganny fer, ki nou pa ava vwar enn pe ganny en ptipti bout. Mwan mon netway sa pti bout 3 met avek lanmer lot pe netway pli gran bout, me selman parfwa i pou menm larzan. Mersi.

MR DEPUTY SPEAKER

So nou pou fer parey Speaker ti'n etabli, en kestyon apre si nou bezwen retourn lo dezyenm *round*. Akoz deza la nou annan en long lalis. *Panel*.

MINISTER FLAVIEN JOUBERT

Mersi Mr Deputy. Mon ava pas laparol avek *CEO* ek *Deputy CEO*. Mersi.

MR DEPUTY SPEAKER

Mersi. *CEO proceed*.

DEPUTY CEO RAHUL MANGROO

Bonn apre midi Mr Deputy. Mersi pou ou kestyon Manm Onorab. Mr Deputy, lo konsern aporsyonman bann kontra, *as much as possible* nou fer le mye pou tou dimoun i ganny en menm morso.

Selman i pou arive sirkonstans i diferan par distrik par *lot*. Sa ki mon kapab konfirman, se ki sa proze ti avek en lot departman avan, ki'n ganny transfer kot *LWMA* e nou'n war e nou'n fer nou envestigasyon lo sa ka spesifik North East Point.

E nou'n aprann en leson *from* li. E kot lazans ki nou fer, nou, prosedir se ler i annan azisteman ki bezwen ganny fer, nou fer li. E nou pe fer li pou bann kontrakter netwayaz semen dizon, oubyen sa ki netway bin.

Alor *moving forward*, menm keksoz pou ganny aplike, *across the board* pou tou kontrakter *LWMA*, kot fodre annan azistasyon *bearing in mind* osi i annan kontrent bidzeter.

E an se ki konsern frekans, fodre note ki i annan serten landrwa depandan lo lentansite petet frekant –

prezans dimoun ki servi en landrwa, ki fer li sali pli vit eksetera, i fer ki frekans i diferan. I pou toultan arive kot frekans i pa pou parey *across the board* pou tou landrwa.

Selman *as much as possible* nou sey *standardized* li dan bann sironstans ki permete. Selman i pou annan enn de leksepsyon.

Selman nou'n note ou pwen e nou'n travay dan nou nouvo – *moving forward* ek nou legzersis ki nou'n fer, e nou pe sey *improve* lo frekans kote larivyer aköz zot frekans i mwens. Pou sey *as much as possible* pou annan en gran dekalaz ant en bout ek en lot bout. Mersi.

MR DEPUTY SPEAKER

Mersi Mr Mangroo. Mon ava apel Onorab Lemiel.

HON SYLVANNE LEMIEL

Mersi Mr Chair. Bonn apre midi nouvo delegasyon sorti kot LWMA. Mr Chair, aparaman mon ti a kontan konnen dan Bidze LWMA, nou vwar ki dan program 2 *waste management service* in annan en ogmantasyon dan zot Bidze, sorti 216.8 milyon pou vin R230.2 milyon.

E anba sa Bidze se sanmenm sa ki zot fer *waste*

management services, tir salte, netway semen. Eski sa Bidze oubyen sa logmantasyon dan Bidze li menm, i pe *cater* pou ki 2024 plis semen dan distrik i ganny netwaye? Aköz ozordi ler ou pe regarde la kantite semen ki pe ganny netwaye i bann semen ki nou'n *submit* depi lontan.

So toultan en ler ou demann bann *one off* vini vin fer en semen aköz semen in ganny konstrir e i fer ki i reste sal. So eski sa Bidze ki zot in mete la i pou *cater* pou fer tou bann semen ki nou'n deza fini *submit* avek LWMA?

E an menm tan Mr Chair, zis apre 2020, ti koup larzan bann kontrakter ti redwir zot larzan, en aköz ti dir nou annan problem finans. Me ziska ozordi sa in reste parey. Sa osi petet mon ti a kontan ler zot pe reponn mon kestyon si pou annan semen adisyonnèl ki pou ganny konsidere 2024, eski zot pe mazin re regard osi sa larzan ki ti ganny koupe pou bann kontrakter? Mersi.

MR DEPUTY SPEAKER

Mersi Onorab. Panel?

MINISTER FLAVIEN JOUBERT

Mersi Mr Speaker. Mr Speaker, mon a zis fer en pti

leklersisman lo sa size larzan bann kontrakter. Annefe Mr Speaker, i annan en travay ki nou'n komisyonn ansanm avek *procurement oversight* pou revwar tou kontra LWMA, pou get byen dan detay sa bann kontra. Si bann larzan i apropiye e osi kalite kontra ki pe ganny donnen, zistans, kouvertir eksetera, pou fer sir ki nou kapab ganny bann kontra ki fer sans.

E nou ekspekte ki sa travay dan en peryod apepre 2 mwan a 3 mwan i kapab fini ganny konplete. E i ava antre konman en baz lenformasyon pou letan nou fer *tendering* lannen prosen.

Alors sa size larzan pou ganny adrese letan nou fer sa revi, e menm bann Manm Lasanble ki enterese i kapab vwar sa bann *feedback* ki nou gannyen swivan sa letid. Mon a les CEO koz lo bann nouvo semen ek kouvertir anba bann agrandisman Bidze. Mersi.

CEO SHANE EMILIE

Bonn apre midi Mr Chair avek tou bann Onorab, plezir pou zwenn zot bonn apre midi. *In fact*, dan menm loptik parey *Minister* in fer resorti, se ki nou'n fer en legzersis kot nou'n revwar tou sa bann semen,

bann lezot landrwa ki pa ti zanmen anba kontra.

E parey zot deza okouran wi i annan bann *one-off* ki nou'n fer, bann *cleaning one off cleaning*. Menm bann landrwa baze lo priyorite lo kantite aktivite ki pe arive dan sa bann landrwa, ki nou kouver *the aftercare*.

So dan sa nouvo divizyon of bann *lots* ki pou ganny met dan sa *tender process*, nou'n konsider tou sa bann landrwa ki ti la depi oparavan. E nou pe vin avek en nouvo *proposal* pou nou kapab fer sir ki nou pe *meet* demann dan kominote. Mersi.

MR DEPUTY SPEAKER

Mersi CEO. Mon ava pas laparol aprezan avek Onorab Arissol.

HON SANDY ARISSOL

Mersi Mr Speaker. Bonn apre midi Minis avek ou lekip. Mon anvi retourn lo menm pwen ki Onorab Lemiel in fer ranforsi, se an relasyon avek bann *one-off*. Ou konnen letan nou koz – mon bezwen an menm tan letan mon konmanse fran e onnet avek zot poudir pa nesese ki nou apresye travay ki tou kontrakter pe fer lo nivo distrik.

Nou annan serten defi Bel Ombre nou osi. Par egzanp nou annan plizyer larivyer ki pa ganny netwaye. Sa larivyer ki

deryer lekol ki al dan larantre Lekol Beau Vallon, kot garaz Waye-Hive ziska an desandan lekol larantre Lekol Beau Vallon, zanmen i ganny netwaye. Nou annan plizyer bann landrwa ki pa ganny netwaye.

E souvandfwa ou ganny problem ek bann kontrakter. Parske letan zot tir keksoz dan rigol zot menm anvoy dan bann lakour prive, bann dimoun e dimoun i anvoy ou portre. Zot telefonn ou e zot montre nou. Be an menm tan mon anvi ki letan nou pe vot sa Bidze 287 milyon.

Mon krwar i enportan pou met lanfaz osi lo bann lenspekter. Nou annan bann lenspekter ki nou peye. Ki nou anvi zot zwe zot rol zot osi. Olye nou *as MNA* oubyen *DA* nou bezwen fer sa travay pou zot.

Alor mon kestyon se an relasyon avek bann *one off*. Eski bann lenspekter zot okouran poudir dan Bidze nou annan bann *one-off* ki ou kapab asiste distrik, pou nou zisteman kapab netway bann landrwa ki pa neserman ganny enkli dan lalis ki ti deza la? Kot nou distrik nou santi nou bezwen parske i annan bann sirkilasyon.

Par egzanp ler mon pe koz *one-off* i annan sa bout ki ou

sorti dan vale Le Niol ou fer *shortcut* e ou tonm Beau Belle anba. En landrwa ki dimoun i servi toulezour e menm touris. Napa personn ki netwaye. Eski bann lenspekter sirtou sa enn ki travay avek mwan dan distrik Bel Ombre, eski i okouran ki dan Bidze ki mon pe al vote i annan *off-one*?

Pou ki letan nou lo kote distrik nou demann en led pou zot vin ed nou, i pa dir mwan, “non napa larzan”, kan mwan mon pe vote ou ki larzan i ganny mete, pou nou kapab zisteman fer bann netwayaz, parey deryer laboutik Madanm Laporte Bel Ombre. Mersi bokou Mr Speaker.

MR DEPUTY SPEAKER

Mersi Onorab Arissol. Mon envit *panel* pou reponn sa kestyon lo *one-off*.

MINISTER FLAVIEN JOUBERT

Mersi Onorab. Mersi Mr Deputy. Mon a pas avek *CEO*.

CEO SHANE EMILIE

Onorab, mersi pou bokou pou ou kestyon. *In fact*, pou anmenn en pe klarite se ki dan Bidze si ou pe get 2023 pou mwan donn en pe konteks, i pa neserman ki ou annan en

Bidze ki ganny kouver pou *one-off*.

Akoz ki mon dir sa? In arive dan lefase kot ler Bidze in ganny prezante pou ganny aprouve, pou bann *one-off* baze lo priyorite i pann ganny aprouve. Be 2023 nou'n war nou kot nou bezwen pe esper ler i annan *savings* or fer en pe konpromi pou nou kouver sa bann *one-off*.

So, an 2024 nou pa pe ekspekte pou arive. Mon pa kapab fer okenn *sort off* prononsman lo la. Akoz *to the point* ki mon pe sey fer resorti, ki dan sa *division of lots* nou pe al kouver tou sa bann landrwa ki'n touzour anba *one-off*, *hmm?*

So, sa en pwen ki mon'n fer resorti. E *in fact* tou lenspekter i konnen, ki ler i annan en demann baze lo priyorite, so i annan en kriter ki nou swiv, pou nou fer sir ki nou *go ahead* avek sa *one-off*. E ler lenspekter i konn sa, i annan en prosedir ki i swiv pou nou kapab apre fer sa *one-off* dan sa distrik. Mersi bokou.

MR DEPUTY SPEAKER

Mersi *CEO*. Onorab Aglae?

HON EGBERT AGLAE

Mersi Mr Chair. Bonn apre midi ankor Minis ek *de nouveau le panel*. Minis, mon kestyon i

konsern bann kontrakter *LWMA* ki ankor lo bann *extension*, *ok?* Ou'n nonmen poudir pou annan *tender* mon krwar *next year* ou'n dir, Minis.

Minis, baze lo sa, eski sa bann kontrakter an se moman ki ankor pe fonksyon - aköz zot ti ganny en pe letan me selman ou pe war *extension* apre *extension in regards to* zot kontra tanporerman.

So ki zot pe mazin fer an se moman ziska Desanm an vi ki pou annan bann lezot prosedir ki pou fer? Si ou kapab donn nou en garanti ankor garanti ziska ler ou prosedir *tender* i kontinyen.

E zis pou azoute Minis, konbyen larzan ekstra ki zot pe depanse la *in regards to* sa bann *extension?* Ouswa eski ti form par zot Bidze inisyal *all along?* Mersi.

MR DEPUTY SPEAKER

Mersi Onorab.

MINISTER FLAVIEN JOUBERT

Mersi Mr Deputy. Mersi Onorab. Mr Deputy Speaker, mon ava pas laparol avek *CEO*. Mersi.

CEO SHANE EMILIE

Mersi bokou pou ou kestyon Onorab. *In fact*, pou mwan

anmenn klarite ou bezwen kas li an de porsyon. *There is extension of bann dimoun ki'n lo kontra pou detrwa letan ki'n pas par NTB (National Tender Board.)*

E sa pou mwan fer resorti avek Lasanble ki *NTB* in fini aprouve sa. E i annan sa seksyon ki apel *the Technical Support Section*, ki li ki i pe *issue* bann let pou tou bann kontrakter, pou kontinyen avek zot kontra ziska Mars 2024, *ok?* Mars 2024, ki *by then* nou pou'n fini en posibilite finaliz avek sa nouvo *next cycle of* kontra.

Aprè *the lot extension* ki annan pou mwan fer resorti, se *the extension of basically* bann dimoun ki'n vin lo *one-off*. Aprè nou war nesesite pou nou kontinyen avek *aftercare*. So, la i annan provizyon osi ki nou pe fer kot baze mon pe fer resorti se ki nou'n fini fer en prozeksyon. E nou'n fini kalkil li osi dan Bidze. Mersi Onorab.

MR DEPUTY SPEAKER

Mersi *CEO*. Ou annan klarifikasyon lo la?

HON EGBERT AGLAE

Sonm. Eski sonm i sanze, ouswa zot in servi menm kantite larzan?

CEO SHANE EMILIE

Bon, *in fact* mon pa kapab donn ou sa *figure for the time being*. Mon kapab prepare apre anvoy kot zot? *Ok?* Mersi.

MR DEPUTY SPEAKER

Ok, mersi *CEO*. Mon ava envit Onorab Mondon pou pran laparol.

HON TERRENCE MONDON

Mersi Mr Chair. Mon kestyon i lo *office rent*. Mon vwar ki sorti 248 mil pou al 3.5 milyon pou 2024. E an menm tan mon vwar elektrisite sorti 1.9 milyon pou vin 0.9 pou 2024. Mon ti a kontan en leklersisman Mr Chair. Mersi.

MR DEPUTY SPEAKER

Mersi Onorab.

MINISTER

FLAVIEN

JOUBERT

Mersi Mr Deputy. Mon ava pas laparol avek *CEO* pou eksplike ki bann sanzman ki pe arive lo kote lofis.

CEO SHANE EMILIE

Mersi *Minister*. Mersi Onorab pou ou kestyon. *In fact*, mon le fer resorti se ki parey *Minister* in fer resorti dan son lentrodiksyon, ki lazans i pou ganny *relocate* dan en nouvo lofis. En pe letan lazans pe okip

sa batiman. In fini anvair par diferan problem ki ler ou war lapli i tonbe, nou tou nou pe war en kantite problem ki pe arive.

Menm i annan lenstans kot *building* i pa *safe* pou *staff* travay ladan. I annan akimilasyon *fungus*. I annan bann problem avèk son *wiring*. E apre i en pe toufe osi *its quite damp inside, ok?*

E lanmenm ler ki - ler mon ti pran lofis an Out, mwan menm mwan mon'n remarke ki sa pa en landrwa ase *conducive* pou bann *staff* travay. Ou annan *staff* ki'n la pou en bon pe letan, ki'n osi nou'n remarke ki'n devlop bann kondisyon medikal.

So avèk en *risk assessment* ki'n ganny fer. E nou'n ganny sipor avèk *SIA*. Lanmenm ler mon ti prepar en aplikasyon mon ti anvoy kot *the Accommodation Committee*. Zot ti revwar mon aplikasyon e se la kot ou pe war dan sa Bidze i pe *accommodate* pou sa *office space rent*, ki *by next year* nou pou bouz dan sa lofis. Mersi.

MR DEPUTY SPEAKER

Mersi *CEO*.

CEO SHANE EMILIE

Mr Chair, si ou permet mwan pou mwan kapab spesifye ki

bor. *So, its KB Emporium*. Petet zot pou mazine akoz nou pa ti get bann lezot landrwa. *In fact*, nou'n sey fer en pe resers *Dream Gate* was sa batiman ki nou ti al regarde depi oparavan. Me nou'n war ki i ti napa ase lespas pou *accommodate* sa kantite *staff* ki annan.

Ler nou'n kontinyen fer resers, *the next one* ki ti *available* baze lo lenformasyon ki *Accommodation Committee* ti'n donn nou konman en opsyon, lanmenm ler ki nou'n war *KB Emporium* ti *available*. E in osi kapab nou en bon *rate* pou nou kapab *occupy the space for rent*. Mersi.

MR DEPUTY SPEAKER

Mersi *CEO*. Mon ava apel Onorab Loze.

HON JOHAN LOZE

Mersi Mr Speaker. *Minister, LWMA* zot annan zot en *captive group of* pti biznesmenn anba zot parasol. *Now the way it functions* e sa pa en *political statement* akoz in koumsa depi avan. Se ki ou annan en group dimoun zot ganny kontra *and then left to their own devices*. Zot laba dan la natir zot fer sa ki zot fer.

Eski nou kapab sers resours pou nou annan en lot fason fer dan lefitir, kot zot

kapab annan en lot nivo *engagement* avek zot bann kontrakter, donn zot formasyon, donn zot *training*, *engage* avek zot? Lev zot nivo, anmenn li petet lo sa nivo ki zot, zot ti ava anvwar? Kot i ava *provide* en meyer servis - en meyer rannman pou lasosyete, koumsa nou pa ava maltret zot apre dir zot, zot pe ganny *easy money*. Mersi Mr Speaker.

MR DEPUTY SPEAKER

Mersi Onorab. *Panel*.

MINISTER FLAVIEN JOUBERT

Mersi Mr Speaker. Mersi Onorab pou sa kestasyon. Mon ava pas laparol avek *CEO* ek osi *Deputy*. Akoz dapre mon konpran Mr Speaker, i annan serten demars ki pe ganny fer me *CEO* i ava spesifye. Mersi.

CEO SHANE EMILIE

Onorab mersi pou ou kestasyon. *In fact*, pou mwan fer resorti se ki ler mon'n vini mon'n fer menm lobzervasyon. Mon'n fer mon resers. Dan mon odit mon'n remarke ki in annan bann *training* ki'n ganny ofer anver sa bann biznesmenn, *or* bann pti kontrakter *or* nenport ran ki ou anvwar met zot ladan.

E an menm tan ler nou ti pe fer sa odit, mon ti pe remarke

the fact ki ti annan sa premye *assessment* ki ti ganny fer par sa group, ki ti ganny met ansanm par Minister Finans, pou revwar en pe kontra ki mannyer i ganny administre. Ki sipor ki nou donn kontrakter.

E lanmenm ler enn bann *recommendation for the next cycle*, se ki i enportan ki nou met nivo servis ki kontrakter pe ofer nou lo en standar; baze lo bann diferan defi ki nou pe fer fas avek.

So nou'n fini war ki i annan en loportinite pou nou redres keksoz byen. Me an menm tan, mon pe apel lo bann kontrakter pou zot osi pran en responsabilite. *There is something called être* responsab pou ou prop laprantisaz.

So ler i annan bann loportinite bann lenstiti lokal ki pe ofer bann *training* osi tou, pou zot kapab pli byen zer zot biznes en pe pli byen, pou kapab *meet* sa standar. Sa osi i annan en responsabilite lo sa kontrakter pou li pran sa. Mersi.

MR DEPUTY SPEAKER

Mersi *CEO*. Mon ava apel Onorab Romain.

HON GEORGES ROMAIN

Mersi Mr Speaker. Minis, bonzour ek ou *panel*. Mwan

mon kestyon *CEO* nou deza ganny en koze lo la, *regarding* bann kontrakter ki tir salte dan distrik. E wi, ou ti donn mwan en *feedback* ki sa salte ti ganny tire *over the weekend*.

Be selman mon ankor pe remarke Mr Speaker, ki espesyalman dan bann distrik kekfwa ki annan bokou dimoun, mon vwar ki parey *over the weekend* espesyalman parey ler i dir ou Dimans, bokou bann bin i plen bokou. E ler i dir ou Lendi ki bann dimoun pe desann pe al travay. napa landrwa pou zet salte. E salte i met partou, lisyen i trennen, bann salte i antre kot bann lakour prive, kot bann landrwa ki annan larivyer salte i tonm dan larivyer.

Alors sa i en pe alarman, en? Mon vwar sa en pe alarman *CEO*, Minis. Mon kestyon Mr Speaker, dan sa Bidze ki vremen pe fer provizyon ek sa bann kontrakter ki tir salte, pou fer sir ki zot tir salte a ler?

Akoz mon konnen i en zistans pou zot *drive* ziska kot *landfill*. Me selman i en problem. Ki vremen i annan dan sa Bidze pou rezourd sa problem? Mersi Mr Speaker.

MR DEPUTY SPEAKER

Mersi Onorab. Larepons.

MINISTER FLAVIEN JOUBERT

Mersi Deputy. Mersi Onorab. Mon ava pas avek *CEO*.

CEO SHANE EMILIE

Onorab, mersi bokou. Wi mon mazin byen sa konversasyon. *In fact*, mon osi mon konsernen avek kantite nivo salte ki nou pe war la deor. Mon pa le antre en pe tro bokou dan bann fakter ki osi pe koz sa. Me Minis in koz en pe lo la bomaten.

In fact, pou mwan fer resorti se ki tou sa bann kontrakter ki pe anmas salte zot kontra i fini 2025. So savedir ler nou pou antre dan sa lot *cycle*, nou bezwen fer sir ki nou redres tousala.

But 2024 parey mon ti fer resorti avek ou, nou annan en mekanizm dan kontra, kot i annan en *schedule* ki i pa neserman konman ou pe fini okip ou, ou pe desann ou pe al travay, tou salte in fini ganny tire.

So, i annan li en *window* ant tel ler mon krwar 6er bomaten ziska midi. I annan ki bouz en pe pli granmaten me selman i annan li sa *window* pou li kapab tir salte. Me selman nou pe travay konzwentman avek tou sa bann kontrakter, pou fer sir kot si i

annan en serten problemm lo bann *site*.

Parey dan ou ka pou ou mon ti eksplik ou, se sa konpakter ti annan en problemm mekanikal. E i ti bezwen rezourd sa problemm apre pou li vini vin kolekte. Ki i fer ordinerman i bezwen rod en lot transpor pou vini pou vin kolekte sa salte, apre pou li *resume back* son loperasyon.

So nou deza war i annan serten sa bann defi ki par ler petet i enpakte en pe koleksyon. Me an menm tan wi, mon pou dir ou osi tou ki kontrakter osi i annan en obligasyon anver Lepep Seselwa pou li delivre e fer son travay.

Me selman parey mon'n fer resorti i annan li sa *window* ki nou donn li baze lo son kontra, pou li kolekte salte *ok*. Mersi.

MR DEPUTY SPEAKER

Mersi Mr Emilie. Ou annan klarifikasyon?

HON GEORGES ROMAIN

Mr Speaker mersi. *CEO*, mersi pou ou larepons. Me selman zis kekfwa *over the weekend*, akoz la semenn kekfwa nou konpran akoz bokou dimoun ler i pe al travay - nou pa war sa kantite dan lasemenn. I annan en pti pe plis kontrol.

Be espesyalman *over the weekend* si kekfwa sa ti kapab ganny rektifye dan en fason. Mon pa koz *weekend* plizoumwenn en akoz i fer vremen i en nwizans. Mersi Mr Speaker.

MR DEPUTY SPEAKER

Mersi. Mon krwar *panel* i ava not ou demann. Nou ava apel Onorab Herminie.

HON WILBERT HERMINIE

Mersi Mr Chair. Bonn apre midi bann nouvo manm *panel*. *CEO*, ler mon pe get Bidze pou sa lannen *from* lannen pase in ogmant par 18 milyon. E parey mon krwar ou bezwen okouran bann pti kontrakter ler, ti pe *tender* zot bann kontra, zot ti ganny dir pa enkli sa eleman trezyenm mwan saler ki sa epi ki lazans pou donn zot.

Eski dan sa 18 milyon ki la eski tou sa bann pti kontrakter in gannyen sa larzan trezyenm mwan saler? Mersi.

MR DEPUTY SPEAKER

Mersi Onorab. *Panel?*

CEO SHANE EMILIE

Onorab mersi bokou pou ou kestyon – *ah sorry*.

MINISTER JOUBERT

FLAVIEN

One second. Eskize Mr Speaker, mon pou les *CEO* reponn. Me mon pou demann nou reprezantan Finans osi akote pou li osi met en kontribisyon lo sa repons. Mersi.

MR DEPUTY SPEAKER

Sertennman.

CEO SHANE EMILIE

Onorab, mersi bokou pou ou kestyon. Pou mwan fer resorti se ki trezyenm mwan saler pa ti ganny enkli ladan. Akoz in annan en kominikasyon ant lazans avek Minister Finans komansman lannen. Ki zot ti dir non i pa pe ganny enkli akoz i annan en distenksyon ant *a service contract* avek en *employment contract*.

So sa i sa distenksyon ki'n arive. So ler en kontrakter pe ofer servis i pa lo *payroll* lazans pou li ganny son trezyenm mwan saler. So nou bezwen fer sa distenksyon. Be ler prezan i annan sa provizyon ki ou pe demande, *then* i bezwen ganny aplike *across the board* pou tou lezot kontrakter.

So Finans in fer sa analiz e i pe war ki non, bann kontrakter i pa kalifye pou ganny sa Trezyenm Mwan Saler. Mersi.

MR DEPUTY SPEAKER

Mersi *panel*. Eski Mr Commettant i annan en pwen pou *weigh in* dan sa deba?

DEPUTY COMPTROLLER GENERAL JUDE COMMETTANT

Good afternoon, everyone. Thank you, Mr Chair. Mon krwar *CEO* in *actually* eksplik sa ase klerman, ki *basically* sa bann dimoun pa pou neserman *under the direct employ of Government*. I pou en servis ki i pe *provide* Gouvernman. E distenksyon in ganny fer se pou sa rezon, ki ou pa pe war sa trezyenm mwan i aplikab direktteman pou zot.

MR DEPUTY SPEAKER

Mersi Mr Commettant. Ou annan klarifikasyon?

HON WILBERT HERMINIE

Yes, Mr Chair. Kekfwa *CEO* pa'n tro ganny li byen. Ler zot ti pe *bid* dan zot *bid* ti dir zot pa enkli sa. Akoz si mwan mon pa'n kalifye pou mwan gannyen, dan mon *bid* mon ti ava met en pti pe pli o pou mwan *cater* sa *under* mon *bid*, pou mwan kapab kouver mon bann travayer. Be ti dir zot pa mete.

So, epi la zot war zot pa konnen kot pou al tap laport. So sey dir sa bann dimoun kote zot

pou ale pou ganny en leklersisman. Mersi.

MR DEPUTY SPEAKER

Mersi Onorab. Eski zot le donn en larepons ankor en pe plikler?

MINISTER FLAVIEN JOUBERT

Thank you, Mr Deputy. Mon ava demann reprezantan Finans pou kontinyen avek lesplikasyon.

DEPUTY COMPTROLLER GENERAL JUDE COMMETTANT

Yes, thank you, thank you Mr Chair. *Thank you, Minister*. Wi, si - *anyway* mon pa pou kapab *comment* egzaktman lo diskisyon ki'n ganny fer. Mon mazin selman si i en desizyon ki ti'n ganny pran konmkwa ki zot sipoze pe met li a sa moman i ti pou en keksoz ki ti pou ganny revwar. Sa en keksoz ki *then* Gouvernman i ava kapab fer en *analysis* pou gete en *assessment* pou gete ki mannyer pou asiste. Si sa ti ane sa komitman ki ti'n ganny fer.

Me *as far as* diskisyon ki nou'n annan, se i annan sa distenksyon parey mon pe dir *between* en lanplwa direk avek sa *service contract*. So se sa

rezon ki ou pa war li ou pa pe war li.

MR DEPUTY SPEAKER

Mersi Mr Commettant. Mon krwar nou kapab *move on* lo sa pwen. Nou ava pas laparol avek Onorab Porice.

HON DOYACE PORICE

Mersi Mr Speaker. Minis, anba latab 1, i annan en logmantasyon lo *other allowances*. Eski travayer LWMA Praslin pou ganny en pti *allowance* ladan? Mersi.

MR DEPUTY SPEAKER

Mersi Onorab. *Panel* i annan en kestyon tre direk konsernan bann kontra lo Praslin.

MINISTER FLAVIEN JOUBERT

Mersi Mr Deputy. Mersi Onorab pou ou kestyon. LWMA nou bezwen get li an antye konman en lazans pa konman diferan morso. Me mon a demann CEO pou klarifye byen travayer LWMA Praslin, si i annan keksoz pou zot dan sa Bidze. Mersi.

CEO SHANE EMILIE

Mersi Minis. Mersi Onorab pou ou kestyon. Wi, *in fact* baze lo analiz so *it's across the board*. Savedir tou *employee of* lazans i

bezwen ganny son benefis, *ok*.
Mersi.

MR DEPUTY SPEAKER

Mersi *CEO*. Mon ava pas laparol
avek Onorab Gill.

HON CHURCHILL GILL

Mersi Mr Chair. Mon kestyon i
lo sa trezyenm mwan saler ki pa
dan lagreman bann kontrakter
LWMA. Eski sa bann dimoun ki
annan kontra ek *LWMA* zot pe
anploy en dimoun oubyen 2
depandan lo grander ki zot
annan. Sa bann dimoun ki pe
ganny anploye zot tonm anba
Employment Act.

Akoz si zot tonm anba la,
sa dimoun ki annan kontra
avek *LWMA compulsory* i
bezwen pey zot trezyenm mwan
saler, aköz Lalwa ki *compel* zot
pou fer sa.

Sey dir mwan ki *LWMA* i
annan pou dir lo la. Aköz ler
nou'n donn larepons taler, nou
pa'n pran kont poudir en
dimoun ki anploye i kouver
anba *Employment Act*.

E *Employment Act* menm
ki fer sa provizyon pou
trezyenm mwan saler. Alors si
non sa dimoun ki annan kontra
ek *LWMA* i pou an
kontradiksyon avek Lalwa
Lanplwa, si sa dimoun i met en
grievance pou son trezyenm
mwan saler. E i pa ganny peye

aköz dan son kontra napa sa
larzan. Mersi.

MR DEPUTY SPEAKER

Mersi Onorab. Eski *panel* i le
klarifye sa vizavi Lalwa Lanplwa
e kontra *LWMA*?

MINISTER

FLAVIEN

JOUBERT

Mersi Mr Deputy. Mersi Onorab
pou sa pwen. Mr Deputy, mon
krwar sa kestyon Finans in
donn en lendikasyon ki i pou fer
lo la. Se ki si sa konversasyon
in ganny fer e in ganny
kominike avek bann dimoun
dan sa fason. I pou bezwen
annan en analiz pou bezwen
ganny fer lo si vremen i annan
en lenplikasyon pou
Gouvernman oubyen non.

Me nou ti a voudre konnen
nou pou retourn an aryer nou
pou al get avek *Procurement* ek
tou bann dimoun, letan bann
kontrakter ti ganny angaze, ki
kalite konversasyon ki'n ganny
fer e kalite promes ki ti ganny
fer dan sa letan. Aköz mon pa
krwar i pou normal pou nou pa
onor okenn promes ki'n ganny
fer.

Me selman nou bezwen
verifye si vremen ti annan sa
laranzman. E si i annan sa
laranzman *then* nou ava fer
analiz ansanm ek Finans lo la.
Nou ava gete ki repons nou pou

donn sa bann kontrakter.
Mersi.

MR DEPUTY SPEAKER

Mersi Minis. Ou annan klarifikasyon lo la?

HON CHURCHILL GILL

Wi. Minis pa'n reponn mon kestyon li. Ou'n eksplik mwan sa ki Finans in dir. Nou'n konpran sa ki in dir nou. Be sa ki mwan mon pe demann ou sa en sityasyon an relasyon avek sa bann dimoun pa pe ganny kouver anba la.

So reprezantan Finans bezwen konpran sa legalite ki antre ladan pou sa bann dimoun ki annan kontra anver son bann travayer. Sa ki kestyon. Mersi.

MR DEPUTY SPEAKER

Ok pou nou fer sir nou reste lo Bidze, pou nou fer sir nou reste lo Bidze. Eski letan bann kontrakter i ganny kontra avek LWMA, eski enn bann kondisyon zot kontra fodre zot anploy sa bann dimoun annakor avek *Employment Act*? Ouswa si lamazorite sa bann dimoun i travay *casual* avek sa bann kontrakter ki ganny kontra avek LWMA? Mersi.

MINISTER **FLAVIEN**
JOUBERT

Mersi. Mr Deputy, dapre sa ki mon okouran napa en lobligasyon pou zot anploy en dimoun. Mon konnen poudir si en dimoun i anploye i bezwen travay dapre Lalwa Lanplwa. Me sa dimoun i met en *bid* pou li *provide* en servis pou Gouvernman.

In dir ek Gouvernman mon a fer sa louvraz pou ou pou sa sonm. Napa okenn lezot kondisyon ki dir ou bezwen anploy en dimoun oubyen non.

Alors, son desizyon ki li i pran lo lanplwa ouswa *part time* ouswa *casual*, i annan ki annan *casual*. I annan ki fer *part time*. I annan ki dan en lot louvraz apre i fer en bout avek kontrakter sa i zot laranzman. Me selman si sa dimoun i pe ganny gouvernen par Lalwa Lanplwa, *then* sa bann provizyon lanplwa i antre. E sa i en analiz ki bezwen ganny fer pou sak ka dapre mannyer i egziste. Mersi.

MR DEPUTY SPEAKER

Ok, mersi. Donk, nou ava *move on* aprezan. Onorab Naidu.

HON SATHYA NAIDU

Bonn apre midi Mr Chair, Minis ek ou delegasyon. An relasyon avek Bidze pou LWMA, ler mon'n swiv bann kestyon ki'n ganny poze par mon bann koleg

lo tou lede kote latab, lannen ale lannen vini, nou demann menm kestyon.

Alors lefikasite sa lazans osi pe ganny kestyonnen. Mon le konnen si atraver sa Bidze ki pe ganny donner apre byensir nou pou vot lo la, eski zot pou kapab sanz direksyon ki sa lazans pe pran?

Rezon mon pe dir sa, se akoz i annan pa mal konsern vizavi lafason ki kontrakter pe rann servis dan la kominote. E nou konnen poudir 2024 Mars avan zot ti dir Desanm, la zot in bouz Mars, Mars i pou annan bann kontra. Ki bann kondisyon ki pou vreman sanze pou fer sir ki la kominote i pou osi kapab vwar en benefis ki tanzib.

Lot pwen ki mon pou bezwen fer resorti Mr Chair, se i annan alegasyon ki ganny fer vizavi bann lenspekter, poudir ki zot pe pran gous ek kontrakter. E si an ka, si an ka sa pe arive, ki kalite mekanizm ki an plas lo en baz entern pou *deal* avek sa defi? Mersi.

MR DEPUTY SPEAKER

Mersi Onorab. *Panel* i annan de pwen la.

MINISTER **FLAVIEN**
JOUBERT

Mersi Mr Speaker. Mersi Onorab pou sa 2 pwen vreman enportan. Mr Chair, mon pou zis koz lo sa zafer alegasyon koripsyon e apre *CEO* i a koz lo lezot size konsernan efikasite ki mon krwar i vreman enportan pou nou koz lo la.

Alegasyon okenn koripsyon parey mon'n deza montre e demontre, se ki si i annan koripsyon anba sa Minister ki mwan mon responsab, mon pou pran aksyon avek okenn dimoun mwan.

Alor pou mwan anmenn sa bann alegasyon e mon pou fer sir ki i ganny *investigate*, e nou pou fer sir ki aksyon i ganny pran avek sa bann dimoun ki enplike ladan toultan.

Alor pou mwan i en kestyon anmenn bann lenformasyon e nou ava swiv lo sa bann alegasyon. Akoz mwan personnelman, mon pa dakor avek sa bann zafer koripsyon, ouswa tou sort kalite laranzman anba anba. E mon ti a kontan ki si i annan, nou aktyelman fer en legzanp avek sa dimoun ki pe fer sa kalite koripsyon.

Alor Onorab, mon donn ou mon lasirans e mon ti a kontan si i annan bann alegasyon ki

valab, anmenn li devan, e nou ava fer li ganny *investigate*.

Mon ava pas laparol avek ou permisyon Mr Chairman. Mon ava pas laparol avek CEO pou koz lo lafason ki nou pou travay lo efikasite dan travay ki sa lazans i fer. Mersi.

MR DEPUTY SPEAKER

Mersi *Minister*. CEO?

CEO SHANE EMILIE

Minister mersi. Onorab, mersi pou ou kestyon. *In fact*, pou mwan dir se ki i en bon kestyon, akoz mwan osi mon pe reflexir en bon pe lo sa kestyon depi ler mon'n pran sa pozisyon.

Pou mwan efikasite i vremen enportan akoz nou annan en lobligasyon anver Lepep Seselwa pou nou delivre. Pa i vre?

So tou lazans piblik i annan en obligasyon. E parey mon'n fer resorti mon'n fer sa odit e mon'n war kot i annan bann defayans. E i annan bann serten stratezi ki mon pou met ater *eventually* konmansman 2024. I annan ki mon deza konmans enplimante e mon war i pe raport en pe fri. Petet ou pou demann mwan kwa enn de sa bann mezir.

Bon, baze dan sa kontra ki TSS in met ater i deza annan bann paramet, bann kriter ki

kontrakter i annan en obligasyon pou li *meet*, en? So nou touzour *go back to the contract* pou nou *hold* sa kontrakter *accountable*.

E i annan serten kontrakter la *out there* ki'n ganny son *warning*. Bann *meeting* ki annan ki nou koz avek li, pou nou fer sir ki i pe delivre. An menm tan i annan en sistenm kot nou pe revwar en pe lenspeksyon. I annan travay ki nou pe fer konzwentman avek tou bann lenspekter.

E bann lenspekter osi pou ganny *additional training* pou kapab delivre. E se la kot zot bezwen entansifye en pe zot fason travay, *be smart and be efficient and be effective at all times*.

So apre lo sa lot pwen ki ou'n resorti, se ki menm i annan piblik ki devret la pou donn nou sa sipor. *DA* parey nou konnen *DA* bezwen aprouv tou sa bann rapor avan ki mon met mon stanp lo la, pou kontrakter ganny peye. Le moman ki *DA* i met son komanter in dir i pa agree avek travay ki sa kontrakter in fer pou sa mwan, *then* otomatikman kontrakter pa ganny peye.

E la nou bezwen *hold* li *accountable*, pou li retourn *back*

pou li fer son travay ziska ler apre ler i ava fer, i ava *meet* nou standar. Apre la mon a stanpe pou li ganny peye. So, i annan tou sa bann mezir an plas ki mon pe enplimante. E mon war li i pe raport fri. Me tou nou konnen sanzman i progresiv.

So nou pou arive kot nou sipoze arive. E 2024 avek sa nouvo program *RBM* osi tou i ava ede pou fer sir ki nou amelyor en pe performans nou bann lenspekter. E tou bann ki'n pare pou travay i a travay. Tou bann ki pa pare pou delivre i annan mezir an plas ki Gouvernman in mete. E nou a pran aksyon kont zot pou zot delivre. Mersi.

MR DEPUTY SPEAKER

Mersi *CEO*. Mon ava aprezan apel Onorab Pillay.

HON SEBASTIEN PILLAY

Mersi Mr Chairman. Mr Chairman, mon pe retourn lo en pwen ki Minis in fer dan son diskisyon dan son prezantasyon. Dan en repons ki in donnen e mon pe regard son Bidze.

So, mon pe regard ou *other uses of goods and services* kot mon vwar en alokasyon 101 milyon lannen pase e en logmantasyon 110 milyon. E mon vwar zis anba *maintenance*

services ki annan en logmantasyon apepre 7 milyon. Ki sorti 15.9 pou vin 22.4, *right?*

Now ou'n dir ek nou koumsa poudir zot pe zwenn konman en Komite pou fer revizyon lo sa bann kontra ki'n ganny *awarded*, pou vwar si sa bann pri sa kontra i *ok*. Ou sipoze fer sa ou.

Me ou'n osi dir avek bann Onorab lo sa kote latap ler nou'n demann ou kestyon vizavi trezyenm mwan, ki sa dimoun li i *bid* i fer son servis e i bezwen pey son trezyenm mwan lo menm pri, lo menm larzan ki i ti pe gannyen, menm si in annan en logmantasyon 10poursan.

Menm si *cost of living* in monte e i bezwen fer parey li. Selman ou, ou pe fer revizyon me ou napa okenn larzan an plis ki ou'n ganny mete dan Bidze.

So kestyon ki mon annan pou ou, kote sa larzan an plis ki ou pou servi ler ou'n fini fer revizyon lo sa bann kontra? Kote sa an plis pou sorti, ki ou pou met lo sa bann kontra pou revwar sa bann *figures* ki sa bann kontra i reprezante?

Akoz problem ki nou pe war la, dan larepons ki ou pe donn nou, ou pa pe adres kestyon. Kestyon ki'n vin kot ou se ler mwan mon *bid*. Meton

mon *bid* R30 mil, ozordi mon annan Trezyenm Mwan si mon vini pou mwan *bid* R40 mil pou mwan kouver sa trezyenm mwan akoz mon annan dimoun ki anploye ek mwan.

Ou pa donn mwan kontra ou akoz ou'n koup la kantite larzan ki mon ti pou peye lo kontra. Avan sa ti R65 mil menm pou par egzant pou *bin site* la in ariv R35 mil.

Ki mannyer ou pou espekte en kontrakter i kapab pey sa? Mon war i drol kote *LDS* pa enterese avek son dimoun la dan semen *anymore*. I parey taler sa *MNA* ki ti dir. Dimoun pe *get rich quick* dapre zot, zot krwar dan semen?

MR DEPUTY SPEAKER

Onorab, ou kontinyelman fer sa tou dimoun in demann en kestyon. Napa person ki'n fer en largiman avek *panel*. Napa person ki'n fer bann alegasyon dan tou diferan direksyon.

Onorab Pillay, ou pa pli spesyal ki okenn Manm Lasanble la anndan!

(APPLAUSE)

MR DEPUTY SPEAKER

Alor koman en dirizan, ou bezwen egzers en serten restren

pou pa gaspiy letan Lasanble, silvouple. Ou'n fini fer ou pwen?

HON SEBASTIEN PILLAY

Non mon pa ankor fini fer mon pwen, ou'n koup mwan!

MR DEPUTY SPEAKER

Wi, be ou'n bezwen pa fini, akoz ou pe al dan tou kalite direksyon.

HON SEBASTIEN PILLAY

Non oule - mon kapab fini? Mon kapab fini mon pwen?

MR DEPUTY SPEAKER

Si, selman ou demann en kestyon, *that's all*.

HON SEBASTIEN PILLAY

Mon kapab fini mon pwen?

MR DEPUTY SPEAKER

Demann en kestyon.

HON SEBASTIEN PILLAY

Wi, *cool down* ou.

MR DEPUTY SPEAKER

Proceed.

HON SEBASTIEN PILLAY

Les mwan demann mon kestyon. *Cool down* ou, *relax!*

MR DEPUTY SPEAKER

Get sa, si *panel* pa kapab reponn ou, mon ava reponn ou

dan zot plas. Akoz ou pa kapab sak fwa en *panel* i vin la ou, ou vin fer kankan ek sa bann dimoun. *You can't keep doing this. So mwan ki pou reponn ou aprezan pou dir ou konport ou! Silvouple proceed.*

HON SEBASTIEN PILLAY

Oule dir mwan ou war mwan pe fer kankan, ler mon pe debat lo non sa bann kontrakter la deor? Minis, mwan mon pa satisfè ek larepons ki ou pe donn nou, akoz i annan keksoz ki pa azoute.

Kote ou pou ganny larzan pou pey pou sa revizyon kontra si ou pann met li dan Bidze, e akoz ou pa ti enkorpor dan ou revizyon kontra konsiderasyon lefe ki Gouvernman in donn 10poursan logmantasyon, *cost of living* in monte e sa bann kontrakter i sipoze pey trezyenm mwan?

E si Lasanble pa kontan mon koz lo lapar bann kontrakter ki netway semen, netway bin, sa i problemm Lasanble Mr Speaker.

MR DEPUTY SPEAKER

Onorab, ou'n fini fer le pwen. Le pwen keston i se ki, ki manner pou ganny larzan ekstra pou *cater for* logmantasyon a lavenir. Se tou

ou pwen. *Panel* silvouple reponn sa keston. Mersi.

MINISTER FLAVIEN JOUBERT

Mersi Mr Speaker. Mersi Onorab pou sa keston de parti. Mr Speaker, kote eski nou pou ganny larzan pou azoute letan nou fer revizyon kontra? Mr Speaker, revizyon kontra mon krwar Onorab i a dakor poudir i neser. Nou bezwen tonm dakor poudir nou bezwen re get sa bann kontra pou fer sir i pe delivre.

Akoz i annan dimoun i dir ou tel dimoun i pa pe fer nanryen i pe ganny peye; tel larivyer pa ganny netwaye; sa lans pa vo lapenn eksetera, eksetera. Alor nou bezwen fer sa revizyon. Prezan letan nou pou fer revizyon, i pa vedir i pou monte. I kapab nou *collapse* la kantite kontra ki nou annan.

Olye ki nou annan 350 nou annan 250 kontra. I annan dimoun ki pe fer lans o bor semen, rigol lo bor menm semen; *bus stop* lo menm larout ki en dimoun pe koup zerb otour li. Eski nou pou annan menm dimoun pe fer sa?

Nou kapab fer en kontra dan 2 kontra. Alor i posib ki dan sa Bidze ki nou annan pou fer netwayaz, nou kapab war efikasite ki fer ki nou annan pli

bon kalite kontra. Me selman i posib nou annan mwens kontra.

Alor fodre – mon krwar i enportan ki nou kapab tonm dakor lo la avan. Annou fer en revizyon nou ganny bann lenformasyon. Onorab, i vre sa.

(Off-Mic)

MINISTER **FLAVIEN**
JOUBERT

Nou pa pe – mon krwar i en keksoz ki vre, i vre. Nou annan omwen 400 kontra ozordi. 400 pti kontra e i bann kontra ki marye lo kanmarad.

I annan landrwa kot ou zwenn en dimoun i pe koup zerb o bor en *bin site*. E sa lot dimoun pe koup zerb lo sa menm semen kot i pe zerb o bor sa *bin site*. Be akoz nou pa zwenn sa 2 kontra ansanm?

Malerezman nou pou annan dimoun ki pa pou ganny louveraz. Me selman nou bezwen fer efikasite. Be nou bezwen dir laverite dimoun. Annou koz laverite. Annou dir laverite. Annou dir laverite.

(APPLAUSE)

MR DEPUTY SPEAKER

Minister, ou'n fini met ou pwen?

MINISTER **FLAVIEN**
JOUBERT

Me prezan letan nou a fini fer sa revizyon, nou ava war kot i annan efikasite ouswa napa. E prezan nou ava konpran egzaktman ki kalite lazisteman ki nou bezwen fer.

Akoz ozordi nou pa kapab zis dir poudir nou pou fer monte kontra ouswa nou pou fer monte larzan. Akoz nou pa konnen ki i pou donner an term rezilta.

Alor annou fer sa evalyasyon an detay. Annou tonm dakor lo son rezilta. Manm Lasanble i ava war rezilta e prezan nou ava konpran egzaktman ki mouvman ki pou annan dan Bidze an montan, an desandan nenport ki fason. Mersi.

MR DEPUTY SPEAKER

Mersi Minister. Nou ava *proceed* se Onorab Kelly Samynadin ki *next on the list*.

HON KELLY SAMYNADIN

Mersi Mr Chair. Bonn apre midi Minis ek delegasyon LWMA. Minis, prenon kont zot priyorite stratezik ki pou ankouraz en *shared ownership* e respe pou bann fasilite Leta ek piblik, mon ti a kontan konnen ki stratezi Minister Lanvironnman

an sa ki konsern *illegal dumping*.

Kot nou pe vwar dimoun dan kominote, dan distrik, kot zot pe kontinyelman *dump* zot salte lo bann propriyete prive ensi ki propriyete Gouvernman olye dan bann *bin sites* ki'n ganny met a zot dispozisyon.

So si posib elabor en pti pe lo zot stratezi ki zot pe vin avek, pou kapab elimin en pe sa bann sityasyon koumsa, ki nou rankontre dan distrik. Mersi.

MR DEPUTY SPEAKER

Mersi Onorab. Nou ava envit *panel* pou reponn.

MINISTER FLAVIEN JOUBERT

Mersi Mr Deputy. Mersi Onorab pou sa pwen. Mr Deputy, mon krwar i enportan ki – lo konmansman mon ti koz en pe lo lefet ki nou pe ranforsi nou bann servis, pou fer *community outreach* avek ledikasyon.

E *LWMA* ozordi li i annan li en dimoun ki *focus* lo ledikasyon ki'n atase avek li. Mon krwar mon'n deza eksplik Lasanble, ki nou pe pey li anba *ATF* pou sa premye 2 an.

E apre nou pou apartir 2025 nou pou met sa pozisyon dan Bidze *LWMA*. Savedir en sipor ki *LWMA* pe gannyen ozordi.

E sa i pou ede dan nou zefor pou nou anmenn bann kominote, plis lenformasyon ek kominote kot i konsern *illegal dumping*, bann size otour salte, bann fason fonksyonnen kot bann *bin sites* eksetera.

Me mon pou osi pas laparol avek *CEO*, pou li al en pe plis dan detay, bann zefor ki nou pou get ladan, pou nou kapab fer sir ki bann dimoun i konpran en pe pli byen lo lafason ki zot pou zer zot salte pou evite ki i annan problem. Mersi.

MR DEPUTY SPEAKER

Mersi Minis. *CEO*?

CEO SHANE EMILIE

Mr Chair, mersi. Mersi *Minister*. Mersi Onorab pou ou kestyon. Pou mwan fer resorti se ki i annan en legzersis, kot mon pe entansifye en pe partenarya ki nou annan avek tou bann diferan antite. E an menm tan travay ansanm avek *Local Government*.

Akoz *Local Government* i annan en rol ase enportan pou li zwe osi tou. E i annan en travay ki nou pe fer, kot parey *Minister* pe fer resorti sa zofisye pou ledikasyon, kominikasyon osi tou. Kot nou pe etabli en komite, en group, kot nou pe anmenn sekter prive avek

sekte piblik. Pou nou kapab an term konman en tim, pou ale e *raise* en pe *awareness* anver responsabilite ki Seselwa i bezwen annan anver son lanvironnman.

I en prensip fondamantal pou nou tou protez, promot avek prezerv nou lanvironnman. E si nou e kontinyelman fer sa bann *illegal dumping*, nou tou nou bezwen konpran ki bann risk ki asosye avek sa.

So, i annan sa travay ki nou pou fer. So, i pou annan en kanpany ledikasyon ki nou pou antre ladan, pou nou enplimante. Pou nou fer sir ki Seselwa i konpran en pe bann diferan defi ki annan laba.

An menm tan, nou pe osi fer sistenm kot nou deza annan nou *hotline* kot lenformasyon ki nou gannyen, nou rikorde. E nou proaktivman travay avek tou bann lezot antite.

Nou annan *Enforcement Section* kot Departman Lanvironnman, ki annan en sistenm lentelizans ki mon pa kapab donn bokou lenformasyon lo la. Pou nou fer sir ki nou ale nou kapab fer *investigation* e konnen en pe lekel. I annan enn de ki'n ganny *intercepted* e i annan aksyon ki pe ganny pran kont sa bann dimoun, *ok?*

E an menm tan osi mon lans en lapel an ver piblik, ki *at any point in time* ler zot pe war bann aktivite pe arive, profite met okouran zot *DA*, met okouran osi *LWMA* pou nou kapab pran aksyon kont sa.

Akoz parey nou pe remarke dan landrwa piblik, parey *Minister* in fer resorti bomaten, i annan en mank responsabilite lo la par Seselwa osi tou, *ok?* E sa i enportan sa. E parey nou slogan i dir "Laprote i nou responsabilite".

So, i enportan ki tou dimoun i konnen ki lenpak son aksyon i annan dan nou lanvironnman frazil, ki raport en kantite reveni anver nou lekonomi, *ok?* So sa i enn de bann mezir ki nou pe met an plas. Mersi.

MR DEPUTY SPEAKER

Mersi *CEO*. Ou annan klarifikasyon lo la?

HON KELLY SAMYNADIN

Yes, Mr Chair. Nou vreman apresye sa loportinite ki zot pe al – pa loportinite me selman sa louvertir ki zot pe al fer avek *Local Government*. Nou vreman apresye sa petet i ava en pti pe pli byen, pou nou kapab anmenn plis sa bann konsern devan an ver zot.

Me selman petet si ou ti kapab dir nou, ki limero sa *hotline* ki nou kapab servi, pou kapab anmenn sa bann *case* devan *please*. Mersi.

CEO SHANE EMILIE

Limero i 2822600. Mersi.

MR DEPUTY SPEAKER

Mersi *CEO*. 822600. Nou met 2 devan akoz i en *mobile number*. *Next* enterven an se Onorab Vidot.

HON AUDREY VIDOT

Mersi Mr Chairman. Bonn apre midi *CEO* ek *Deputy* avek nouvo reprezantan Finans ki'n zwenn nou apre midi. Mon pe regard dan *materials and supply*, pou 2024 mon pann okenn provizyon pou *litterbins*. E Roche Caiman nou annan en konsern, ki i annan en kantite mankman bin dan bann *bin site*.

Mon pe regarde si zot napa provizyon pou 2024, oubyen si i en *oversight*. Dan sa menm laliny, mon konpran osi ki i annan bann dimoun ki fer bann zafer *recycling*.

Bann *recyclers*; zot pa ankor ganny peye depi sa lannen ki zot sipoze – depi Zilyet sa lannen ziske la zot pa ankor ganny peye zot bann *dues*. Eski zot pou gannyen, oubyen si zot

pe fer provizyon pou boner lannen prosenn? *Please thank you*.

MR DEPUTY SPEAKER

Mersi Onorab. *Panel* ou annan larepons pou –

MINISTER FLAVIEN JOUBERT

Mersi Mr Deputy. Mon ava pas avek *CEO* ek *Depite CEO* pou pas lo sa size *recyclers* peyman e osi *procurement of bins*. Mersi.

CEO SHANE EMILIE

Mersi *Minister*. Mersi Onorab pou ou kestyon. Pou mwan fer resorti, se ki ordinerman bin i ganny aste tou le 2 an. So ti'n fini ganny enkorpoze dan Bidze 2023. E nou'n fini *procure* - nou'n fini antre dan sa prosesis pou prokir pou *procure* 3 mil bin.

E byento nou pou ganny sa kantite bin pou nou kapab deservi kominote. E nou'n fini fer en odit pou nou konnen ki bor pou nou plas sa bann bin.

An menm tan osi nou ti ganny – nou ti tap osi dan nou *savings*. E nou sipoze pe aste ankor en lot 100 bin savedir pou vin 3100 bin.

E sa *eventually* an 2024 i pou annan ki nou pou konmans distribye, akoz nou pe regarde ki i annan en bon pe bann *bin*

site kot bin i manke aköz vandalizm. Dimoun i pran bin i vole.

Or dimoun i pran bin, i transport son bann debri konstriksiyon or dimoun i pran bin i met li en lot landrwa. E i annan sa legzersis kot nou pe pran serten aksyon kont sa bann endividi.

So nou pou fer provizyon pou nou ranplas bann landrwa kot bin in ganny vole. Se la kot mon oule lans en lapel an ver piblik pou pran en pe responsabilite. E montre en respe anver *asset* Gouvernman, en? Pou dezyenm kestyon mon a les Depite CEO reponn. Mersi.

MR DEPUTY SPEAKER

Mersi.

DEPUTY CEO RAHUL MANGROO

Mersi *Minister*. Mersi *CEO*. Onorab, konsernan *recycling programme*, mon le zis averti bann manm piblik egalman bann *Redeem Centres* la deor, ki an term peyman i – peyman pe ganny fer e parey ou konnen sa program ki mannyer i ete la, ou pa pou neserman ganny peye deswit, ler ou'n soumet ou *invoice*. Aköz i annan tou bann *checks and balances* zot bezwen fer.

Alor peyman pe ganny fer li. Peyman la in ariv ziska menm peyman Septanm in ganny fer. Peyman Oktob in ganny fer. I pou arive de ka kot serten bann peyman en pe dan Zilyet oubyen Out enn, de ant ant pa ankor ganny peye. Sa i normal aköz i annan serten an Angle i dir *anomalies* lo sa *invoice* oubyen lo serten dokimantasyon.

Be selman peyman pe ganny fer e nou rekonsilye peyman tou le mwan an ver *invoice* ki'n ganny soumet. E la tou dernyerman diskisyon nou annan avek departman se ki nou pe fer en travay entans vi ki program pe al fermen pou sa lannen. Program pe ariv a lafen sa lannen pou nou kapab *settle* tou bann aryeraz. Me selman peyman pe ganny fer li. Mersi.

MR DEPUTY SPEAKER

Mersi *Deputy*. Ou annan klarifikasyon?

HON AUDREY VIDOT

Zis en pti rekomandasyon ki mon ti anvi met devan zot. Enn, i annan pou fer avek sa ki zot in dir sa limero kontak ki pou donn pou kapab dimoun i kapab fer rapor. Ti ava byen osi met lo bann *either* kot bann *bin*

site pou fasilite bann dimoun pou fer rapor.

Aprè dezyenman letan zot in koz lo *landfill* pli boner. Letan zot fer – si dan ka evantyalite kot i annan dife mon konnen zot frenm en serten bann lenstitisyon. Parey mon get Vilaz Roche Caiman, lekol i dan vilaz. So *once* ki zot frenmen zanfan i reste dan kominote e paran i dan travay.

Petet dan zot sansibilizasyon ki zot fer lo bann prevansyon, ti ava byen ki zot fer li en pti pe souvan ki tou sa size bann prekosyon ki bezwen ganny pran pou bann paran kapab prepar zot zanfan. Ki letan zot reste lakaz, *at least* i annan serten prekosyon ki ganny pran. Mersi.

MR DEPUTY SPEAKER

Mersi Onorab. Mon krwar 2 sizesyon ki *panel* i ava pran kont. Mon ava prezan apel Onorab Monthy. Minis ou ti le dir keksoz lo la?

MINISTER FLAVIEN JOUBERT

Mr Deputy, zis en pti lenformasyon vitman. Bann piblik a remarke poudir lo bann bin i annan en stanp ki'n ganny mete konmela. Depi 2018, mon krwar in konmans fer sa. E sa ki lo la se limero telefonn sa. Si

ou get lo bin devan i annan en pti kare. Lo sa pti kare i annan limero telefonn ki ou kapab telefennen e sanmenm sa limero *hotline*.

MR DEPUTY SPEAKER

Mersi. Onorab Monthy ou ava *proceed*.

HON PHILIP MONTHY

Mersi Mr Chair. Bonn aprè midi Minis avek ou delegasyon. Mr Chair, zis avan mon demann mon kestyon nou lo sa kote nou siporte bann pti kontrakter.

Me selman mon pou demann – nou siport bann ki serye. Mon pou demann Minis akoz kontra ti fini an Out. Nou ti ganny dir in *extend* ziske Desanm, Desanm nouvo kontra pou ganny *issued*. La zot in dir nou Mars lannen prosenn.

Mon espere ki Mars lannen prosenn in pare e ki nou vwar bann kontrakter ki serye. Akoz mwan Cascade i annan kontrakter mon pa oule vwar zot ankor, *ok?*

Mon kestyon Mr Chair, ou Minister pe organiz en –

(Off-Mic)

HON PHILIP MONTHY

...(swadizan ti en *teacher*) *anyway*.

Ou Minister pe organiz en *investor forum* le 22, le 23 sa mwan avek tit “*Creating a Zero-Waste Landfill in Solutions*”. Eski Minis ou kapab donn nou en pe lenformasyon lo ki bi sa *forum*, e si i annan investiser ki ganny kontra, eski sa peyman sa kontra pou ganny fer atraver sa Bidze, oubyen atraver lezot mwayen finansman?

E ki mannyer zabitan Cascade posibleman i a benefisye atraver sa kontra vi ki *landfill* i zis akote lanmenm dan mon distrik? Mersi.

MR DEPUTY SPEAKER

Mersi Onorab. *Panel*?

MINISTER FLAVIEN JOUBERT

Mersi Mr Speaker. Mersi Onorab pou sa keston vreman enportan, kot i konsern bann nouvo demars, kot i konsern salte.

Sa *investor forum* in vin apre ki nou’n fer diskisyon avek en lebra *World Bank* ki apel *IFC*. Kot nou ti pe koz premye moman lo *waste-to-energy*.

E letan nou’n diskite avek zot nou’n aprofondir e nou’n realize ki i pa neserman ki nou pou fer en demann pou okenn konpanyen vin avek solisyon pou zis *waste-to-energy*. Me vin avek okenn

solisyon ki donn nou en rezilta *zero landfill*.

Savedir menm si ou pe *divert* pou lezot fason zer salte, me selman i pa pou ariv dan *landfill*, ou kapab vin avek ou propozisyon. E sa *investor forum*, se pou envit bann ki annan lentere pou zot prezant zot proze, zot propozisyon. Pou annan en peryod letan pou zot prezante. E apre sa i annan en lekip evalyasyon enternasyonal ki’n ganny swazir.

E zot pou travay anba en kontra ki *IFC* in *secure* larzan. E apre sa zot pou donn rekomandasyon avek Gouvernman Sesel, lo si nou pou adopte, dapre zot ekspertiz si nou pou adopte ouswa pa pou adopte okenn sa bann teknolozi ki pe ganny propoze.

Alor sa legzersis i enportan, akoz enn fwa pou tou nou a kapab tonm dakor, lo ki kalite teknolozi ki nou pou mete dan pei konsernan salte, vi ki *landfill* in fini vin solisyon ki’n ariv lo bout son fezabilite dan pei. Akoz nou napa lespas pou nou fer li.

E nou pe ekspekte ki atraver sa legzersis, nou a kapab annan en pli pti swa pou nou fer, redwir la kantite opsyon ki nou annan. E apre nou a tonm dakor lo kalite opsyon ki nou pou swazir parmi

sa bann. Me kot i konsern peyman laplipar ditan sa bann konpanyen mannyer i fonksyonnen, se ki zot fonksyonn lo bann *tipping fees*.

Savedir letan ou vin zet salte kot zot ki ou peye parey nou pe peye ozordi kot *landfill*. E se sa ki siport zot aktivite.

Me an menm tan zot osi vann lenerzi avek pei kot zot kapab tir en lot bout reveni. E letan zot met ansanm i fer li vin vo lapenn.

Alor i annan plizyer pei kot bann konpanyen i fer koumsa. E nou pe swete ki nou a kapab trouv en solisyon ki pou ed nou pou nou zer nou salte san ki nou bezwen kontinyen agrandi *landfill*.

Akoz lespas parey ou konnen in fini. Lo Mahe nou napa lezot opsyon. Lo Praslin osi in ariv en bon groser. E lo La Digue i vreman, vreman sere kot i konsern landrwa pou zet salte. Mersi.

MR DEPUTY SPEAKER

Mersi *Minister*. Mon ava apel aprezan Onorab Cosgrow.

HON WALLACE COSGROW

Mersi Mr Chair. Mr Chair, sa Bidze mon *wish* nou ti annan bokou plis letan, pou nou kapab demann kestyon. Akoz i en Bidze ki annan sitan kantite

kestyon; *Waste separation* Perseverance; *Red giant crusher* lo *landfill* bokou, bokou plis ankor. Par egzanp bann *issues* kontrakter kan, ki dat zot ganny peye.

Me selman mon pou *stick* lo en kestyon Mr Chairman. E sa kestyon i konsern la kantite larzan *still* dan Bidze ozordi ki'n ganny mete pou *deal* avek peyman bann pti kontrakter. I enportan nou *deal* ladan. Minis in dir boner ki poudir i kapab nou redwir lo la kantite kontra, me solman nou *still* fer *the sane* louvraz.

Mon a met a senaryo dizon nou redwir lo en kontra – nou fer en sel kontrakter fer en lans 30 mil, en semen 15 mil o bor avek en bin 5 mil. So, i *still* fer nou konbyen - 30 avek 15 i fer 45 i fer nou 50 mil. So *still* nou pou bezwen *the same amount of money* pou nou pey en kontrakter pou fer tou le 3.

Now, mon konnen petet ou pe mazin lot keksoz. Madanm Lemiel in dir boner – Onorab Lemiel *sorry* in dir boner ki poudir si nou pe azout sa bann nouvo semen, nouvo kontra ki ti pe ganny fer *one-off*. Nou'n ganny dir, wi. So pou *still* annan serten kontra ki pou ganny *added*.

So nou annan nou en kote kontra ki ganny redwir, me

solman la kantite peyman i posibleman reste parey, avek nouvo kontra ki pou antre. So pou mwan par egzanp mon war en laliny la i reste 69 milyon ekek Roupri pou 3 an.

Pou mwan *it's bad budgeting* akoz ou pa *factor in* bann diferan keksoz ki kapab arive *between* 3 an. *Now*, mon sel dediksyon ki mon gannyen avek sa Mr Speaker, sel keksoz ki mon kapab dedwir se ki larzan pou bann kontrakter i posibleman pou redwir dan nouvo kontra.

E mon ti a kontan Minis i konfirm avek nou, si nouvo *tender*, zot pou *maintain the same rate* ki zot servi, *the same rate* pou zot kalkil bann kontra. Ouswa zot pou ogmante e fer nou konpran ki pou arive avek nouvo kontra.

Akoz bann kontrakter la deor, malgre serten i dir zot pe *have an easy time*. Nou, nou pa krwar akoz pran en masin koup zerb, pran en sa pou al detay sa bann zafer, pa bokou nou ki pou kapab fer sa travay.

So nou bezwen apresye osi louvraz ki sa bann pti kontrakter pe fer deor. E i enportan sa. Nou bezwen get zot larzan ki zot osi zot pe gannyen. E *factor in* tou keksoz ki sa bann pti kontrakter pe fer. Mersi bokou.

MR DEPUTY SPEAKER

Mersi son kestyon ti senp, *whether rate* pou parey ouswa pou annan sanzman dan nouvo kontra. Mersi.

MINISTER FLAVIEN JOUBERT

Mersi Mr Speaker. Mon pa okouran si i annan okenn lentansyon, pou koup la kantite larzan ki pou pey kontrakter avek dan bann peryod ki pe vini.

HON WALLACE COSGROW

Mr Speaker, si mon kapab ganny klarifikasyon. Be kestyon i *beg* prezan. Ou Bidze i reste *stagnant*. So ki mannyer ou *cater* par egzanp pou nouvo kontra ki ou'n dir Onorab Lemiel pou antre - bann *one-off*, ki ti *one-off* ki pou antre? Menm sa ki Onorab Monthy in demande.

So ki mannyer nou *cater* pou sa si Bidze i reste *stagnant for over a* peryod of 3 an? Akoz nou pe *budget* pou 3 an la 24, 25, 26. So pou mwan – *either it's bad budgeting* or i annan en keksoz ki pa pe mars byen Minis eskiz mwan. Mersi.

MR DEPUTY SPEAKER

Mersi. Eski *panel* i annan? *Minister*.

MINISTER **FLAVIEN**
JOUBERT

Mersi Mr Chair. Mon konpran ki Onorab pe vin avek. Me la nou pe propoz Bidze pou 2024. E ant la 2025 pou annan en lot revi ki pe ganny fer. Alor, i pou annan lokazyon pou nou retourn avek nouvo limero, si i annan en bezwen.

(comments off-mic)

MINISTER **FLAVIEN**
JOUBERT

Wi, be nou pa ankor – nou pa'n aprouv Bidze 2025 nou.

MR DEPUTY SPEAKER

Zot pa ava argimant avek *panel*. Les *panel* silvouple! Mersi. *Minister, proceed.*

MINISTER **FLAVIEN**
JOUBERT

Mon pa konnen si Minister Finans i kapab klarifye. Be selman sa Bidze ki pe ganny aprouve i pou 2024 Mr Speaker. Menm si i annan en lendikasyon Bidze 2025 ladan. Me selman 2025 - lafen 2024 nou pou retourn ankor isi, pou prezant en nouvo Bidze. E si sa revi i endike ki nou bezwen fer azisteman.

MR DEPUTY SPEAKER

Wi, be anfet mon ti krwar tou Manm Lasanble i konpran. Nou pe vot lo Bidze bann sif 2024. Menm si i annan en sif provizwar pou 25 ek 26 i *bound* pou revize baze lo prozeksyon koleksyon taks an 2025 e 2026.

(loud comments off-mic)

MR DEPUTY SPEAKER

Be non si Manm Lasanble i konfize *about* dokiman ki nou pe travay lo la -

HON WALLACE COSGROW

(Off-Mic)

This is fraud because the contract is for 3 years.

(loud comments off-mic)

MR DEPUTY SPEAKER

I responsabilite Chair, i responsabilite Chair pou met zot lo bon semen. Sif ki nou pe vot lo la i sif pou 2024. *It's not 2025 or*

HON WALLACE COSGROW

(Off-Mic)

But it's a 3 year contract. It's a 3 year contract.

MR DEPUTY SPEAKER

Eski *panel* i kapab klarifye sa e apre nou bouze silvouple. Mersi. Eski Mr Commettant oule dir en keksoz lo la?

DEPUTY COMPTROLLER
GENERAL JUDE
COMMETTANT

Thank you, thank you Mr Chair. Parey ki'n ganny mansyonnen, *basically* Bidze ki pe ganny diskite i Bidze 2024. Me par kont i annan provizyon, akoz ler ou fer *planning* ou pa *plan* zis pou 2024. Nou pe fer provizyon pou 24, 25, 26. Sa keston ki'n ganny demande si pou annan sanzman dan *rate*. I pou difisil pou ou dir ou pa kapab *commit* okenn sanzman dan *rate*.

Nou pa kapab dir i annan *increase* oubyen *decrease*, akoz i pou tou depan lo *assessment* ki pou ganny fer. Me parey Minis in dir nou pa pe dir i pann zanmen kominike oubyen etabli ki pou redwir *rate* ki en kontrakter pe gannyen ozordi.

Sa pa'n zanmen ganny konfirman, be selman pou annan en *assessment* ki pou get pa zis sa *rate*, me kantite louvraz ki pe ganny fer, ki grander ki landrwa. Tou bann keksoz ki pou antre ansanm dan sa kontra.

E natirelman parey nou'n dir, *come* 2025, nou pou annan sans osi pou nou revwar osi propozisyon Bidze ki'n ganny mete. Mersi.

MR DEPUTY SPEAKER

Mersi Mr Commettant. Nou ava bouze. Onorab Michel Roucou.

HON MICHEL ROUCOU

Mersi Mr Speaker. Minis, anefe nou'n war avek letan poudir se ki *LWMA* son responsabilite in agrandi. Nou'n war poudir se ki larivyer, lanmar osi lans in tonm avek li.

Eski *LWMA* i annan plan ankor, pou zot pran bann lezot responsabilite ki petet ki pe ganny okipe par bann lezot Minister, parey nou konnen lo kote bann pye dibwa ki tonm dan semen?

Si *LWMA* i annan plan pou zot pran bann larestan responsabilite. E ki bann nouvo responsabilite ki *LWMA* aprezan pe pran responsabilite pou fer? Mersi.

MR DEPUTY SPEAKER

Mersi Onorab. *Panel?*

MINISTER FLAVIEN
JOUBERT

Mersi Mr Deputy. Mersi Onorab. Mr Deputy, sa size responsabilite, mon krwar i enportan ki nou eksplik Lasanble. Aktyelman letan nou'n get rol *LWMA* son rol se pou li kouver tou sa ki annan pou fer avek zesyon salte. Se pou sa rezon ki bann proze resiklaz in ganny anvoye kot li.

E osi son rol, se pou kouver tou bann servis ki annan pou fer avek netwayaz. E se pour sa rezon ki bann lanmar ek larivyè in ganny anmennen kot li. Ki tonm ansanm avek bann travay. Par egzans ki pe fer lo bann lans.

Nouvo responsabilite ki LWMA potansyelman i kapab antre ankor se si in annan en ekspansyon dan bann proze resiklaz, ki nou pe planifye pou nou fer la aktyelman. Sa i pou tonm anliny avek bann ki egziste.

Akoz nou le agrandi bann kalite materyo ki nou pe tire pou nou fer resiklaz. E sa i tonm direktman anliny avek sa ki sa lazans pe fer.

Me mon pa krwar si nou pou al grandi son responsabilite pou enkli bann lezot fonksyon, ki ozordi pe ganny fer par bann lezot antite. Parey koup pye dibwa, eksetera.

Akoz sa i pa neserman tonm direktman anba son Lalwa ki ti etabli li ek son bann fonksyon prensipal. Alor pou nou, nou war ki si en keksoz i annan pou fer ek salte, resiklaz ouswa netwayaz zeneral, wi.

Me bann lezot fonksyon i pou vin tro lour e deza avek sa bann sanzman ki nou'n fer in konplik en pe lavi LWMA. Par egzans *Deputy* in koz lo peyman

bann kontrakter. Sa osi in ganny en pe difikilte aköz lentegrasyon in pran letan pou nou kapab fer li marse.

Me alor nou pa oule met tro keksoz tro lour lo sa lazans, pou ki i kapab anpes li fonksyon dan en fason efikas. E se sa nou repons pou le moman. Tan ki napa okenn logmantasyon dan bann proze resiklaz, nou pa war en agrandisman dan son rol. Mersi.

MR DEPUTY SPEAKER

Mersi *Minister*. Mon ava apel Onorab Uranie.

HON ROCKY URANIE

Mers Mr Chair. Mon oule zis *remind* Mr Chair, ki mon pa konn okenn kontrakter ki pe ganny *a nice time* pou li netwaye. Aköz mon konn La Digue kot i annan kontrakter i pas bomaten netway lans.

Peser i al lapas i kapab zet en pwason oubyen en keksoz. Aswar i ganny *call* i bezwen retournen vin re vin netway menm lans ankor. So, i pa pe *have a nice time*.

MR DEPUTY SPEAKER

Onorab! Onorab! *Your comment is uncalled for*. Ler mon asiz dan sez la anba mon MNA Mont Buxton. Ler mon la anler pa vin

fer largiman ouswa en deba avek mwan. Zis demann ou kestyon silvouple. Mersi bokou. *Proceed.*

HON ROCKY URANIE

Bon, wi, mon kestyon mon'n tann Mr Mangroo koz lo peyman. Akoz i annan bann dimoun ki'n fer bann *one off cleaning* La Digue pou bann drenaz, e zot pa ankor ganny peye ziska la. E zot pe demande kan zot pou ganny zot peyman. Mon'n tann ou koz lo la so mon swete ki zot ganny peye.

E mon'n war dan Bidze ki ou'n dir poudir bann *one-off* prezan pou ganny *award* bann kontra. So, mon swete ki sa bann *outlet* La Digue sa bann drenaz. E i annan lanmar osi ki pa lo lalis ki mon swete i ava lo lalis ek semen dan Belle Vue, pou zot kapab ganny kontra.

Me mwan mon kestyon i en pti pe dan laliny ki Onorab Cosgrow in dir. Vi ki zot pou fer kontra lannen prosenn. Eski la dan sa Bidze 2024 zot in mete sa lazisteman pou sa bann nouvo kontra *one-off*, ki pou kouver sa bann dimoun ki al pou 3 mwan?

Akoz apre parey mon'n tann Onorab Monthy dir, ki – prezan eski pou napa latransparans dan kontra, akoz in dir i annan dimoun i pa le

vwar. Be si sa bann dimoun i met zot *tender*. Eski *MNA* pou ganny drwa vini dir pa pran sa enn? Eski pou annan latransparans prezan dan lafason ki kontra pe ganny donnen? Mersi.

MR DEPUTY SPEAKER

Onorab in fer 4 pwen. Onorab in fer 4 pwen ki an deor avek lord ki nou'n tonm dakor lo la. So nou ava zis reponn kestyon. Eski pou annan varyasyon dan *rate with regards to one off*? Mersi.

MINISTER FLAVIEN JOUBERT

Mersi Mr Deputy. Mon ava pas laparol avek *CEO*.

CEO SHANE EMILIE

Mersi *Minister*. Mersi Onorab pou ou kestyon. Bon parey mon'n fer resorti oparavan tou bann *one-off* ki ti pe fer vi ki i bann *site* ki ti priyorite baze lo demann kominoter. So nou'n konsider tousala ki ler nou pe fer sa nouvo kontra, so i pou ganny entegre ladan. Savedir ler ou pe gete nou'n fini kalkil li pou entegre li ladan en.

Apre lo en lot pwen - *in fact* i *National Tender Board* ki *eventually* i pou antre *in the picture* avek tou bann lezot antite. Parey *The Technical*

Support Section. So baze lo the Procurement Regulation, in fact, i pou annan en Komite ki pou evalye tou bann dimoun ki pe anvoy zot aplikasyon pou tender.

So, sa i en *independent body* ki pou napa okenn enterferans okenn politisyen ladan. *Ok? So wi. Mersi bokou.*

MR DEPUTY SPEAKER

Mersi *CEO. Next* kestyon Onorab William.

HON WAVEN WILLIAM

Mersi Mr Chair. Bonn apre midi Minis avek ou lekip. Mr Chair, mon anvi refer *Minister* avek son *panel lo the list of challenges*. Letan mon pe get *the list of challenges* e letan ou pe refer avek sa mo rezilyans soutenabilite, *Minister*, mon pe vwar ki par egzanp sa dernyen *bullet point* la anba *challenges*. An menm tan lo kote *bin sites*.

Mon pe demann mon lekor si avek sa lespri transformasyon si ou *Minister* pe - *well* zot pe adopte en latitud travay dan *silos* ouswa zot pe ouver laport pou diskit avek bann lazans? Akoz zot tousel mon pa santi poudir zot pou kapab fer sa menm anba zot *strategic priorities*. Mon pa vwar konmsi sa lespri annan bann

dyalog ouswa travay avek bann lezot lazans.

Akoz sa travay ki devan zot i enorm. Epi letan mon pe regard sa soutenabilite mon santi poudir i pe vin en gro konsern. Akoz letan ou pran desarz lakaz ou pe koz tou bann kalite desarz.

Mon vwar poudir sa pou bat nou dan lavenir si vreman nou pa lans en kanpanny serye, ki enkli tou dimoun pou kapab vwar *the way forward*. Akoz pou mwan sa i pe vin en gro konsern e i pa pou bon pou nou lendistri touris. Mersi bokou.

MR DEPUTY SPEAKER

Mersi Onorab. Mon ava envit *panel* pou fer en repons pou sa refleksyon.

MINISTER FLAVIEN JOUBERT

Mersi Mr Deputy. Si mon konpran byen sa 2 pwen ki Onorab in fer sorti. Enn i annan pou fer avek lefet ki nou bezwen travay avek bann lezot lazans.

Mon ti a voudre reasir Onorab ki nou pe fer bann zefor pou nou travay avek bann lazans. Par egzanp avek Gouvernman Lokal nou'n zwenn avek zot. Nou'n menm komit finansyerman pou siport tou bann distrik, pou amelyor

bann fasilite kot nou pe resevwar salte bann *bin site*.

Akoz mwan personnelman e bokou dimoun i krwar mon krwar ou pou dakor avek mwan ansanm, ki nou bann lafason ki nou bann fasilite i ete, i pa normal dan bann distrik. E nou bezwen fer amelyorasyon enportan dan sa bann fasilite.

Alor nou pe travay avek bann lazans e mon ti a oule reasir Onorab ki nou an kontak avek bann distrik. Lazans i kontak avek bann distrik. Bann DAs, Lasante ek tou bann lezot dimoun ki enplike dan servis kominoter.

E kot i konsern soutenabilite langazman dan bann lakour, wi i annan en bezwen pou nou fer plis pou nou travay ek bann lakour. Me mon krwar osi i enportan ki nou bann piblik osi nou ankouraze pou nou vin devan, e pou nou met sa zefor pou kontribye nou par.

Akoz ki nou war ozordi. Par egzantp, nou'n deza fer sorti sa mesaz ki dimoun pa devret pe zet bann *green waste* kot bann *bin site*. Nou'n fer sorti sa mesaz plizyer fwa. E ki ou war ozordi dimoun i ras zerb kot li i vini i ranpli kot *bin site*. Dimoun i koup pye dibwa i met dan bin. Dimoun i fer tou bann keksoz.

E i annan serten porsyon lapopilasyon ki pa pe konpran vreman sa mesaz. E nou bezwen rod tou fason pou nou kapab arive tous sa bann dimoun ki pa pe konpran sa bann mesaz.

Akoz nou vwar se sa bann problemn. La kantite bin i annan diferan Onorab ki'n koz lo kondisyon nou bann bin e lakantite. Me toulezour nou zwenn dimoun pe trenn bin pe al avek pou li servi konman *pick up*, pou li saroye pou vin vid kot *bin site*.

Me letan nou vwar mon krwar ti a bon nou tou dan kominote nou dir mon zanmi pa fer sa. Pa esper en zofisyé vin dir li pa fer sa. Me nou osi konman en manm kominote nou bezwen dir li pa normal sa.

Akoz i vre Onorab, latas i enorm, me mon krwar tou dimoun fodre i form parti sa latas. Akoz i pe vin en problemn serye. E nou pe depans zis lo zofisyé pou nou kapab met lord dan sa ka.

Me selman mon le reasir ou, ki nou pare lazans i rekonnet ki nou bezwen travay an etrwat kolaborasyon avek tou dimoun dan kominote, pou nou fer sa latas ganny akonplir. Mersi.

MR DEPUTY SPEAKER

Mersi. Onorab, ou annan klarifikasyon lo la?

HON WAVEN WILLIAM

Minister, mersi pou ou larepons be selman mon ti a kontan ki – enn se ki zot konman Minister avek lazans zot vin en pti pe pli proaktiv. Par egzanp, enn lo nivo distrik mon krwar poudir nou kapab fer bokou. Me selman nou ti a kontan zot vini pou nou annan en dyalog serye.

Akoz i annan larepons pou serten keksoz, me solman problem se ki ou vwar se ki i mank en pti sa *connectivity* pou nou kapab vwar. Akoz mon krwar poudir nou Seselwa zot konpran e zot pou reakte si nou vreman serye lo ki fason nou anvi bouz devan.

Akoz *it's not a top-down approach* me i bezwen annan – en *down-up approach* osi. Mersi.

MR DEPUTY SPEAKER

Mersi Onorab. Mon krwar *panel* in pran kont ou sizesyon. Mon ava aprezan envit Onorab Bastienne.

HON DESHEILA BASTIENNE

Mersi Mr Chair. Bonn apre midi Mr Chair. Bonn apre midi Minis avek ou delegasyon. Minis, mon kestyon ti lo menm laliny avek Onorab Samynadin.

Annefe mon pa pou anvi rat sa sans, pou mwan tous lo sityasyon Perseverance. Ki zot konnen i osi en distrik ki pe sibir pa mal aksyon malonnet. Kot i annan bokou dimoun i pe servi Perseverance konman en *dump site*.

Me vi ki Onorab Samynadin in pas lo sa kestyon ki annan menm sa. Zot in donn repons ki zot pou travay an kolaborasyon avek lezot departman parey Lanvironnman. E zot in donn sa *hotline*, ki mon espere nou kapab pran aksyon o pli vit posib.

Me selman mon ti pou kontan demande ki'n arive avek sa proze, ki ti deza dan Bidze kot sak larzan ti pou annan son prop bin? Eski i ankor dan zot plan? Mersi.

MR DEPUTY SPEAKER

Mersi Onorab. En kestyon direk pou Perseverance.

MINISTER FLAVIEN JOUBERT

Mersi Mr Deputy. Mersi Onorab pou sa kestyon. Sa en proze ki en pe letan ti'n ganny planifye. Me mon ava les *Deputy* Mr Mangroo pou donn en pe lesplikasyon lo ki zistans lazans i pe ale avek sa bann proze koleksyon endividyel. Mersi.

DEPUTY CEO RAHUL MANGROO

Mersi Minis. Mersi Onorab pou ou kestyon. Parey mon ti anonse dan Lasanble, otour sa size sa kestyon menm, an term linisyativ sak lakour en bin. Ler nou'n analiz li finansyelman, nou'n war i pou kre en serten problemn an term soutenabilite.

E osi pou kre serten lezot problemn ki petet nou pa ti'n *factor* a sa moman. Lide e konsep i nob me selman pratik nou pa pou – nou pa ti pou war sa lekspektasyon ki nou ti anvi pa neserman ti pou ariv koumsa.

Nou'n osi – par kont nou pa pe rezet sa konsep. Nou'n amelyor li e nou pou byento vin devan avek en lot konsep pou kapab arive zwenn sa demann ki la deor. Me selman pa neserman i pe vin sak lakour.

E pou se la ki *all* pandan sa 3 dernyen lannen nou'n apros Departman Lagrikiltir, Biro Later atraver *MLUH* sa letan la *MLH* pou nou kapab annan bann teren. E menm Departman *Local Government* pou nou kapab annan serten teren. Akoz a lafen dizour pou nou kapab devlop sa proze, dan son totalite nou bezwen lespas.

E Perseverance i annan landrwa pa ankor ganny devlope. Par kont i annan en *land use plan* pou li. So nou bezwen idantifye bann landrwa.

So petet mon ava lans lapel Onorab, pou nou kapab idantifye bann serten landrwa akoz apart sa bin ki nou war bann bin salte lakwizin. I annan bann lezot gro debri ki nou bezwen en lot landrwa e pa pou kapab annan li o bor *bin site*.

So nou bezwen lot landrwa e ladan nou kapab devlop sa *concept* en pe pli pre e anmenn sa responsabilite anver rezidan. Pou zot kapab *manage* zot salte pli byen. Mersi.

MR DEPUTY SPEAKER

Mersi *Deputy*. I reste nou ankor zis 2 Manm. Nou ava zis pous en pti gin apre edmi. Prosen entervenans se Onorab Woodcock.

HON WAVEL WOODCOCK

Mersi Mr Chair. Mr Chair, zis en komanter sirtou baze lo kestyon ki Onorab William in fer. I annan en pratik ki'n egziste pou bokou lannen. I annan bann alokasyon bin dan plizyer bann distrik partou lo Mahe, Praslin e La Digue.

Me i annan en pratik ki kot bann bin ki ganny *allocated* avek bann distrik, ennler i *end*

up dan lakour bann endividi e menm dan lakour serten *MNA*.

Mon pa konnen, si ou war en *MNA* i annan pratik pas dan lasyet bann lezot *MNA* dan *tea break* pou pran restan pou manze - torti. Ou pa konnen pa ki i pou fer ankor.

(laughter)

HON WAVEL WOODCOCK

Mon kestyon i lo zesyon lanmar. Mon kestyon i lo zesyon lanmar. Zesyon lanmar in ganny transfer anba *LWMA* ozordi. E in toultan en defi. *In fact*, nou fek fer plizyer vizit avek nouvo *CEO* Shane Emilie, lo Praslin e nou'n diskit bokou lo sa *issue* lanmar *channel* avek bann zesyon larivyer osi.

Me anba *programme 2* "waste management services anba *maintenance and repairs*" i annan i enkli *maintenance* pou *rivers, channels, and marshes*. E i annan 4 laliny pou *rivers, channels and marshes*. Pou zesyon sa bann keksoz R2.123 milyon, R2.890 milyon, R990 mil e R15.074 milyon ki fer en total R21.086 milyon. Sa i pou *maintenance* lanmar, *channels* ek larivyer.

Mwan mon kestyon i annan bokou lanmar partou lo Mahe, Praslin e La Digue. E

sirtou lo Praslin i annan en kantite lanmar. Eski sa Bidze i ase pou zesyon tou sa lanmar lo Mahe, Praslin e La Digue?

E osi par lefe ki ozordi i annan bokou bann kontrakter ki'n ganny tire lo lanmar. E eski dan sa lokasyon bidzeter ki la devan nou ozordi i enkli sa proze pou *desilting* lanmar Koko Rouz ki *long overdue*? Mersi.

MR DEPUTY SPEAKER

Mersi Onorab. *Panel* ava donn en repons lo –

MINISTER FLAVIEN JOUBERT

Mersi Mr Deputy. Mersi Onorab pou sa kestyon. Mr Deputy, letan nou pe get sa zafer lanmar ek larivyer son lentegrasyon ti ganny fer an 2023. Alor i sipoze anndan Bidze 2023. Me dapre reprezantan Finans i annan serten laliny ki sipoze ganny aziste ankor.

Me an prensip sa migrasyon, sa Bidze ti sipoze in fini ganny fer. E nou pa pou war li aparet konman en adisyonnèl pou 2024, akòz i sipoze la an 2023. Mon a les reprezantan Finans e osi *CEO* pou komant en pe plis lo detay sa konponan dan travay *LWMA*. Mersi.

MR DEPUTY SPEAKER

Mersi *Minister*. Mr Commettant avan.

**DEPUTY COMPTROLLER
GENERAL JUDE
COMMETTANT**

Thank you, thank you Mr Chair. Zis pou konfirman poudir sa lentegrasyon wi in fini ganny fer. Mon ti pe zis diskrit ek Minis poudir i posib ki i annan serten laliny ki an deor. Me ler mon pe get detay la mon pe war poudir in *actually merged*.

MR DEPUTY SPEAKER

Mersi Mr Commettant. *Deputy CEO* i annan – i *ok* nou kapab *move on* ouswa? Akoz ou’n nonm sa zafer Koko Rouz spesifikman ou.

**MINISTER FLAVIEN
JOUBERT**

Mersi Mr Deputy. Sa lot pti bout mon ava demann *CEO* pou li reazir lo la. Mersi.

MR DEPUTY SPEAKER

Please proceed.

CEO SHANE EMILIE

Mersi *Minister*. Mersi Onorab. *In fact*, tou travay *desilting* in ganny fer *CAMS*. Selman parey in fer resorti oparavan, so i pou annan bann lazistaz ki pou arive pou sa Bidze.

Me selman tou bann *desilting* i ganny fer par *CAMS* e mon kapab konfirm avek ou ki in annan diskisyon ki nou’n fer avek *CAMS*. E zot pou petet *at one point liaise* avek ou Onorab lo sa. Mersi.

MR DEPUTY SPEAKER

Mersi *CEO*. E dernyen entervenans lo lalis lo sa *heading* se Manm Elekte Distrik Baie Lazare, Onorab Adelaide.

HON FRANCOIS ADELAIDE

Mersi Mr Speaker. Dabor les mwan felisit *LWMA* pou nou korperasyon ki nou annan dan distrik. Mon vremen apresye. E Minis osi les mwan osi felisit ou. Ou pe fer ou en bon travay ou a dir pli byen ki sa serten boug ti pe fer.

(APPLAUSE)

HON FRANCOIS ADELAIDE

Esperon nou a kapab ganny en plak *learner*, nou ava donn li pou met lo son ledò.

Mr Speaker, mwan mon kekyon i petet mon ava demann *LWMA* petet ki zot pe fer? Akoz mon konnen poudir i annan bann serten dimoun, ouswa lakonpanyen ki sipoze

kontribye ler zot al zet zot salte lo *landfill*.

Me nou vwar ki zot pe zet dan bann bin piblik. E napa *proper monitoring* sipervizyon e mon konnen poudir zot annan en karnen ki zot bezwen ranpli. Ki zot pe fer lo sa kote pou zot kapab anmas en pe bann reveni ki *LWMA* i devret ranmase?

E petet lo sa kote *circular economy* petet *CEO*, mon konnen poudir ou siport sa byen bokou. Ki zot pe fer pou ki nou kapab edik piblik, e petet mon pa konnen si zot pou annan bann serten *site* lo *landfill*, ki nou pou kapab met sa bann salte ki sipoze pa salte, ki nou kapab resikle.

E ki dimoun mon pa konnen si petet i plan. Pou dimoun kapab vin serse e aranze e fer sir ki bann keksoz ki mon krwar i devret ganny re servi i pa zis al zete lo *landfill*. Me i kapab retourn dan lekonomi e sa i a fer i kantite salte i ava redwir. Mersi.

MR DEPUTY SPEAKER

Mesi Onorab Adelaide. Nou ava envit *panel* pou klarifye bann pwen.

MINISTER FLAVIEN JOUBERT

Mersi Mr Deputy. Mersi Onorab pou sa pwen vremen enportan

kot i konsern *commercial waste*. Parey ou konnen i annan en Lalwa ki nou ti fer sorti an 2022. E sa Lalwa i konsern *commercial waste* i apel *Commercial Waste Regulations*.

E i koresponn a bann bezwen ki annan anba Lalwa *Licensing*, ki ti napa en provizyon avan dan Lalwa Lanvironnman pou konplimant sa provizyon *Licensing*, ki fer ki tou biznes i sipoze annan son kontra avek en kontrakter ki otorize pou tir son salte.

Mon ava les *CEO* koz en pe lo estimasyon *compliance* avek sa Lalwa. E osi avek reveni ki pe anmase lo *weighbridge*. Me mon pou dir ki ziska konmela nou pa ankor ariv lo sa pwen kot tou kontrakter ki ozordi pe fer biznes Sesel. Par egzanp bann *tourism* fasilite, bann laboutik pe *comply* avek sa Lalwa pou zot fer sir ki zot annan en kontra.

E ki fer ki bokou zot pe servi bin piblik pou zet zot bann salte, ki pe koz en gro problem pou bann kominote.

Mon ava les *CEO* Mr Deputy, avek ou permisyon pou koz lo sa size. E osi azout en pe lo *circular economy*. Mersi.

MR DEPUTY SPEAKER

Mersi *Minister*. *CEO*?

CEO SHANE EMILIE

Mersi Chairman. Mersi *Minister*. Mersi Onorab, pou ou kestyon. Bon *in fact* pou mwan fer resorti wi, defi i la. Mon anvi koz en pe lo defi si ou permet mwan. Defi kot i konsern bann aktivite komersyal. Wi, parey *Minister* in fer resorti pa tou bann biznes ki neserman annan sa kontra.

E i annan legzersis ki dan lazans i annan en *Commercial and Data Unit* ki ale ki fer lenspeksyon e li ki ranforsi sa *regulation*. Pou fer sir ki tou sa bann biznes i pe *comply* anver sa *regulation*.

E depi ler mon'n vini nou pe entansifye en pe legzersis. I annan *about 3 employees* dan sa *unit*. E zot pe ale pe kolekte e menm zot pa tarde pou donn sa biznes en dele letan pou li fer sir ki i pe *comply*. Ordinerman i *about 11 zour, hmm?*

E lo sa pwen osi tou pou fer resorti se ki kot *weighbridge* i enportan mon refer resorti ki i annan 3 diferan sours reveni pou lazans. I annan *waste collection, sales of plants* apre *sale of tender document*. Pou sa *waste collection* sa i sa *fee* ki sa lakonpanyen ler pe vin kot *weighbridge* i bezwen peye.

E nou pe war ki an 2022 nou ti kolekte *about R9* milyon an reveni. E sa lannen osi nou lo target pou nou kolekte

reveni. E i enportan osi pou mwan fer resorti se ki nou anvi *at some point*, wi, entansifye en pe kantite reveni ki nou pe anmase. Se la baze kot mon bann priyorite mon bezwen adres tousala.

E petet kwa ki enportan pou fer resorti, se ki i annan *back* lo sa premye pwen kot i konsern letablisman touristik. Ki pa neserman annan en kontra *waste collection*, sirtou Anse La Mouche, *ok?* I annan *about 21* letablisman touristik e pa tou ki annan akoz? Akoz?

Mon anvi fer resorti se ki dan *regulation SLA*, i annan en laliny ki dir si ou annan 6 lasanm *or* pli ba ou pa oblize annan en *waste collection contract*. So, mon deza annan en konversasyon avek *CEO SLA* pou nou regarde pou nou refiz sa. Akoz ou bezwen *level the playing field*, pa vre?

So, i enportan ki tou biznes i annan sa *waste collection contract*. Akoz ou kapab aplik mezir pou en serten *alright?* So, sa i en legzersis ki nou pe fer kot nou pe amelyor en pe lo la.

Lo *circular economy* i enportan pou mwan fer resorti ki *Blue Economy Department* ki pe *lead* sa legzersis lo nivo nasyonal. I annan en *roadmap* ki zot pe devlope. *LWMA*,

Departman Lanvironnman avek tou lezot antite ki *involve* dan son lenplimantasyon, pe *get involved* ladan.

E nou, wi, i annan nou bout ki nou bezwen zwe kot i konsern *waste segregation*. E ou nou ankouraz piblik pou redwir, reservi e resikle. E pou dimoun war osi ki salte i en trezor. Pou nou komersyaliz en pe ki mannyer i kapab anmenn reveni pou Sesel. *That is the concept of circular economy*.

Kot ou pe prodwir an menm tan nou pe redwir kantite salte ki al lo *landfill*. Reservi li, resikle li, prodwir bann nouvo keksoz, vann li lokalman, enternasyonal e anmenn sa reveni *back* dan lekonomi Sesel.

So nou pe antre dan sa legzersis en keksoz progresiv. Me nou pou arive *at one-point* kot nou pou annan ankor bann diskisyon teknikal. E pou nou war ki bor sa i kapab antre lo nou program *at the agency*. Mersi.

MR DEPUTY SPEAKER

Mersi *CEO*. Donk, sa in anmenn nou lafen nou sesyon kestyon konsernan *Landscape and Waste Management Agency*. E aprezan in ler pou nou pran en vot lo sa *head* ki trouve lo paz

471 ziska 480 dan nou *budget document*.

Mon ava demann tou bann Manm ki an faver pou edike silvouple? Mersi. Okenn Manm ki kont? Mersi. *Ok*. Vot pou *Landscape and Waste Management Agency LWMA* trouve lo paz 471 ziska 480 pou en R287 milyon 775 mil, 20 Manm in vot an faver, okenn Manm pann vot kont e 10 Manm in *abstain*. Donk, sa vot in pase.

I osi annan de lezot *headings* ki tonm anba responsabilite Minis Flavien Joubert dan son kapasite konman Minis pou Lagrikiltir Sanzman Klima avek Lanvironnman. Dabor i annan *Seychelles Meteorological Agency* ki trouve lo paz 481 a 485, pou en sonm R17 milyon 484 mil. Mon ava demann tou bann Manm ki an faver pou endike silvouple? Mersi. Okenn Manm ki kont? Mersi Madanm Clerk.

Donk, vot pou *Seychelles Meteorological Agency* lo paz 481 a 485 pou en sonm R17 milyon 484 mil i annan 30 Manm ki'n vot an faver, 0 abstansyon e 0 vot kont. Donk, in pase par linanimite baze lo la kantite Manm ki prezan dan Lasanble Nasyonal.

E dernyen *heading* ki nou pou pran vot lo la se pou *Seychelles Energy Commission* ouswa Komisyon Lenerzi Sesel trouve lo paz 468 a 471 pou en sonm R20 milyon 792 mil. Tou bann Manm ki an faver endike silvouple. Mersi. Okenn Manm ki kont? Mersi Madanm Clerk.

Rezilta fot pou *Seychelles Energy Commission* trouve lo paz 468 a 470 pou sonm R20 milyon 792 mil, 30 Manm in vot an faver, 0 abstansyon e 0 zero vot kont. Donk vot in pase par linanimite.

Avan mon kontinyen, mon ava zis demann serzan pou retourn nou dan Staz Lasanble. Mersi *Sergeant at Arms*. Donk avan nou ale pou benefis bann Manm Lasanble osi piblik ki pe ekout nou, demen travay Lasanble dan Staz Komite pou prensipalman dominen par size Lasante.

Bomaten nou pou vwar Minister Lasante sa i ava swiv par *public* – baze lo lekel? *Ok I trust* Madanm Clerk. La ki'n donn mwan sa dokiman. Donk Lasante. Minister Lasante avan apre *Public Health Authority* i ava swiv par *Health Care Agency*. Apre i annan bann servis *satellite service* Minister Lasante, ki pou enkli *Seychelles Nurses and Midwives Council*, *Health Professional Council*,

Seychelles Medical and Dental Council. Sa i bann vot ki nou pou pran demen.

Donk, nou ava remersi tou dimoun ki'n prezan avek nou. Lo *head table* nou ti annan Minis Flavien Joubert, ki Minis pour Lagrikiltir Sanzman Klima avek Lanvironnman. I ti akonpanyen par Mr Shane Emilie ki Sef Egzekitiv akonpanyen par son Depite Mr Rahul Mangroo. E osi Mrs Louise Azemia ki *Accountant*. Zot, zot sorti kot *Landscape and Waste Management Agency*.

Nou ti osi annan 2 zofisye sorti kot Minister Finans sa ti Mr Jude Commettant ki *Deputy Comptroller General* avek Mrs Ruth Pool ki *Principal Finance Analyst*.

Donk, nou pou *adjourn* la e nou pou rebran travay Lasanble demen bomaten 9er. Mersi zot tou pou zot partisipasyon e bonn rantre.

(ADJOURNMENT)

